

**EIGHTH LEGISLATIVE ASSEMBLY OF MIZORAM
(THIRD SESSION)
LIST OF BUSINESS**

FOR SEVENTH SITTING ON THURSDAY, THE 20th JUNE, 2019
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LAYING OF PAPERS

2. **Pu LALCHAMLIANA**, Minister to lay on the Table of the House a statement of correction on the reply given on the 17th June, 2019 to Starred Question No. 51, Ballot No.42 asked by **Pu Lalduhoma** regarding “ILP chungchang”.
3. **Pu LALCHAMLIANA**, Minister to lay on the Table of the House a statement of correction on the reply given on the 20th March, 2019 to Starred Question No. 12, which was transferred to Unstarred Question Ballot No.82 asked by **Pu Vanlalhlana and Pu V.L. Zaithanzama** regarding “Ramri chungchang”.
4. **Pu LALRUATKIMA**, Minister to lay on the Table of the House a statement of correction on the reply given on the 20th March, 2019 to Starred Question No. 123 which was transferred to Unstarred Question Ballot No. 78 asked by **Pu Lalchhuanthanga** regarding “Brigade ram Bawngkawn”.

FINANCIAL BUSINESS

DISCUSSION AND VOTING ON DEMANDS

5. **Pu C. LALRINSANGA**, Minister to submit to the vote of the House various Demands under his charge.
6. **Dr. K. BEICHHUA**, Minister to submit to the vote of the House various Demands under his charge.

S.R. ZOKHUMA
Commissioner & Secretary

S P E A K E R : Thawhrimna zawng zawngah hian hlawkna a awm a, ka a sawi mai mai erawh chuan tlakranna mai a thlen a ni.

Thufingte 14:23

Zawhna leh chhanna kan la leh nghal ang a, Starred Question No. 96-na zawt turin member zahawm tak Pu Nihar Kanti Chakma ka sawm e.

PU NIHAR KANTI CHAKMA : Pu Speaker, ka lawm e. Ka zawhna Starred Question No. 96-na Public Health Engineering Department Minister zahawm tak chhan atan :

Puankhai leh Hmundo khua (35th West Tuipui Constituency) Rural Water Supply Scheme atan hmalakna a awm em ?

S P E A K E R : Chhang turin Chief Minister zahawm tak Pu Zoramthanga i lo sawm ang.

PU ZORAMTHANGA, CHIEF MINISTER : Pu Speaker, member zahawm tak Pu Nihar Kanti Chakma zawhna chhanna chu :

Puankhai-ah hian PHE Department-in kum 2008-2009 khan tuikhur (IVSS) a lo siam tawh a, 2019-2020 hian Rural Water Supply Scheme atan hmalakna a awm rih lo.

Hmundo Piped Water Supply (Gravity) hi kum 2010-2011 khan thawh zawh tawh a ni a, 2019-2020 hian Rural Water Supply Scheme atan hmalakna a awm rih lo tih a ni e.

S P E A K E R : Dr. B.D. Chakma i lo sawm ang.

PU B.D. CHAKMA : Pu Speaker, ka lawm e. Ka zawhbelhna chu- Chawngte hi tui harsatna tak mai a ni a, chuvangin Chawngte Composite Greater Water Supply Scheme kha chu NEC hnuaiyah a awmin ka hria a, hmalak tumna a awm em tih ka zawhbelhna pakhatna ni se.

Pahnihnaah chuan Lawngpuighat ah sawn tun thlengin water supply a awm lova, Lawngpuighat-ah sawn hetiang Greater Water Supply Scheme hi a awm ve dawn em tih ka zawt e.

S P E A K E R : Member zahawm tak Pu Lawmawma Tochwawng i lo sawm ang.

PU LAWMAWMA TOCHHAWNG : Pu Speaker, ka zawhbelh duh chu hei hi a ni –

Mihring kan pung zel a, Lunglei khawpuiah pawh tui a tlem tial tial a, tuna kan tui tlan mek sawn min daih tawh lo va. Chuvangchuan, Lunglei Greater Water Supply Scheme Phase II hi kan mamawh em em mai a, engemawchen kha kalpui a ni tawhin kan hria a, eng chen nge kan thlen tawh, engtikahnge kan beisei theih ang tih nisela.

Tin, Lunglei khawpui chawmtu pipeline te saw a chhe tawh hle mai a, a tuiek nasa tawh a, chuvangchuan thlak a ngai tawh a, a rang lamin min ngaihtuah sak thei ang em tih leh a pump-na khawl te saw a hlui tawh a, thlak a ngai tawh hle mai, khawngaih takin min thlak ran sak thei ang em tih ka zawt e.

S P E A K E R : Chhang turin a changtu Minister Pu Zoramthanga i lo sawm ang.

PU ZORAMTHANGA, CHIEF MINISTER : Pu Speaker, zawhna siamtu khan a zawh belh lo va, tlem sawifiah belhna ka nei zawk ang a.

Puankhai khaw tui lakna tur atan khan gravity-a tui lakna tur a awm loh avangin van ruahtui khawlna rain water harvesting system kha ruahmanna siam a ngaih hmel a. Chumi tur atan chuan hma lo la teh u tiin a bialtu EE leh SDO te thu kan pe e tih kha ka sawi belh leh duh a.

Hmundo hi tuna record danah chuan tui nei tha khua zing ami an ni deuh a. Mi pakhat tan 40 ltrs. an dawng pha tlat mai a, engpawh ni se, a tul a nih chuan hei chu kan la en zel ang a. Amaherawhchu, tun dinhmunah chuan an aia harsa khua an la tam deuh hlek a, kha kha chu kan ngaihtuah hmasak zingah a tel lo tih kha ka sawi belh ni sela.

Pu Speaker, a dang hi chu mahni department enkawl pangngai a ni lo bawk nen thawn thutah pheih hi chuan tlema a principle deuh lo pheih hi chu hriat a har khawp mai a. Chawngte Water Supply Scheme kha Chawngte saw

an harsatzia kan hre theuh mai a. Hotute lokal pawh hi ka lo sawipui thin a, engatinge luikama awm si in harsat em em ka ti a. Ganges luikama awm ang deuh an ni a. 'Kan tui hi a hmantlak tlat loh, inbual nana kan hman pawhin thak vak a awl,' an ti a. 'Engtingge kan tih ang, a hnar lam deuhah khawpui thli lo deuhah te hian khuapin pump chho ta ila, chu chu a theih ang em?' ka ti a. 'A theih ang em aw!' an ti a, khatiangte kha a nia. Engpawh ni se, Chawngte khawpui ve khatia tui harsa a awm kha chu hma lak a ni a, theihtawpin keima mimal pawhin kawng dang a awm em tiin ka lo zawng ka lo zawng ve a. Pu B.D. Chakma zawhna kha chu theihtawpin hma kan lo la ang e. District Council area ve ber tui tha lo va awm kha tha kan ti lova, chuvangin theihtawpin hma kan lo la ang.

Chutiang bawkin Lawngpuighat lamah pawh khan a progress chin leh hmalak dan ka hre chiah lo va, hetia han ti thut ka nih avangin. Engpawh ni se, India sorkarin tun khawthal rei avanga mi tam tak tui in tur harsa kha hmanna ka sawi tawh ang khan NITI AAYOG an kohkhawm nachhan pakhat pawh a nih avangin an ngaipawimawh a, khami denchhen khan kan rama tui harsatna khua te khu lama project kalpui chi chu nasa lehzualin kan lo ti ang a. Tin, keimahni state sum atanga kan tih phak chin tur leh hmun dang atanga kan tih theih tur chi pawh tui in tur hi chu theihtawpin tan lak kan lo tum ang. Lawngpuighat ah pawh a progress chin hriain kan lo enzui ang e.

Pu Lawmawma sawi ang khan Lunglei Greater Water Supply Scheme kha tunah engnge a thlen chin chiah sawi theih a ni lo va, amaherawhchu Aizawl khawpui te, Lunglei te, kan khawpui lian te hi tui kan neih that loh avangin department pawhin an ngaipawimawh a. Theih ang tawkin pawisa pek belh a tul leh kan lo pek belh ang a. Tin, a improve-na leh a pump-na chungchang thua pawh kha kha a ken tel a ni a, kan theihtawpin phai lama nawr belh ngai a nih pawhin kan lo nawr belh zel dawn nia. Keimahni state sum atanga tih theih chin pawh kan theihtawpin improve tumin hma kan lo la ang e tih kha ka chhanna a ni e.

S P E A K E R : Kan hriat angin kan Deputy Chief Minister hi ala dam lova, kan Chief Minister-in charge a la a, kan danah khan tun hmain

zawhbelhna tih ngai a ni lo va, kan ti ta zawk a, a rawn chhang tha a, a lawmawm e.

Tunah chuan Starred Question No.97-na zawt turin Pu C.Lalsawivunga i lo sawm ang.

PU C.LALSAWIVUNGA : Pu Speaker, ka lawm e. Land Revenue & Settlement Minister chhan atan ka zawhna chu :

- a) Surveyor post ruak eng zat nge awm ?
- b) Surveyor indaihlohna avanga hna kal muang lutuk tiziaawm turin surveyor post ruak hnawh khat turin ruahmanna siam a ni em ?
- c) Kum 2008 vela Surveyor Training Institute sakna tura Hualngo hmun ram zau taka laihzawlah hian Training Institute tur building sak thuai tum a ni em?

S P E A K E R : Minister zahawm tak Pu Lalruatkima chhang turin ka sawm e.

PU LALRUATKIMA, MINISTER : Pu Speaker, ka lawm e. Pu C.Lalsawivunga Aizawl South I bialtu member zahawm tak zawhna chhanna te chu :

- a) Tunah hian Surveyor post ruak 45 (sawmli leh panga) a awm mek.
- b) Surveyor indaihlohna avanga hna kal muang lutuk tiziaawm turin nikum lamah 10 (sawm) lak an ni a, tunah erawh chuan lak leh tumna a awm rih lo.
- c) Surveyor Training Institute, Hualngohmun-a dinna tur hian PWD, Project Division-III ten kum 2006 khan project proposal an siam a. Tunah hian North Eastern Council leh 15th Finance Commission-ah te funding zawn mek a ni. tih kha ka chhanna a ni e.

S P E A K E R : Starred Question No. 98-na zawt turin Pu Lalrindika Ralte i lo sawm ang.

PU LALRINDIKA RALTE : Pu Speaker, ka lawm e. Supply Minister hnena ka zawhna chu :

Tuna FCS & CA Department in MIZOFED kaltlanga buhfai a lei quality hi Supply Department duhthusam a tha a ni em? Ka lawm e.

S P E A K E R : Chhang turin Minister zahawm tak Pu K. Lalrinliana i lo sawm ang.

PU K.LALRINLIANA, MINISTER : Pu Speaker, ka lawm e. Member zahawm tak Pu Lalrindika Ralte zawhna chhanna chu :

Tun dinhmuna MIZOFED Ltd. buhfai suuply hi duhtusam ni chiahloa Department-in a hriat avangin quality tha zawk supply tura hriattirna pek an ni tih a ni e.

S P E A K E R : Pu K.T.Rokhaw zawhbelhna zawt turin i lo sawm ang.

PU K.T.ROKHAW : Pu Speaker, ka lawm e. Chakhang Supply Kudam khi a chhe tawh khawp mai a, fur laia buhfai dahna tlak a nih tawh loh avangin, nikum fur lai pawh khan V.C leh NGO te inrawn khawmin MTP Hall-ah buhfai dah a ni a. Kan Minister hian kumina sak turin priority min pe thei ang em tih ka zawt e.

S P E A K E R : Chhang turin Minister zahawm tak i lo sawm ang.

PU K.LALRINLIANA, MINISTER : Pu Speaker, ka lawm e. Member zahawm tak Pu K.T.Rokhaw zawhna kha, Chakhang Godown hi sak that tuma hma lak mek a ni.

S P E A K E R : Starred Question No. 99-na zawt turin Pu Lalduhoma ka sawm e.

PU LALDUHOMA : Pu Speaker, ka lawm e. Ka zawhna chu :

- a) Chakma Autonomous District Council huam chungah Mizote tana in hmun lo ram neih phal lohna dan an siam em ni ?
- b) Chutiang dan chu siam theihna an nei em ? An neih chuan a dan leh section te.

S P E A K E R : Chhang turin a changtu Minister zahawm tak Pu Lalruatkima lo sawm ila. Niminah Pu Rinchhana thih thu kan sawi zawh

hnu lawk khan Pu Ruatkima puzawn Minister zahawm tak lo ni thin tawh Pu P.B. Rosanga a boral ve nghal bawk a ni.

PU LALRUATKIMA, MINISTER: Pu Speaker, ka lawm e. Member zahawm tak Pu Lalduhoma zawhna chhan chu:

- a) Chakma Autonomous District Council huam chhungah Mizote emaw, non-Chakma dangte tana in hmun lo ram neih phal lohna dan siam a awm lo.
- b) Inhmun lo ram neih phal lohna Dan CADC-in siam theihna an neih leh neih loh hi Land Revenue & Settlement Department-in a hre lo, tih kha ka chhanna a ni e.

S P E A K E R : Zawhbelhna zawt turin zawhna neitu Pu Lalduhoma i lo sawm ang.

PU LALDUHOMA : Pu Speaker, ka lawm e. Inthlahrung takin kan zawt belh ang e. Mizo engemaw zat CADC area-a awmsa an awm a, khang kha chuan harsatna an nei lo tih kan hria a. Amerawhchu, va awm thar turte tan hian District Council hotu te hian Mizote inhmun an pe duh lo tih ri kan hria kan hre mai a. Hei hi thutak a ni em? Sorkar hian a la hre chiah lo a nih pawhin a enfiah thei em? Chutiang chu ziaak loh dan hmangin an lo ti thin nge, District Council hian inhmun lo ram thuah hian dan hran an nei ve? An nei a nih chuan chu Danah chuan chutiang provision chu a awm em? A lo awm a nih chuan kha kha dan kalh a ni thei ang em tih vel kha tunah min chhang thei chiah lo mahse enfiah a thain ka hria a. A lo enfiah thei ang em tih kha ka zawhna a ni e.

SPEAKER : A theih ang anga member zawhna chhang turin Minister zahawm tak ka sawm e.

PU LALRUATKIMA, MINISTER: Pu Speaker, CADC huamchhungah hian kan ngaihthlak tak ang khan Chakma ni lo Mizo khua leh Bru chen tamna hmun khua engemaw zat a awm a. Chung mite hnenah chuan CADC hian Residential Pass-te, Huan Pass-te a pe thin a. Chutiang khua chu engemaw zat an awm bawk a ni. Chutiang chuan Mizoram-a Autonomous District Council te hian Sixth Schedule of Indian Constitution Para 3 hnuaiah thuneihna pek an nih angin

inrelbawlina hranpa atan tul an tih angin dan an insiam thei a. Chung dan te chu an siam a nih pawhin Governor of Mizoram-in a approve phawt loh chuan awmzia a nei chuang lo. Chuvangin sawlaih sawn khatianga Autonomous District Council pawn ami ten inhmun lo ram an neih theih lohna dan hranpa kha helaiah hi chuan an siam awm hriat a ni lova. Chuvang chuan hriat theih chinah CADC hian Mizo te tan inhmun lo ram neih phal lohna dan a siam awm hi kan hre rih lo a ni. Chuvangin member zahawm takin a tul a tih ang khan kan lo enfiah zel ang a. Kha laiah khan an dan neihte pawh fimkhur taka Governor-in a pawm ngai chi a nih avangin chu lai chu a tul angin kan lo enzui dawn nia.

SPEAKER : Aw le, Pu Ruatkima kha a lawmawm a, hei, ram rorelna ngaipawimawhin rilru kimlo takin a rawn kal a rinawm a. House-in kan hrethiam ang a, ani pawh a puzawn vuinaah chuan kal kan phal sak nghal mai ang, a ti tha hle a ni.

Starred Question No.100-na zawt turin member zahawm tak Dr. K. Pachhunga ka sawm e.

Dr. K. PACHHUNGA : Pu Speaker, ka lawm e. Minister zahawm tak Excise & Narcotics Department changtu chhan atan ka zawhna chu :

- (a) Kum 2014 Congress sorkarin zu an zawrh atanga MNF sorkarin a tihtawp thleng khan zu bottles/litres engzatnge an hralh?
- (b) Zu avanga thi Mizoram-ah 2014 atanga vawiin thlengin engzatnge awm?

SPEAKER : Chhang turin a changtu Minister zahawm tak Dr. K. Beichhua ka sawm e.

Dr. K. BEICHHUA : Pu Speaker, member zahawm tak Dr. K. Pachhunga zawhna chhanna chu :

- a) Dt. 16.3.2015 a Congress sorkarin zu an zawrh atanga MNF sorkarin a tihtawp thleng khan zu (IMFL/Beer/Wine) litre 3,70,30,041 hralh a ni.
- b) Excise & Narcotics Department-in zu avanga thi chhinchhiah (record) a nei lo tih ka chhanna a ni e.

SPEAKER : Pu Lalduhoma i lo sawm ang.

PU LALDUHOMA : Pu Speaker, ka zawh duh chu Thenzawl saw chhim leh hmarin a paltlang ram a ni a. Sorkar hmunpui pawimawh tak tak a awm bawk a. A lutchhuak saw kan thahnem khawp mai a. Ruihhlo lamah hian kan NGO te an hah khawp mai a. Chuvang chuan Excise Outpost hi kan mamawh khawp mai a. A hmun tur pawh kan Y.M.A ten an dap reng a. Hmu dawn pawhin an inhria a. Outpost hi min dah sak ve thei ang em tih ka zawt e.

PU C. NGUNLIANCHUNGA : Pu Speaker, ka zawhbelhna chu Unstarred Question-ah Health Department-ah ka zawt a, chumi nen chuan han sawi kawp remin ka hria a. March, 2015 atanga March, 2019 thleng hian zu avanga thi engzatnge awm ka ti a. Zu avanga thi record hi mumal sawi tur chhannaah hian a awm lo va. Vawiinah pawh khan kan Excise Minister-in zu avanga thi record awm lovin a sawi a. He House zahawm takah ni 20.3.2019 ah khan kan House Leader zahawm tak hian zu avangin mihring 5000 thi niin a sawi a. Tin, 3.4.2019-ah Serchhip Public Meeting-naah mi 5000 thiin sawi a ni bawk a. Kha kha eng base-in nge khawi atang, khawi record-in nge a sawi tih lai kha Pu Speaker, ka zawh belh e.

SPEAKER : Dr. ZR. Thiamsanga i lo sawm ang.

Dr. ZR. THIAM SANGA : Pu Speaker, ka lawm e. Champhai District khi kan hriat angin international border area-a awm kan ni a. Zokhawthar khi damdawi lamah pawh drugs an tawlhna hmunpui ber a ni a. Nimpiniah lawk pawh khan ka han zawt a, Excise Department-in No.4 hi hawng 30 lai mai an lo man a, niminah khan hawng 5 an man leh a. Hawng khat hi a pawisa chuan ₹ 40,000 vel niin ka hria a, tichuan nuai 14 man vel an man a ni. Champhai-a kan Excise Department khi an khawngaihthlak khawp mai a. Clerical Staff hi 2 kan nei a, Head Assistant pawh hi kan nei lo va. Constable 35 kan nei a, chhun zan zawmin duty a ngai tawh a ni. Chuvang chuan kan Excise Minister te pawh han zawt ila, a huphurhawm riau chuan ka hria, Excise Department indaihlohzia te ka han ngaihtuah hian kan Excise Department Minister zahawm tak pawh a lu a hai hlein ka ring a. Tih tur a tam a, a buai hle mai a, a fakawm khawpin ka hria a. Chutih rual chuan Champhai khi international border a nihna ang leh drugs tawlhna hluar berna hmun a nih avang khian khilai khi kan thuam chak a ngai hlein ka hria a. Hei hi kan sorkar pawh hian min han ngaihven zui se ka duh khawp mai.

Tin, tun ami kha, Health lama ka thawh ve avangin tuna member zahawm takin a rawn zawh kha, “Mi 5000-an thi” tih vel te, a figure tak tak hi Chiang lo mahse, zu kan zawrh atang hian Synod office-ah te pawh kan va kal thin a. KTP ang te, TKP angah te pawh zu kan zawrh atang hian mi 3000/4000 KTP member ang atang pawh khan boral an awm a ni.

A chhan leh vang an han chhut hian alcohol related hi a tam ber an ni tlat mai a. Khatiang kha KTP angah a nih chuan Pu Speaker, KTP lo ah a mi nawlpui angah pheih chuan 5000 aia tam kha zu avang hian kan thi dawn lawm ni tih kha medical mi ka nihna atang pawh hian ka ngaihdan ka rawn sawi ve a nih chu. Pu Speaker, ka lawm e.

SPEAKER : Doctor i ni a, an thih chhan hi ziah dawt kher thin a ni em?

Dr. ZR. THIAMSANGA : Ni chiah lem lo, an thih chhan hi. Amaherawhchu tam tak hi alcohol avanga thi hi thil dang kan han puh ve deuh thin a ni.

SPEAKER : Minister zahawm tak Dr. K Beichhua, a theih ang anga karkik leh inpersan deuh pawh a awm kha, a theih leh a chhang ang a, a theih loh leh ama thu, i lo sawm ang.

Dr. K BEICHHUA, MINISTER : Pu Speaker, ka lawm e.

Member zahawm tak Pu Lalduhoma zawhna Thenzawl Excise post hi hawn kan chak khawp a, hawn ngei ni se tih pawh kan duh a. Mahse, tun dinhmunah hi chuan kan la hawng thei rih lo a, hma theihtawpa lak chhoh zel kan tum dawn tih kha ka chhanna ni se.

Tin, member zahawm tak Pu C Ngunlianchunga zawhna, hei hi Health Department changtu ka ni lova, engzat nge thi hi ka chhang thei lo va, min lo hrethiam se.

Tin, Dr. ZR. Thiamsanga zawhna, Champhai lam chungchang kha. Champhai lam khi kan hriat angin international border a ni a. Thil tha tam tak a lo luh laiin thil thalo tam tak te pawh a lo lut ngei ang a. Chuvangchuan, Zokhawthar-ah khian Excise outpost hawn tumin tunah hian hma kan la mek a ni tih ka chhanna a ni e.

SPEAKER : House Leader i lo sawm ang.

PU ZORAMTHANGA, CHIEF MINISTER : Pu Speaker, zu avanga thi hi exact figure leh chumi chu a ni e tih tu chhungkua mahin an ti duh lo a. An thih chhan pawh zu avanga thin tha lo an nih pawhin, “thin tha lo” an ti mai a. Chutichuan, a hming dang mawi zawka vuah vek a ni a. Amaherawhchu, hemi general concept-a kan han tihah hian Pastor leh Kohhran chu ka sawi lo ang a. Pastor pakhatin an Kohhrana a sawi ngei pawh, “Kumin hian kan kohhranah mi 38 mitthi kan awm a, chuta 27 chu zu vanga chiang taka thi an ni tih kan hre theuh a,” a ti a. Amaherawhchu, kha kha chu a ratio sang pawl pawh a ni ang a. Kum 4 chhung hian Mizoram-ah kum khatah zu vanga thi hi 1500 tih ang te chu an awm lutuk ringawt mai a. Amaherawhchu, tuman zu vanga thi a ni tih an ziak duh hauh lova, mahse mi’n kan hre vek a. Chuvangin, heng hi chu kum 4 chhung chuan 5000 te chu, police ringawt pawh 500 rual chu an ni hrim hrim mai a. Chuvangin, khami atanga kan concept-a kan hmuh danah khan chumi chu 5000 ai hian an tam ka ring zan a. Ka hmuh dan chuan, vaitawng takin a tlem thei ang berah kam se kam-a kan assessment-ah 5000 hi chu kum 4 chhung hi chuan a tlem berah an ni hrim hrim tih kha ka hmuh dan a nih avangin khang kha ka lo sawi a ni.

SPEAKER : A aia tam mah pawh hi a rinawm tho e.

PU ZODINTLUANGA RALTE : Speech-a kha correct theih ni sela. Health Department-in zu avanga thi report an neih loh thu tun session-ah an rawn chhang a. Hei hi.. (interruption...)

SPEAKER : Starred Question No.101-na zawt turin Dr. Vanlaltanpuia i lo sawm ang. (.....interruption.....)

Dr. VANLALTANPUIA : Pu Speaker, ka lawm e.

Ka zawhna chu hon’ble Minister Higher & Technical Education chhan atan a ni a. Hei hi niminah khan Budget Speech-ah te khan a lang tawh a. Mahse zawhna hi ka lo zawt tawh laklawh a.

- a) Mizoram Engineering College, Pukpui Arsi rama sak mek hi engtikahnge class tan theih a nih ang ?
- b) Tun dinhmunah class tan thei turin sorkar a inbuatsaih fel tawh em ?

SPEAKER : Aw le, chhang turin changtu Minister zahawm tak Dr. R Lalthangliana kan sawm e.

Dr. R LALTHANGLIANA, MINISTER : Pu Speaker, member zahawm tak Dr Vanlaltanpuia zawhna:

- a) Mizoram Engineering College, Pukpui Arsi ram ami hi class tan theih hun tur tak sawi chian theih a la ni lo.
- b) Tun dinhmunah class tan thei turin sorkar a la inbuatsaih fel lo.

Ministry of Human Resource Development lama RUSA thuneitute duh dan chuan RUSA hnuaiia New College (Professional) sak zawng zawngte chu kum 2019-2020 academic session atanga class tan tur ni mahse class tan hmaa tihfel hmasak ngai approach road siam that, electric connection leh transformer dah te leh water connection te bakah thawktu lak te pawh tihfel ngai a la nih avangin building mamawh zualpui 8 chu sak zawh tawh niin class tan erawh chu a la tih theih rih loh a ni. Hei hi Pu Speaker, nimin lamahte khan kan sawi nual a. Prime Minister khan a rawn hawng a, digital launching a rawn ti kha a ni a. India ramah 150 hetiang ang chi hawi zawng project kan neih kha. Chuvang chuan sorkarin ngaihtuahna a seng mek a, tunah hian Finance-ah te pawisa kan dil a. Electrification pawh luhna turte, tui atana mamawhte, faculty quarters turte pawh hi kan mamawh dawn a. Heng bakah hian engemaw neuh neuh thil dang mamawh tam fe sensona tur a awm a. Tin, faculty hi a hautak khawp mai a, la tihfel loh a ni bawh a. Tun academic session hi chu tun mai thla 2/1-ah hi chuan tan ngaihna a awm lo hrim hrim a ni. Nakum lamah erawh chuan engnge kan an dawn a hriat loh a. Hemi chungchangah hian a lawmawm khawp mai a, Assembly-a Subject Committee-II member-ten hmanni lawkah an va tlawh tih kan hria a, anni pawh hian findings mumal tak an neih ka beisei.

SPEAKER : Member zahawm tak Pu Lalduhoma i lo sawm ang.

PU LALDUHOMA : Pu Speaker, Thenzawl-a Horticulture College chungchang hi wawi 2 ka zawt tawh a. A chhanna kan dawn hi a lungawithlak loh dun ka ti a. Saw College saw Mizote tan a ni a, kan mamawh vanga dah kan ni a. Golf Course-te pawh Thenzawl-ah kan nei a, hmun dang daih atangin contract an rawn thawk a, mahse kan ta tur a nih avangin Minister-ten an lo va tlawh a, a

lawmawm ka ti a. Oil Exploration-te pawh kan ti a, foreign company-in an rawn ti a, kan ram tan a ni a, kan tuipui a. Helaiah pawh kan sawi thin a ni. Horticulture College saw tunge a contractor tih ka zawh pawhin a contractor pawh kan hre lo, Imphal Unviversity hnuai ami a ni a, engmah kan hre lo han tih angte kha min chhan dan a ni a. Anmahni hian mak min tih ka ring a, heti khawpa kan interest lo hi. Keini ang opposition MLA lehngal chauhin kan tuipui hi a tawk lo a ni. Tunah 1st year an tan tawh a, admission ti duhte pawh an awm ang, khawia zawh tur nge, tu nge biak tur tih pawh mipuite hian an hre reng reng lo a ni. Horticulture Department hian officer a dah a, engkim an hriatpui a. Mahse, heta zawhna ka zawhin min chhang tha leh duh si lo a. Kan Horticulture College saw hman tangkai tum ila, a feeder institution, high school-te, secondary-te pawh kan neih that a ngai ang a. Kan Minister hian kan tui a ni, kan ngaihsak a ni tih hriat nan a hmunah min tlawh sak ve thei ang em? Tin, physical leh financial achievement percentage-te, 2nd phase turte, engkim mai hi “E, Mizoram chuan min ngaihsak hle mai a” an tih theih tur hian hei aia nasa hian min tuipui thei ang em tih ka zawt a ni.

SPEAKER : Zawhna neitu Dr. Vanlaltanpuia kan sawn ang a, chumi zawhah Dr. Vanlalthlana lo ding nghal se.

Dr. VANLALTANPUIA : Pu Speaker, ka lawm e. Higher & Technical Education changtu Minister zahawm tak khan a sawi tawh a. Kan Prime Minister khan kumin kumtir khan India ram pumpuia hetiang scheme kalpuiho hi a hawng tawh a. Kan state hi kan tan a ngai hlein ka hria a. A chhan chu kan education system-ah hian technical education lam hi a la hniam hle a. Pu Speaker, College te, University te hi conventional takin, tihdan phung ngai tak angin a kal a, chu chuan hna min pe thei ta lo a ni. Nimin budget speech-ah khan ka sawi chhuak nghe nghe a. NIT kan tih National Institute of Technology hi kan nei a, kum 8 lai a ni tawh a, Technology institute kan neih chhun a ni a. Amaherawhchu, hma a la sawn lo em em mai a, kum 8 hnuah hian campus mumal pawh an la nei lo a. Tin, hei hi Engineering College, Mizoram a neih chhun tur a ni a. Central lam atang chuan ₹ 26 crores lai kan hmang tawh a. RUSA-ho pawh khan an recurring fund tur kum 1 atana an sum mamawh tur ang chite an rawn chhut chhuak a, file pawh kha a kal a. Kan CM zahawm tak hnenah pawh khan kan thlen tawh a. Kha kha khawngaih takin rang taka hma min lo lak sak theih chuan kan lawm hle ang. He zirna hi Mizoram a mamawh tak tak a nih avangin kan CM zahawm tak leh Finance Department

changtu ni bawk hian min lo hriatpui se ka duh a. Nakumah hian kan tan thei ang em tih hi kan zawt leh hram teh ang.

SPEAKER : Member zahawm tak Dr. Vanlalhlana.

Dr. VANLALTHLANA : Pu Speaker, ka lawm e. Mizoram Hindi Training College-ah hian (ka zawhna hi hnung lampangah hian a awm a, zawhbelhnaah hian ka han zawt mai ang a, kan zawt hman dawn si lo a) GFR, General Financial Rules, 2017 emaw, 2005 anga account siam a ni em tih hi ka zawt duh a. Nikhat kal lo tante khan ₹ 300-te fine a ni thin a, a chang chuan ₹ 500-te a ni thin a. Hei hi accounts-ah te a lut em? Khawiahnge a luh tih te. Tin, Agra Enrichment Course kalna atan fund dawn a ni a, pakhat tan ₹ 2,650 an dawng a. Amaherawhchu Principal hian zirlaiteah ₹ 1,500 chauh a pe a, tun hnaia an buai chhoh tak avangin ₹ 1,100 pek tumin zirlaite a ko khawm a, ama naute an ti deuh mai a, chung mite chuan 5 velin an sign a, an la a, a bak zawngin an la duh lo a. Chung chu sorkar hian a hriatpui em?

SPEAKER : Zawhna a inpersan hlawm a. Engineering College atangin GFR zawng zawng nen. A chhan theih theih ang chhang turin Minister zahawm tak kan sawm e.

Dr. R. LALTHANGLIANA, MINITER : Pu Speaker, member zahawm tak Pu Duha zawhna kha Horticulture lam kha ka portfolio a ni lo va. Amaherawhchu a thu phung chuan sorkar hmasa hunlaia thil an lo tih kha a ni a, thil tangkai tak pawh ni turah beisei ta ila. Enfel hrim hrim kha chu kan sorkar hi chuan tul a tih ka ring a, a pawimawh a. Hetiang professional college kan tih ang chi hi Mizoram-ah kan nei tlem em em mai a, an la enzui zel turah ngai ta ila tih kha ka chhanna ni se. Ka portfolio lam a ni chiah lo deuh a, min hrethiam se ka duh a. Engpawh ni se, kei pawhin ka hriat ve hrim hrim kha a thain ka hria a (**PU LALDUHOMA** : Pu Speaker, tu portfolio nge ni ang, Higher lamin an chan loh chuan? Horticulture nge ni dawn a...) Horticulture ni turah ka ngai deuh. (**PU LALDUHOMA** : Khangte kha an chian deuh loh chuan) Kan Chiang lo deuh a ni. (**SPEAKER** : A bialtu ber pawhin a contact tur pawh i hre lo a ni a) Heng hi chu Pu Speaker, House pawn lam atangin lo enzui turah ngai ta ila. Consultative Committee te pawh khan heng ang tak te pawh hi transparent deuhin inpawh tlang deuha kan la en te pawh kha a that ka ring khawp mai a. Zawhna tlema inpersan deuh hlek kha a

awm a, vawiinah Starred Question 113 na kha Dr.Vanlalhlana khan a nei a, kha kha a thlen hman loh a hlauh avanga rawn zawt niin ka ring a, Pu Speaker, i remtihain a zawh takah chuan chhan mai pawh kha a harsa chuang lo a, chhan sak mai ila a that ka ring a.

a) Mizoram Hindi Training College hian General Financial Rules angin account an enkawl em tih chhanna chu – Mizoram Hindi Training College hian General Financial Rules angin account an enkawl e tih chu ka chhanna a ni a.

b) MHTC Principal hian Agra-a Enrichment Course kalna tur sum a lo pawh pen leh pen loh chungchang hi sorkar-in Preliminary Enquiry la in a chhui mek a ni. Report kan la dawng lo a; tin, thil eng eng emaw khilai ah khian fel tawklo, hnawkhna deuh te pawh a awm a ni mai thei a. Chu chu a chhui tur hian an chhui mek a, khami peihfel hunah report mumal deuh hlek kan inpe thei turah ka beisei tih kha ka chhanna ni se. Zawhna neitu thahnemngaihna kha keipawhin ka tawmpui khawp mai a, a bik takin chhim lamah hian hetiang professional kan tih te; tin, Management Institution kan tih ang hi kan neilo khawp mai a. Chuvang chuan ngaipawimawhin tuna sorkar kal mek pawh hian theihtawp chhuah kan tum a ni tih ka sawi duh a. Amaherawhchu nakum session-a class kan neih hman tur leh tur loh lai kha chu, sorkar hian an mamawh, nichina ka sawi electric atan ringawt pawh khan sum tam fe a la ngai dawn a. Tin, Lunglei khawpui atangin a hla a, kilometer 6 vela ni a. Tin, Kawmzawl helipad atang pawh sawn kilometer 3 dawn lai a ni. A approach road kha a mumal lo hrim hrim a, hmannah ka va kal a, fur ah chuan motor a kal theih ka ring lo a. Tin, chumi kawng chu kan siam that a ngai a, crore engemaw zat a ngai dawn a. Tin, hemi piah lamah tui tihna tur hi a hautak hle dawn a, ruahmanna pawh department lam chuan a nei mek a. A vai hian crore 10 dawn lai ala ngaih hmel mang e aw tih a ni.

Chumi piah lamah chuan zirtirtu tur te kha lak a ngai dawn a, post create a ngai dawn a, khang kha government of India lamin an rawn tum si lo a, state sorkar-in kan tih tur vek mai kha a ni a. Hetah administrative building te, class kalna tur ang chi te, hostel te leh thil dang chu an rawn pawm mai a, library te leh cafeteria te leh thil dang kha an sa a. Amaherawhchu a bak kha kan kutah an dah a ni, kha kha a buaithlakna lai tak kha a ni a, chu chu thil awm dan House-ah hian kan sawi zing tawh a, Chiang leh zual ta ila. Khang zawng zawng kan inpeih chhuah hun kha

nakum session tan hun nen a innan theih dawn chuan tan hma hi chu tul kan ti khawp mai a. Theihtawp sorkar-in kan chhuah ang tih kha ka chhanna ni mai sela , keipawhin a hmun hma te ka hriatchian leh tul kan tih em em hun lai takah te pawh an dah niin ka hria a, a lawmawm a. Engpawh ni se hei hi chu kan la enchho zui zel ang a, Assembly committee in a report te pawh kha nakinah ka la dawng turah ngai ta ila. Heng Assembly report te pawh hi Minister concern-in report mumal tak a pek hunah, a copy te han nei nghe nghe turin beisei ta ila. Chu chuan tlemin kan action ti mai ila, kan hma lakna tur kha a ti kal chak te pawhin beisei ila a tha ang e. Ka lawm e.

SPEAKER : House leader i lo sawm ang.

Pu ZORAMTHANGA, CHIEF MINISTER : Pu Speaker, ka lawm e. Ni e, kei tuna zawhbelhna in ka department chan te pawh engemaw ti kawnga han connect thei tho a nih avang khan han sawi belh a tha in ka hria a. Tin, a zawttu te pawh khan an phut ang tih ka ring a.

Pakhatna a hmasa zawk ami Pu Duhoma zawhna han belh lawk ka duh chu Thenzawl-ah Excise outpost te kha in dah belh thei ang em tih kha, hetah hian nichina kan post siam belh chungchang thu kan zawhna connect-ah khan House-a ka sawi duh chu, tunah hian post siam belh, fill up tur leh a thar pawh siam tur hi a tam em em a, kan sawi tawh a. Chung chu a zawnga za chuan vawi khatah a tih theih dawn loh a, ka rilru a ka neih dan chuan DP & AR te; tin, Finance te kan Chief Secretary hovin a department concern nen eng ang post ruak nge an neih? Enge an mamawh zual, a vawi khatna first phase-ah kan tih theih chin kan sum dinhmun nen session zawhah en ila. Tichuan Excise lamah pawh an rawn dil ang chu an mamawh ang chu a tam a, mahse, vawi khatah han pek burh chu kan la ngam si lova. Chuvangin khang te pawh kha kan ngaituah belh a, he post thar siamna tur atan an mamawh te pawh thlir chungin Excise lamah pawh kha a thawktute lak belh kha kan ti ang a. Tin, Department dangah pawh kha kha a dawta kan hna pawimawh tur hi a ni a, kha kha a in connect na ah kan sawi a.

Tin, sawlaia kan Horticulture College ve chu a dik khawp mai a, keipawh ka la Chiang Tam Vak lo a, heng hi keimahni a tir atanga dinnaah khan idea kan neilo ang reng khawp mai a. A laklawh ah tiang hian kan han hria a, amaherawhchu zawhna lo kal ah pawh heng hi Mizoram chhunga a department concern ten kan

subject a nih loh vangin kan hre lo e, tia an chhan pawh file-ah ka lo correct a, Telephone-ah zawt ula, Imphal lam pawh a zawh theih a, chuvangin information a theih ang ang lo la khawm rawh u tiin, correction-in file pawh ka return a. Chumi hnu ah a lo la chhuak leh lo a, zawhna dang lo kal leh te pawh a contractor chu, sawta mi saw an ni e tih nen a lo kal tawh a. Kha kha chu department lam pawhin kan information neih theih ang ang kan lo dap mek e tih ka sawi duh a. Tin, member zahawm tak Pu Duhoma sawi kha a dik a, kan ram chhunga dah a ni tlat a, kha kha kan hriatpuia kan tih tur a ni a. Keini lam pawhin kan lo en ang a. Tin, Higher & Technical Education lam subject an ni em tih leh Horti subject a ni em tih lai kha tlema tih felna kan lo la nei chiah lo a. Engpawh ni se a hminga House Leader niha, CM nih chuan kan mawh vek tho a ni a, khang kha chu ka lo en ang a, a tul angin tha tak leh fel taka a kal theih nan kan lo thlir pui ang tih ka sawi duh a.

Tin, NIT thua khawp khuti khawpa thil tha leh hmalakna tha a awm a. Amaherawhchu, information ka dawnah harsatna an neih chu Forest Department-in, 'clearance in lak a ngaihna lai a awm,' an ti tlat mai a. Chu chuan hna a ti chawl a ni an ti a, kha kha Forest Minister pawh ka sawipui tawh a, chuti ngawt theih a ni lo. Chuti lo chu kan forest neih dan pawh hi tunhma District Council-in lui kam tawn, both sides of the river pawh ti lo va, either side of the river, half mile tih vela tih mai maiin a khatia tih chu. Khang District Council awm hma, khua leh ram lo nei tawh kha zuk chhuhsak ngawt theih a ni lo a. Chuvangin, forest ramah in awm tia Hortoki khua zawng zawng sawn thar ngawt theih a ni tawh lo reng reng, lui kam a awm kha. Chuvangin, khatiang te a nih avang khan en chian a ngai a. Forest Department pawh he objection hi kan chinfel theih thuai a ngai, compensatory forest lam te a ngai a nih chuan chu pawh chu kan dap ang a. Kan NIT hi hlawhtling ngei tura a rang thei ang bera hma kan lak a ngai a ni, tiin a hrih pawh ka lo hrih tawh a. Hei hi chak taka umzui zel pawh kan tum e.

S P E A K E R : A lawmawm e. Tunah chuan Starred Question No. 102 na zawt turin Pu Vanlalhlana kan sawm e.

Pu VANLALHLANA: Pu Speaker, ka lawm e. Starred Question No. 102 na, Minister zahawm tak Printing & Stationery Department changtu chhan atan ka zawhna chu :

- a) Printing & Stationery Department atanga office mamawh lam hi Department engzat nge awm ?
- b) Department te hian an office mamawh hi Printing & Stationery Department atang hian lam tur a ni em tih ka zawt e.

S P E A K E R : Chhang turin a changtu Minister zahawm tak Pu Lalchhandama Ralte kan sawm e.

Pu LALCHHANDAMA RALTE, MINISTER : Pu Speaker, ka lawm e. Member zahawm tak Aizawl North I bialtu Pu Vanlalhlana zawhna chhanna chu:

- a) 2018-2019 chhungin Department 44-in office mamawh an lam.
- b) Stationery & Allied items hi centralized leh decentralized item-a then a ni. Centralized hi Department ten Printing & Stationery Department-ah lam tura ngaih an ni.

S P E A K E R : Pu C. Lalsawivunga kan sawm e.

Pu C. LALSAWIVUNGA : Pu Speaker, ka lawm e. Kha chhanna kan hria a, khata tanga ka han zawh duh chu – tunhma lam deuh khan sorkar atangin heng stationery te hi Printing & Stationery atanga an mamawh te lam tura tihna kha a awm thinin ka hria a. Kha kha la kalpui zel a ni em tih leh Printing & Stationery Department hi tun aia changtlung zawka kalpui tum a ni em tih kha ka zawhbelhna a ni e.

S P E A K E R : Member zahawm tak Pu Lalchhuanthanga kan sawm e.

Pu LALCHHUANTHANGA : Pu Speaker, ka lawm e. Stationery & Allied item te hi Department hrang hrangte hian Printing & Stationery dawr tur a tih a ni a. Hemi chungchangah pawh hian sorkar hotu liante pawh hian tum tam tak order an tichhuak tawh thin a. Mahse Printing & Stationery item, an depot atang hian a hming deuh mai mai hian an dawr thin a, an major requirement hi chu an dawr ngai lo a ni. Chuvang chuan, kum tin hian bungrua dah chhiat, expire hi a awm thin a. Heng stationery item te hi thil delicate tak tak an ni hlawm a, expire thei te an ni a, glass item te an ni a, tam tak hi dah chhiat leh expire hi a awm thin a, sorkar hian hetah hian sum tam tak hi a seng ral thin a ni. Chung chu kan Minister te pawh

hian enfiapui deuh se a tha awm mang e aw ka ti a. Pu Speaker, ka zawhna chu Printing & Stationery Depot-ah hian tun dinhmunah eng zat hu nge Stationery & Allied item te hi an stock tih a ni e.

S P E A K E R : Pu Hlana ai hian Pu Duha hi a phar hmasa a. Mahse, Pu Duh, i kian mai dawn em ni zawhna neitu hi? Aw le, zawhna neitu i sawm ang.

Pu VANLALHLANA : Pu Speaker, ka lawm e. Demand bu a a lan danin department 49 Mizoram sorkarin kan nei a. Tuna kan Minister in min chhan danah khan Department 44 hian Printing & Stationery Department a dawr thin tihna a ni a. A dang department 5 hian an dawr ve ngailo tihna a ni ta a ni. Heng department dawr ngailo te hi eng department nge ni a, engnge an dawr loh nachhan tih lai kha kan Minister hian min hrilh thei em aw?

S P E A K E R : Chhang turin a changtu Minister zahawm tak Pu Lalchhandama Ralte kan sawm e.

Pu LALCHHANDAMA RALTE, MINISTER : Pu Speaker, member zahawm tak Aizawl South I bialtu Pu C. Lalsawivunga zawhna kha - sorkar department hrang hrangte Printing & Stationery dawr tura hriattirna kan neih te engtinnghe hei aia tihchak dan tur leh an dawr ngei theih dan tur hmalakna te tihah khan theihpatawpin department ang chuan Office Memorandum te, Cabinet Sub – Committee-in a neih ang te sorkar department hrang hrangah kan inhriattir a, dawr ngei tur pawhin kan inngen a. Tin, hei hi Finance Secretary kaihhruaina hnuai atang pawhin department te hnenah a hriattirna leh he Committee-in hma a lakna bawhzuina pawh hi kan nei a. Hun dang ai chuan department te pawh hian min dawr tha sawtin hmasawna te pawh a lawmawm kan ti a. Kan department atang pawh hian engemaw zat hi profit, heng stationery atang te pawh hian kan nei ve mek a. Kan la beisei sang chho mek zel tih kha ka chhanna ni mai se la.

Tin, Aizawl South II bialtu zahawm tak Pu Lalchhuanthanga zawhna eng zat ang hu nge stock kan neih mek tih kha. Tunah hian Aizawl Depot-ah hian vaibelchhe 3 man hu vel stock neiah kan inngai a. Lunglei Depot-ah hian nuai 80 man vel leh Saiha-ah nuai 50 man vel nei turah kan inngai a. Hei hi rinthu a ni lo thei lo va. A chhan chu thil a indelh thuah hnem ve tawh a. A then hi a lo chhe ve bawh a. Kan sawi ang khan kan depot te pawh duh angin a lo phui tawh lo va. Kan

han hralhchhuah dawn pawh hian engemaw zat hi chu a lo indelh chhia in eichhetute'n an lo eichhiat ve te hi a awm ve bawk thin a.

Tin, zawhna neitu Aizawl N I bialtu MLA zahawm tak Pu Vanlalhlana zawhnaah khan department 49 vel kan neihah 44-in Printing & Stationery Department dawr a ni a, a dawr lo department-te hi engte nge tih a ni a. Keiniah hian kan ziah dan leh department kan neih zat, tuna kan sawi kha a inang chiah lo deuh a. Chumi chu department dawr lo list kan neih hi keini chuan 13 kan kawl thung a. A chhan chu KVI Board-te hian a hranpain min dawr a, autonomy hrang nei ve, Industry hnuai a awm ni si, mahse a hranin min dawr bawk si a.

Tin, Sinlung Hill Development Council-te pawh GAD hnuai an ni chungin autonomy hrang deuh an nei a, min dawr tho avangin dawrtu list-ah kan ziak a. Youth Commission pawh LESDE hnuai a awm an ni a. Khatiang deuh khan department peng hrang min dawrtute pawh kha kan ziak a, kha kha 44 an ni e kan tih kha a ni a. Tunah hian zawhna chhanna department 13 min dawr lo-te hi House information atan Pu Speaker, rem i tih chuan ka chhiar chhuak dawn em ni? (SPEAKER : An zawt che a, i chhan theih chuan a lawmawm khawp ang).

Pu Speaker, tun dinhmuna Printing & Stationery Department atanga stationery la lo kan neih mekte chu- AH& Vety Department, Land Resources & Water Conservation Department, Art & Culture Department, I&PR Department, Tourism Department, Sericulture Department, GAD, ICT, Minor Irrigation, PAD, Political & Cabinet Department, Soil & Water Conservation Department, Vigilance, SAD-te an ni e. (*Interruption*- Anmahni dawr turin in ti thei em?)

SPEAKER : Minister-te kha in awm thep thup bawk a, dawr turah i ngai ang u. Hei hi Pu Ngura chan a nih lai leh Minister zahawm tak a nih lai pawh khan a sawi thin a, thahnem a ngai thin khawp mai. Starred Question 103-naah kan kal ang a. Er. H. Lalzirliana, member zahawm tak ka sawm e.

Er. H. LALZIRLIANA : Pu Speaker, ka lawm e. Zawhna 103-na Irrigation & Water Resources Department changtu Minister zahawm tak chhan atan:

- a) Mamit District chhungah hian Irrigation office set up tumna a awm em?
- b) Awm ta se, engtik hun velah nge office a function theih ang?

SPEAKER : Chhang turin Minister zahawm tak Pu C. Lalrinsanga kan sawm e.

PU C. LALRINSANGA, MINISTER : Pu Speaker, member zahawm tak Mamit bialtu Er. H. Lalzirliana zawhna chhanna chu:

- a) Mamit District chhungah Irrigation Office hawn tumna a awm.
- b) Proposal hi buaipui mek chauh a la nih avangin office a function theih hun tur sawi theih a la ni lo tih ka chhanna a ni e. Ka lawm e.

SPEAKER : Dr. K. Pachhunga a phar hmasa tlat mai.

Dr. K. PACHHUNGA : Pu Speaker, ka lawm e. Ka bial chhung Hrangechalkawn-ah hian Irrigation Department-in ram to takin a lei a, building leh quarter-te a sa vek a. Nimahsela, sorkar kaltaah khan Rahsi Veng-ah mi in an luah daih mai a. Hei hi khawngaih takin sorkar tharah hian pawisa renchemnate pawh a ni a, an building, an ramah ngei lo let leh se a theih ang em?

SPEAKER : Dr. F. Lalnunmawia. A la zawh theih chiah chiah.

Dr. F. LALNUNMAWIA : Pu Speaker, ka lawm e. Ka zawhbelh duh chu- Ka bial chhung Sialsuk-ah sawn Irrigation Sub-Division hawn tumna a awm em tih a ni a. Khawtlang-te khan engemaw lai khan sorkar-ah an dil a, Department atangin ngaihtuahna hman mek a ni tih kha an sawi a. Tunah hian ngaihtuahna hman chhonzawm zel an tum em tih kha Minister zahawm tak ka zawhbelh a ni e. Ka lawm e.

SPEAKER : Zawh belhna a tawp tawh tlat mai. Question Hour a tawp a, zawhna awm sa kha chhang hram se kan ti a, chhan tir mai ang aw? Han chhang se.

PU C. LALRINSANGA, MINISTER : Pu Speaker, Lunglei 'S' bialtu zahawm tak zawhbelhna kha Irrigation Department hian sorkar hmasaah khan Hrangechalkawn-ah sawn hmunhma chu neiin hun rei tak luah a ni a. Amaherawhchu a hmunhmate a hlat avangin mipui tan han indawr turin lamte a hla baw si nen, khatiang khan sorkar hmasa khan Lunglei lamah an sawn phei a. Chutiang chuan Lunglei lama sawn phei a nih hnu khan vanneihthlak takin Agriculture Department-in hmunhma an lo neiin kha Irrigation tan sahthlak a ni a.

Chulai hmunhma chu tunah hian ruahman tumna neih a la ni deuh deuh zawk a. Engpawh ni se, tuna ka chhanna ang khan tuna Hrangchalkawn hmun saw kan hmunhma, a tira kan lo luahna chu a ni ngei mai a, mahse, a hmunhmate a hlat avangin a dawrtu te tan mipui kal zung zung har te a lo ni a. A dawrtu turte mi harsa te te an lo nihna chen a lo awm a. Chuvang chuan heihi chu tun dinhmuna kan han thlirna zawn atang chuan tun maia han sawn leh chu a remchang lem lo turah ka ngai a. Tin, chumi piah lamah chuan tuna a hmunhma kan lo neih, Agriculture hmuna kan neih saw a lehlamah chuan sorkar hmasa khan Education Department nena ram inthleng tur angin ruahmanna lo kal tawh a la awm ta deuh deuh lehngal a. Tuna SDO hmunah sawn engemaw remchan zawkna avanga High Powered Committee te remsiamna angin market shed siamna tur atan ruahman a nihna anga khami insiam remna tur atan khan Education Department leh Commerce & Industries lam te nen inremsiam in khatiang khan Education Department ram nen inthleng te a la ni ta zel a. Chuvang chuan chumi hmun, Education Department hmun kan neih chu tunah hian keimahni department building atan sak tura ruahmanna kal mek a lo ni leh zel bawk a. Chuvangin tuna kan inrelbawlina dan thlirna atang chuan Hrangchalkawn a han let leh kha a lehlamah chuan sorkar hmasa pawhin remchang zawka alo hriatna vang te pawh niin Lunglei South bialtu in duhthawhna avanga let leh se a duhna ang kha chu tun dinhmunah chuan let leh kha a rem mai tawh lo a ni tih kha ka chhanna a ni e.

SPEAKER : Aw le, zawhna leh chhanna hun a zo a, tunah chuan business dangah kan kal tawh ang a. Laying of Papers-ah kan kal dawn a ni. Pu Lalchamliaana, Minister zahawm takin Paper Lay tur pahnih a nei a. Heng Statement of correction on the reply given on the 17th June, 2019 to Starred Question No.51, Ballot No.42 asked by Pu Lalduhoma regarding “ ILP chungchang” tih leh Statement of correction on the reply given on the 20th March, 2019 to Starred Question No.12, which was transferred to Unstarred Question Ballot No.82 asked by Pu Vanlalhlana and Pu V.L.Zaithanzama regarding “Ramri chungchang” tih chu House dawhkanah han lay se, ka sawm e.

PU LALCHAMLIANA, MINISTER : Pu Speaker, i phalna leh he House zahawm tak remtihna Starred Question No.51 na Ballot hnua 42 na lo ni ta, member zahawm tak Pu Lalduhoma'n ILP chungchang a zawhna chhanna siamthatna Statement of correction leh Pu Vanlalhlana leh Pu V.L.Zaithanzama

member zahawm tak ten Ramri chungchanga an zawhna Starred Question No.12 na, Ballot hnu a 82 na lo ni ta chhanna siamthatna, a chhanna chu March ni 20, 2019 khan thehluh tawh a ni a. Chumi siamthatna Statement of correction chu he House zahawm tak dawhkanah hian pharh ka rawn dil e.

SPEAKER : A copy kha han sem ula. Kan Minister zahawm tak lo ni tawh thin pahnih vawiinah kan vui dawn a. Member te pawh an kal hlawm nual a, hei hi inhriatthiamna zau tak pawh kan neih a tha awm e. House pawhin kan ui em em a ni. A copy kan chang kim em ? Kan chan kim chuan tunah pahnihna Pu Lalruatkima, Minister zahawm takin Statement of correction on the reply given on the 20th March, 2019 to Starred Question No.123 which was transferred to Unstarred Question Ballot No.78 asked by Pu Lalchhuanthanga regarding “Brigade ram Bawngkawn” chu House dawhkanah lay turin kan sawm ang a. Nichinah kan sawi tawh angin ani hi chhiat an tawh avangin a ai Dr. R.Lalthangliana a awh tir a ni a. Tunah Dr. R.Lalthangliana House a lay turin kan sawm e.

Dr. R.LALTHANGLIANA, MINISTER : Pu Speaker, i phalna leh he House zahawm tak remtihain Statement of correction on the reply given on the 20th March, 2019 to Starred Question No.123 which was transferred to Unstarred Question Ballot No.78 asked by Pu Lalchhuanthanga regarding “Brigade ram Bawngkawn” hi he House-ah ka rawn lay e.

SPEAKER : A copy kha sem ni se.

Kan changkimin a lang a. Tunah chuan financial business-ah kan kal leh tawh ang a. Vawiin hian kan Minister zahawm tak pahnih te, Pu C.Lalrinsanga leh Dr. K.Beichhua te demand kan sawiho ang a, pass nghal kan tum leh dawn a ni.

Tunah Minister zahawm tak Pu C.Lalrinsanga kan sawm ang a. Demand no.31, 37 leh 47 te House dawhkanah rawn submit se, rawn chhawpchuak se, i lo sawm ang.

PU C.LALRINSANGA, MINISTER : Pu Speaker, Governor recommend-na leh i remtihain ka Demand no.31, 37 leh 47 te, a pawisa in ₹ 230,45,43,000 hi he House zahawm takah hian ngaihtuah turin ka rawn thlen e.

Demand detail in:-

- 1) Demand no.31, Agriculture - ₹ 1,73,68,03,000.

- 2) Demand no.37, Co-Operation - ₹ 17,09,18,000.
- 3) Demand no.47, Irrigation & Water Resources - ₹ 39,68,22,000 a ni e. Ka lawm e.

SPEAKER : Tunah Dr. K.Beichhua, Minister zahawm tak Demand no.7, 29, 34 leh 41 te hi House dawhkanah rawn chhawpchuak leh se, i lo sawm ang.

Dr. K. BEICHHUA: Pu Speaker, on the recommendation of the Governor of Mizoram and with your permission, I move the Demand nos.7, 29, 34 and 41 for ₹ 2,84,81,77,000 only for meeting expenses during 2019-2020 in respect of the following departments:-

- 1) Demand no.7, Excise & Narcotics - ₹ 43,78,29,000
- 2) Demand no.29, Social Welfare - ₹ 1,50,60,50,000
- 3) Demand no.34, Animal Husbandry & Veterinary – ₹ 69,33,31,000
- 4) Demand no. 41, Sericulture - ₹ 21,09,67,000. Thank you.

SPEAKER : Aw le, kan minister zahawm tak pahnih ten an rawn submit ve ve ta a. Kan sawiho nghal leh ang a. Nimina kan tih ang khan 10 minutes ang khan kal leh mai ila a tha mai lawm ni? Le, tunge sawi hmasa ang? Vawiin chu zawh hma pawh a theih ang a. (Pu C. Ngunlianchunga – Pu Speaker, vawiina thil thleng hi Mizoram a thil la thleng ngailo, Ex-Minister pahnih vawiinah an ruang vui a ni a. Kan Speaker i thu ber mai a, he House hian rem a tih chuan sawihona hi chawhnu dar 2 ah khan sawn mai ila. Khami ah khan pass mai se la. Hei tunah pawh kan House hi a ruak deuh huai mai a. He thil hi Mizoramah a thlen leh tawh pawh ka ringlo a, tun hi a vawi khat thlenna a ni a, a zahawm hle mai tih kha ka han rawt a nih chu, a theih em ka hrelo a.)

Member zahawm tak a ni a, amaherawhchu, in Whip, party theuhin in sawi ka ring a. House hi a zahawm a, House kalphung kan tihdanglam hi chu a chi lovang a. a awm em em nachungin. Kal tlang ta ila, a sawitu kan tlem pawhin vawiin chu kan inhrethiam tho ah ngai mai ang. A pangngaiin kal tlang mai ang aw.

A kal tur te kan insiam hlawm kha mawle a then chu. Hei a then chu hmun nghak tur te kan insiam a. In nih ve tho ka ring e. Khai le, tunge sawi hmasa ang le?

Pu L.Thangmawia, member zahawm tak i lo sawm ang.

PU L.THANGMAWIA: Pu Speaker, ka lawm e. Vawiiina kan Demand sawiho tur te hi Mizoram economy inngahna department pawimawh tak tan te an ni a. Sawi tur pawh tam tak a awm thei ang a, amaherawhchu i veilam ami te pawhin an rawn sawi ang deuh khan kan Minister zahawm tak lo ni thin pahnihte thlahliamna ni a nih avangin sawihona pawh hi kan lo ruahman lawk leh kan lo beisei ang a awm thei dawn lo erawh chu a uiawm khawpin ka hria. Agriculture bik angah te hian sawi tur tam tak a awm thei ang a. Hei hi kan House Leader zahawm tak pawhin a tuipui a ni a, sorkar hmasa atang tawh pawhin a ni a. Opposition lai te pawhin a thusawi wawi tam tak kan lo hriat a ni a. Mizorama leilet awm thei ang chi te, potential area zawng zawng hi tun sorkar chhoah hian buh thar theih nan leh thil dang thar nan tih kha kan tum chhoh tur a nih hmelin ka hria a. Nakinah a wind-up naah te pawh kan Minister zahawm takin a rawn sawi ang a.

Agriculture hi kum tam tak a lo kal tawh a, Mizoram hmun tam takah potential area tam tak a awm a. MNF sorkar hmasaah khan Champhai-ah te pawh leilet te hmel thar kan hmu a. Tin, khawl tam tak engemaw zat te pawh kha hman chhoh a ni bawk a. Khatiang chi deuh khan potential area dang hi kha aia na zawk deuh khan (kan budget te pawh a lo tam tawh bawk a) tih theih dan a awmin ka ring a. Ka bial angah te pawh khian Tuisaphai-ah ringawt pawh khian ka bial buhfai mamawh hi chu a thar theih a. Tin, khang phai ni mai lo deuh phai kan han tih te; tin, Tuiphal te leh Tuivai kam te thleng pawhin potential area tam tak a awm a ni. Hetiang zel khan bial dang chu ka va hre vek lo va Mizoramah hmun tam tak a awm ang a, heng hi eng project based-in nge niang, tuna kan budget thar han en hi chuan a cover vek seng rih dawn lo chuan a ang na in, tun kum 5 chhung chho hian hemi lam hawi chho thei tur hian kan Minister zahawm tak te pawhin hma la chho se a that ka ring a. Tin, buh mai bakah hian thlasik thlai han tih theih ang chi te leh Mizoram-a kan intodelhlohna hrang hrang ang hi engtinngae awmze neia hma kan lak theih ang tih hi ka rilruah a lian a Pu Speaker, chung te chu vawinniah kan sawi lang tel duh a. Tin, heng hlawhtlinna atana pawimawh em em mai hi Minister zahawm takin a chang kawpa co-operation movement hi kan tih len a ngai a. Thil an rawn zawrh thin hi ka lo en thin a, khaw thenkhat hi chuan mimal theuh mai hian an rawn thawn thlaa, a la tur Aizawl lama lo dawngsawng tur pawh kha a hranpa theuha an

zawn a ngai a, khatiang ni lo khan co-operative movement hi han chak chho se la. Khami khuua thlai thar pakhat emaw hralh tur engemaw kha society board khan buaipui mai se, Aizawl-ah hian a hlawmin a rawn kal thei ang a, mimalin a kal man a hrang hranga an sen tam tak pawh kha a ti tlahniam duai dawn a, hemi pahnih hi kal kawp ngei ngei tur a niin ka hria, Agriculture leh Co-operation te pawh hi.

Tin, Irrigation & Water Resources pawh hi hma kan lakna a rei tawh a, amaherawhchu outcome hi en a hun tawhin ka hria. Tuna kan hmalakna chinah hian eng ang chiahin nge leilet neituten an tangkai pui, kan sum hman tawh dan han en hian an tangkai pui dan hi kei chuan ka va sawi mai thei lo na in, a chuti teh ual lo em ni aw tih theih tur a ni ve deuh hian ka hria a, hei hi ennawna kan sum hman tawh te kha lo neitu engzat chiahin nge tangkai pui, engzatin nge an thar hlawk tih hi. Entirnan Ngopa-ah te pawh khian a building hi chu an han sa tawp mai a Irrigation hian, amaherawhchu office nghaktu an awm baw lo va, engatana hman tur nge tih kha a hriat loh a. Hmanni ka chhohin ka tlawh a, khatiang khan department pawimawh tak ni si hi department dang nen an co-ordination te Agriculture te, Horticulture te nena an co-ordination te hi enchian deuh hleka kan sum hman ngai rengah hian tun aia tha zawk hian a kal theih em tih te en a hun viau tawhin ka hria, chungte chu kan Minister zahawm tak khan min lo chhinchhiah sak thei se a duhawm khawpin ka ring.

Tin, Minister zahawm tak Dr.K.Beichhua chan lam pawh hi hun a tawi a kan hrut thuak thuak ang a. Excise & Narcotics hi sum la lut lo zawng hian kan han kal dawn chu a ni ta deuh a, tunah a chuan a seng zawng hlir deuh a ni dawn a. Mahse department pawimawh tak ni baw si hi, tunah hian zu khap burna dan kan han ti chho va, hei hi kohhran leh mipuite duh dan a ni a. Tin, kan party Manifesto te pawh a ni a, tunah hian rang taka kan tihlawhtling te hi a lawmawm viauin ka hria a. Hetah hian inter-state border kan han tih chi leh a pawimawh lai deuhah phei chuan, Excise check-gate-te pawh hi tun aia kan tih tam a ngaiin ka hria a. Ka bialah te pawh North-East Khawdungsei te hi dry area-ah zu khap burna dan hman a nih hma pawh khan an lo puang a, tlawmngaiin tam tak duty thinin zanah te inter-state atanga Manipur road atanga zu lo lut tur te pawh an lo check thin a. Chu chu Khawawn piah Tuivai-ah te hian tlaivar zak zakin an han ti thin a ni, khilalah te khian Excise check gate te hi a la awm lo reng reng mai a, tunah hian free takin a phurh theih ringawt mai a ni. Ngopa-ah police check gate a awm a, chumi thlen hma chuan thil

tam tak kha a thleng hman thei a ni, chu chu example atan karawn sawi duh a. Hmun dang pawh inter-state leh international border te a la awm ka ring a, hei te pawh hi identify chian deuha, ruitheih thil lo luh theihna lai hi chu uluk deuh hleka en bik deuh theih ni se, a tul chuan khawpui ami pawh kha han pawhchhuah sak theih ni se a duhawm khawpin ka hria . Chutih a nih loh chuan arawn luh tawh hnua, thuhruk tawh hnua inzawnchhuah sak leh hi chu mi khum hnuai va hai hi har tak a ni tih ka sawi duh a ni.

A dawt lehah Social Welfare-ah hian ka kal leh zung zung ang a. Social Welfare hi MLA ka nih hmaa ka ngaih ai daih hian department hi a lo pui a. Department dang kaihhnawih tam tak pawh hi tribal welfare kal tlang hian hemi zirna inkaihhnawihah te pawh dil theih a lo tam mai a, website ah te pawh ka en thuk thuk a. Chuvangin hei hi co-ordination tha deuh hleka department dang nen a kal phei chuan tribal area vek kan ni si a, puitham deuh mai hian Mizoram tan sum hailuhna tur a awmin ka hria a, an ti mek pawhin ka hria a sorkar kal tawh te pawhin. Ka bial kaihhnawih bikah pawh lawmthu sawitur Pu Speaker, a awm a, SRDC area Paite zirlaite tan bik Luangmual-ah Tribal Hostel 200 lakh man thla 5 vel lek kan han sorkar chhung hian Social Welfare Department atang hian kan han hmu nghal ngawt mai a. Hei vang hian kan Minister zahawm tak leh department a hah taka min lo buaipui saktute chungah pawh khan he House zahawm tak kaltlangin lawmthu ka sawi duh a.

Tin, chumai a ni lova idea thar deuh Ngopa-ah khian Youth Development Centre 100 lakh-in kan sa dawn bawk a, Social Welfare atang tho hian. Hei pawh hi kan House Leader zahawm tak leh kan Minister zahawm tak department hrang hrang changtute pawn min lo hriatsak se ka duh chu idea thar a ni a, khawi department enkawl tur ber nge tih pawh chiang chuang lo, he idea-ah chuan khilai area ten skill development hrang hrang computer te pawh a ni ang a, hngang tah te pawh a ni ang a, cement mistiri te pawh a ni ang a, kan sawi vek seng lova puanthui te thlengin, khang an zirtheihna tur center kha kan idea-a awm chu a ni a, chumi hlawhtlin theihna atan chuan department tam tak tanpuina pawh kan la mamawh dawn a, ngaihtuahna te pawh min lo senpui se a duhawm khawpin ka hria. Chuvangin, hei pawh hi Social Welfare pawh hi ngaihtuahna uluk deuha kan hmana, department dang tam takin an chhawr theih tur te a tel a ni tih ka sawi duh a ni, lawmthu sawi pahin.

Tin, zu kan han khap a, tunah hian a effect hi kan tawk chho turah kan ngai deuh hlek a, chungah chuan rehabilitation lamah te pawh kan House Leader zahawm tak thahnemngaihna leh kan Minister zahawm tak thahnemngaihna kan la chho dawn ni te pawhin a lang a, hengte pawh hi chak taka kan kalpui loh chuan kan chhungte pawh an awm ve a, zu vanga buai te leh a dang hi, an buai tawh chuan thil dang kan ngaihtuah thei tawh lo, khawi nge tha ber ang, engtinngae kan tih ang tih hi a ni a. Chuvangin correction centre leh hetiang tihna tur pawh hi a kalpui tur leh kan ngaihtuah tur niin ka hria a, a ngaihtuah niin ka hre bawk a.

A dawt lehah chuan AH & Vety lam pawh hi rawn hrut thwak thwak ka duh a, tun thleng maia sa kan la intodelhlo hi, Burma vawk te kan la lut teuh a, PRRS te a len phah an ti a, inti hre deuhvin. Buget kan en a kum hmasa lama kha vanga thi te compensate na kha 0.5 lakh chauh a niin ka hria a, khatiang khan compensate ngai hial khawpin a awm chho a ni a. Engatinge Burma-ah khatizat lak luh theih awm siin Mizoram-ah a vulh ve theih loh em ni tih hi ka question deuh hlek a, Burma-a an tih dante pawh a tul chuan han zir chiang mai ila. Vawk khatiang zat lak luh tur an neih chuan Mizoram pawh hian thawnchhuah tham hi kan ti thei lo em ni? Thil dang dangah pawh a nih ka ring a, chungte chu ka vei zawng deuh ka rawn sawi tel ni ta sela. Sawi tur tam tak a awm a. Engpawh ni se, thla 6 pawh tling manglo, thla 6 a kal dawn chauh avangin thil tam tak a la tih theih lova, heti chung chung hian kan sorkar-kan mi pawimawh bik zual kan Minister leh department enkawltute hmalakna hi a ropui ka ti a. Hei hi i veilam amite nen Pu Speaker, tawiamna tha tak kan peka, constructive criticism te ang zawnga kan kal chhoha, mipui support-na kan dawn bawk chuan he sorkar tharah hian SEDP kaltlangte, department pangngai hmalakna kaltlangte in vawiina kan demand pass tur department ho atang ringawt pawh hian hmasawna ropui tak kan nei thei dawnin ka hria a, lawmawm ka ti khawp a ni, Pu Speaker.

SPEAKER : Pu Zothantluanga a hmasa zawk e. Chumi zawhah Dr. B.D. Chakma.

Pu ZOTHANTLUANGA : Pu Speaker, ka lawm e. Minutes 10 lek kan nei a. Demand 7 chipchiar taka han sawina hun a awmlon ka hria a, amaherawhchu a pawimawh hle hlawm mai a, sawi tur a tam a.

A hmasaberah chuan Agriculture hi sawi ka duh a. Agriculture hi Mizoram-ah department upa tak a ni a. Kan buh leh bal kan thar chhuah hi mihring kan pun chak ang huin a chak lo khawp mai a. A chhan nia lang chu hah takin kan thawk a, kan buh/bal thar chhuah kha a to si lova, ration-ah Food & Civil Supplies atangin awlsam te in buhfai kan dawng a. A lo kalnate, a subsidised-na te a to dan kha kan ngaituah lova.

Tunah hian kan Supply Minister chak takin kan buh tharte a han lei chho chhin a, a hma khan a hlawk loh avangin Mizo in kan thawk peih lo va, a tam ber ten potential tam tak kan neih laia tlemte kan thawhah pawh hian hlawhfa, a bik takin hnam dang kan hmang a, chu chuan a hlawkna zawng zawng hi an tel a ni a. Tunah erawh chuan WRCC leilet han neiha buh han thar chhuah pawh beiseina hnathawktute ah pawh a lo sang dawn tain a lang a. Kan Supply Minister-in khatiang anga rate thaa a lei sak thei a nih chuan kan production pawh hi nasa takin a lo pung chho thei ang a. Tin, hnam dangte kutah leh hlawhfate kuta dah mai lovin keimahni ngeiin thar chhuah a tum theih dawn niin a lang a.

Amaherawhchu manual labour-a han tih vek hi a harsa em em a, khawilai laiah emaw leilet zau tak taka kan han kal hian an mechanised nasa em em a, manual labour hmang lovin a hmun siam nan te, a leh nan te, a seng nan te, a tihfai nan te khatiang khan thil chi hrang hrang mechanised-in an ti a, chu chuan an production a tipung ang tih a rinawm a. Keini pawh hi kan hotute, kan Chief Minister leh Minister concerned te pawhin an ngaihtuah a, a tam thei ang ber kan mechanised hian kan production hi a pung ang tih ka ring a.

Excise-ah hian han sawi leh ta ila, prohibition-ah Pu Speaker, kan lut chho a, Mizoram chu kan hriat angin inter state boundary-ah kan awm a, kan thenawm ami ten prohibition an ti ve lo va. Tin, international-ah pawh kan thenawmah ram tam tak an awm a, Bangladesh te, Burma te an awm a, anni lamah khan khap a nih si loh avangin prohibition tihlawhtling tur hi chuan a thawktu an tam a ngai a. Tunah hian Excise force an tam lo a ni tih kan hre vek a, chuvangin Excise force man-power kha kan tihpun a ngai

dawn a. Tin, an veivahna tur leh an hnathawhna tur vehicle, transportation pawh kan ngaihtuah belh a ngai dawn a ni tih kan hriat a thain ka ring a.

A mak khawp mai a, a awm lohna hmunah hian awmtirna tur leh supply a awm theihna tur hian mi hi an taima em em mai a. Tin, a hlawk thin bawk avangin chu chuan mi a titaima a, harsa tak ni-a kan hriatna hmun atang hian supply hi a lo awm leh thin a. Ka sawi tawh ang khan Tripura atangin hetah boundary kilometer thui takah kan inri a, khawi lai atang pawhin a rawn lut chho thei a. Tin, hmar lamah ni se Assam ram, prohibition awmlohna hmun atang bawk khan thui tak kan inri a, hmun tam tak atangin a lo lut thei a ni, kha kha kan sawi seng lovang a, Burma atangte, Bangladesh atangtea a lo luh theihna chu kan sawi tawh kha. Khang ang check a, prohibition a hlawhtlin theihna tur chuan man-power kha a pawimawh ka ti a.

Tin, Vety.-ah hian tih tur kan ngah hlein ka hria a, Pu Speaker, Vety. te pawh hi department upa tawh tak a ni a. Chutichung chuan vawkah hian kan intodelh lo va, keimahni local vawk ei duh deuh vek kan ni a, a indaihlo va, kan hmuhna apiang ami ei lo thei lovin kan insiam a. hengah pawh hian khu ka bial chung Tanhril-ah khuan vawk chaw siamna-te a awm a, Selesih-ah te pawh vawk vulhna te a awm a, heng hi mipui mamawhte hnenah hian kan supply hneh lo em em a. Mipui mamawh, a vulh duhtu ten an mamawh phuhruk tur hian hei aia nasa hian hma a lak theih em tih kha kan Minister khan min lo hriat sak sela. A vulhtute hnena vulh tur tam zawk pe thei tur leh supply tur hian hei ai hian kan tang thei em tih kha ka duhthawhna a ni a.

Tin, a chaw siamna hi ka bial Ramrikawn-ah khuan a awm a. A chaw hi Mizoramin kan thar tlem khawp mai a, vaimimte a ngai a. Burma atang te, Jharkhand leh Bihar atang ten kan la lut a ni. Chumi ngai lo chuan farmers-te, thingtlang ami kan lo neitute hnenah hian vaimim ching nasa tur leh vaimim chin a hlawk zia hriattira kan tih chuan, Mizoram-ah tlawm zawka raw materials lain, vawk vulhtute tan chaw tha leh man tlawm zawk kan supply thei ang a. Tichuan, vawk vulh chungchangah hma kan sawn ang a, kan lo intodelh thei ang tih a beisei awmin ka hria a. Tunah hian favai tih loh hi chu intodelhna kan nei lo va. Hmun dang atanga kan lak luh a nih avangin department hian hlep awm lo, 'no loss no gain'

angin a kalpui mek niin ka hria a. Chuvang chuan, hemi kawngah pawh hian sorkar pawhin sum leh pai a tul ang kha an hnathawh theihna tur atana pek belh kha a duhawmin ka hria.

Tin, Pu Speaker, ran vulh chungchangah kelte pawh hi tunah hian Mizoram-ah hian demand a sang em em tawh a ni a, kelah hian kan intodelh lo va. Kel hi Mizoram-ah hian a tha duh em em a, a pung duh a. Kel hi kan ei nasa em em tawh a, bazar hrang hrangah hian kelsa zawrhna a awm deuh vek tawh a ni. Heng hi Mizoram chhung ami ni lovin, hmun dang atanga rawn phurh luh deuh hlir a la ni a. Kel vulh chungchangah pawh hian department hian tuna khaw chhunga kan vulh, a puitling pawh 5kg, 6kg ang lek lek ni lo, a lian chi, a chi tha-te hi ngaihtuah sela, tichuan hun reiloteah Mizoram boruak leh a chaw awmsa-na hmunah hian kel pawh kan intodelh thei ang tih a beisei awmin ka hria. Pu Speaker, ka lawm e.

S P E A K E R : Pu B.D. Chakma i lo sawm ang.

Pu B.D. CHAKMA : Pu Speaker, ka lawm e. Demand-wise sawi hmian introductory tlem ka sawi duh a. Absolute opposition aiin ruling opposition hi a hrehawm khawp mai. Vawiinah Minister zahawm tak pahnihte Demand-te ka chhiar a. Nimin lamah kan bang tlai deuh a, zan lamah ka mit a kham deuh avangin, tukinah ka thawh veleh budget-bu hi ka ennawn leh a. Vawiin hi Minister zahawm tak pahnihte tan hian lungawilohna ni a niin ka hria a, chuvangin tlem ka han chhiar chhuak ang a.

Demand no. 31 Agriculture leh Allied Sector hnuaiah hian total demand pawh nasa takin a tlahniam a. Nikum RE ah 25,379.27 lakh a nih laiin, kumin Budget Estimate-ah 17,368.03 lakh chauh a ni a, nasa takin a thlahniam a ni. Medical treatment chungchangah pawh sector tinah a tlahniam zel a ni a, Agriculture chauh pawh ni lovin. Kuminah hian department dang Health lamah hian kan hrisek tha zawk dawn nge ka hre lo va, kan department staff zawng zawngte. Helaia thil tha pakhat chu GIA hnuaiah non-salary hi tlem a pung deuh a, 9095.36 atangin 10467.51 ah a pung a, kha kha chu a tha viau a. Mahse, subsidy hi a tlahniam zel a, a bik takin Agriculture-ah subsidy a awm loh chuan Agriculture sector hi engtinngte hma a sawn theih ang tih hi ka ngaihtuahnah a awm a. Pu Speaker, chuvangin helai without subsidy chuan Agriculture hian hma a sawn thei miah lovang tih ka hlau khawp mai.

Tin, major works pawh nikumah khan 3430 lakh a nih laiin kuminah 'Nil' a ni a. Tin, Crop husbandry-ah pawh nasa takin a tlahniam a ni a. Nikumah 21235.83 lakh a nih laiin kuminah 16851.94 lakh chauh a ni. Research leh Education-ah pawh a tlahniam a, a figure-wise chuan ka rawn sawi lo mai ang a.

Nichina ka sawi tawh ang khan Minister zahawm takte tan chuan sawi a rem lo va, 'against the Govt.' a nih thin avangin. Chuvangin, anmahni aiawha tlem ka sawi duh chu sum allotment a tlem a. Ka Unstarred Question chhanna Tuesday, 18th June 2019 khan min chhang kha a ni a. A bik takin Agriculture Department-ah SEDP chungchang bikah nodal department a ni dawn nge dawn lo chu kan hre lo va, mahse tun tum in flagship programme atan chuan a mawhphurtu ber chu economic development atan Agriculture a lo ni thin a. Zawhna 4 ka siam ta a, heta zawhna zawng zawng chhanna hi negative vek a ni a, (d)-naah hian 'What are the sources of funding for SEDP' tih a ni a. A chhanna chu – 'Agriculture department does not know the source of funding' tih kha a ni a. Pu Speaker, a buaithlak khawp mai. Chuvangin, SEDP hi a hming thlakin Socio Economic Development Policy ni lovin, 'E' kha paih ta sela a tha mai lawm ni, Pu Speaker? Socio Development Programme ti ta sela, department zawng zawng a kalkual ang a. SEDP hi Finance Minister leh Chief Minister ni bawkin hetah hian a ziak a, mahse Budget Estimate bu ah hian SEDP chungchang engmah chiang takin a ziak miah lo va, sector zawng zawngah hian pakhatmah a awm miah lo.

Pu B.D. CHAKMA : Chuvangin, hei hi chu uluk deuha en ngai a ni.

Tin, Demand no.37 Cooperative-ah pawh nasa takin a thlahniam bawk a, budget zawng zawng hi nikum aiin kuminah hian a tlahniam nasa hlawm a. Subsidy-ah pawh kuminah nuai 80 chauh. Tin, GIA pawh 140 atangin non-salary 140 atangin 27 a tlahniam zel. Tin, demand pawh hi 2279.90 lakhs atangin 1709.18 lakhs chauh a nia, a vai hian a tlahniam vek a ni. State-ah Mizoram bik ringawt ni loin, state zawng zawng ah cooperative sector-hi a lar vek a ni. Assam-ah pawh, Tripura-ah pawh cooperative sector hnuaiah hma an sawn nasa a, mahse, Mizoram-ah cooperative sector hi tun thlengin doormat department angin a la lang ta a. Chuvangin, cooperative sector-ah hian pawisa dah tam thei se tha tur ania. Cooperative movement/cooperative development hi a awm loh chuan economic

development hi a awm theilo hrim hrim Pu Speaker. Chuvangin, cooperative sector hi uluk deuha en a ngai a ni.

Tin, Demand no.47 Irrigation & Water Resources-ah pawh hian nasa takin demand hi a tlahniam a ni. Nikum R.E.-ah 5960.26 lakhs a nih lain kuminah 3968.22 lakhs chauh a ni a. Chuvangin, he department Irrigation & Water Resource-ah term hmasa-ah pawh DISHA meeting-ah M.P. Chairman-na hnuaiah kan awm thin a, member nihna angin bialtu MLA hi member nih thin a ni a. Meeting neih veleh Irrigation & Water Resources Department hnuaiah central lam atangin tam tak an dawng thin a ni. Mahse, kan zawhna hi reliable reply hi pakhatmah an pe ngai lo va, department a bik takin district dang chu ka hre lo va, a bik takin Lawngtlai-ah hian IWMP, AIBP, PMKSY chungchangah chhanna dik tak chu an pe thei thinlo department miten khulamah Lawngtlai lamah. Chutiang bawkin kumin pawh hi a kal dawn em ni tih ka ngaihtuahnaah a awm a ni, Pu Speaker. Chuvangin, Irrigation & Water Resources pawh hi economic development atan department pawimawh tak a ni a. Engatinge hetiang in a awm zel tih chu ka ngaihtuahnaah a awm a ni.

Tin, Excise & Narcotics-ah ka lut leh ang a, Demand no.7. Excise & Narcotics pawh an khawngaih thlak em mai! Minister Doctor ni bawk senior tak a ni a, mi fel tak a nih lain hetah pawh hian a buaithlak khawp mai. Thil pakhat chu ka hrethiam lo a, demand hi nikum aiin kumin ah a sang tha daih a, mahse, zu zawrh pawh tihtawp a ni tawh a, khawi atangin nge sum hi tihpun a nih dawn tih chu department changtu Minister zahawm takin min chhang thei se a tha khawp ang.

Tin, Social Welfare-ah pawh total demand kan en chuan nikum R.E. aiin kumin B.E.-ah hian a tlahniam nasa lutuk. Nikumah 2673.36 lakhs a nih lain kuminah 1560.50 lakhs chauh a ni a Pu Speaker. Hetah pawh hian nasa takin a tlahniam a ni. Tin, salaries-pawh hi an pension dawn nge hna hi mass termination a nih dawn chu kan hre lova. Salaries head-ah hian nikumah 3039.99 lakhs a nih lain kuminah 2674.68 lakhs chauh a ni a. Hei hi Minister zahawm takin min sawifiah sak thei se salaries tlahniam chhan hi. Tin, medical treatment chu ka sawilo mai ang a, sector tinah medical treatment head chu a tlahniam zel. Office expenditure pawh hi a tlahniam a. Non-salary pawh a tlahniam. Chuvangin, Social Welfare-hi state tinah department lar leh lian tak a ni a. Hetiang zawnga a kal chuan Social Welfare hnuaiah eng beiseina nge kan neih dawn tih pawh ngaihtuahnaah a awm a. Engpawh

ni se, heti chung chungin Social Welfare hnuaiyah a bik takin physically handicap putar, pitar te awm an a, anni pawh hi a hun takah pawisa hi dawn theih dan a awm ang em tih kha ka zawhna a ni a. Chumai bakah, rualbanlohna nei tam tak chuan an tuar nasa lutuk, bial tinah eligible a nih pawhin Doctor authorized practitioner hi a ngai si a Pu Speaker. Authorized practitioner lam atangin rualbanlohna disabilities certificate neih loh chuan a thun theih si lo va, CDPO hnenah kha kha a ngai si a. Tin, medical office-ah thenkhatin a bik takin Chawngte-ah hian an pe ngamlo tlat a, Pu Speaker, medical certificate hi an pe ngamlo a ni, rualbanlohna disabilities certificate, hei pawh hi Social Welfare Minister zahawm takin min sawifiah sak thei se.

Tin, Demand no.34-ah ka kal leh ang a, hetah pawh total demand hi nasa takin a tlahniam a. 8048.49 lakhs a nih laiin kuminah 6933.31 lakhs chauh! Animal Husbandry, ka hun a tawp tawh em ni Pu Speaker? Minute 3 lek chu khawngaihin. Hetah hian medical treatment, office expenditure pawh GIA leh office expenditure chu tlem a tisang a, a lawmawm hle a. Major works pawh hi a bik takin kan en a, nikumah hian 1561.86 lakhs a nih laiin kuminah major works atan Nil? Hei pawh hi uluk deuha ngaihtuah a ngai. Tin, ka ngen duh pakhat chu Specialist Doctor leh VFA hi Mizoram pum puiah indaihlohna a nasa lutuk a. Bial thenkhatah, Chawngte(P) ah chauh medical-ah Vety Doctor pakhat a awm thin a, tunah phei chuan chu pawh chu a awm tawh lo, VFA pawh an awm lova. Chuvang chuan Pu Speaker, kumtin hian ran vulh te an buai phah ve ziah a ni. PRSS leh Bird Flu te a leng thei a, economic kan loss nasa a ni. Chuvangin Vety lam atangin hengte pawh hi min en sak thei se, Parva, Lawngpuighat leh Borapansuri lamah VFA an zu dah theih chuan full time-a in dah theih loh pawhin room a hminga a awm theih chuan mipuite hnena kalin min en sak thei se tih Pu Speaker, ka ngen duh a ni. (SPEAKER : I hun a zo tawh). Hun ka hmang zo tawh a, ka sawi tur pawh a zo tawh e.

Chuvangin Pu Speaker. Thil pawimawh tak pakhat SEDP chungchang a ni a, economic development atan khawiahmah ziakin a lang lo a, Budget buah. Chief Minister leh Finance Minister ni bawh Budget Speech-ah pawh figure lian pui a lang a. Mahse, Budget Estimate buah hian pakhatmah ziak a awm lova. Chuvangin SEDP hming thlakin SDP ringawt ni thei se a tha ka ti. Pu Speaker, ka lawm e.

SPEAKER : Tunah member zahawm tak Pu H. Biakzaua i lo sawm ang.

PU H.BIAKZAUA : Pu Speaker, ka lawm e. Tun hi Ex-Minister pahnih vui lai niin a lang a, pawl ka ti a, an uiawm hlein ka hre hlawm a. Mahse, kan business kan kalpui lo thei lo va, kan kalpui a. Demand for Grant-ah kan Minister zahawm tak tak pahnih te chan han sawi ve ka duh a.

Pakhatnaah chuan Demand no. 31-na Agriculture hi department pawimawh ber kan ti thei mai awm mang e ka ti a. A chhan chu tu mai pawh hi Agriculture product avanga nung leh khawsa kan ni a. Tin, thingtlang mi tam ber inngahna, ei leh bar an lakchhuahna chu Agriculture kan hi a nih avangin department dang atangin product leh thil lakchhuah leh thar chhuah awm ve mah se, Agriculture anga kan intunnunna hi Zoram mipuiah hian a department mal lak chuan a awm ka ring lova. Chuvang chuan a pawimawh em emin ka hria a. Thingtlang mi tam ber inngahna leh budget pawh an thlir ber a ni thin a ni. Chutiang a nih avang chuan Agriculture-ah hian link road hi kan ngaih pawimawh a tul hlein ka hria a. A chhan chu Agriculture atana ram tha tak tak tur WRC hmun tha tak tak tur te link road a awm loh avangin potential area kha hman theih lovin hmun tam takah a awm a. Chutiang chu example han pe ila. Ka bialah ngei te pawh a awm nual mai a. Khaw pakhat Thaltlang khua phei chuan an ram tha tuipui kam “Agriculture link road-in zu pawh se chuan kan khuaah hian development dang lut vak lo mahse kan intodelh theih kan ring” an ti a. Chutiang khawp chuan Agriculture link road ngaih pawimawhna thingtlangah a tam a ni.

Kan sorkarin bamboo a ngaih pawimawh a, bamboo link road nen Agriculture lakkawp theih tur a ni dawn a. Chuvang chuan link road-in kan ram a tha lai hi a tam thei ang ber suihfin tum ta ila a that ka ring nghe nghe a. A figure wise-a han kal kha a rei dawn a, chuvang chuan a figure lam chuan ka sawi lo mai ang a.

Mizoram chhim tawpah sawn Chamdur Project an ti thin a, Chamdur phaizawl zau tak mai a awm a. Chamdur phaizawl chu WRC atan hman tangkai ni se, ‘Mizoram mipui hi a chawm vek thei ang’ an ti thin a. Saw saw kan state budget atang hi chuan kan siam thei lo a ni mai thei a, mahse kan Minister zahawm tak pawhin min hriat sak se ka duh chu, Chamdur Project hma la tur chuan central lamah major project tak tak ang siam a, hma lak theih tur niin ka hria a. Saw saw kan tihpuitlin chuan ei leh barah kan intodelh theih ngei ka ring. Chuvangin

Agriculture Department-ah minor project hmun tam takah luikam leh hmun zawl tha zim te te awmna pawh tunah hian link road-a kan connect a, khatianga major project tur leh minor project tur ang chi te pawh kan zawnchhuaha hma kan lak tak meuh hi Agriculture Department-ah hian a tul hlein ka hria a ni

Co-operation chungchang Demand no. 37-na hi chu ka sawi rei lo ang a. Society lam atanga hmasawna kan zawn loh hi chuan hmasawna hi a kal chak lo ang reng khawp mai a. Society-a hma kan lak tam hian India ram hmun hrang hrangte nen kan inthlunzawm dawn a. Tichuan mi tam tak tan bul tanna, hmalakna kan siam sak thei a. Chuvangin Co-operative Society lamah sum leh pai kan neih chhun ang te pawh hi hmang thiam ta ila a tha hle dawnin ka hria a ni.

Tin, Irrigation lamah pawh hian kan ngaihthlak tak ang khan tuilak thei loh avanga kan ram tha hman tangkai theih loh a tam em em a. Chuvang chuan tui lak a pawimawh a. Tin, terrace ang WRC hmun zawl tha nei lo te pawhin siam an han tum pawhin tui lakah bawk a buai a. Chuvangin tui lak lama tan kan lak chuan nasa takin hetah pawh hian kan thanlen phah dawnin ka hria a. Hmun tam tak siam theih lova a awm chhan hi tui lak that tawk loh vang niin a lang a. Tunah kan budget atangin engemawchen chu kan Minister pawhin helam hawi a ngaihpawimawh ngei tur thu pawh hi a sawi thin a. Tui kan lak tam chuan kan product a nasa dawn a ni tih a lang chiangin ka hria.

Aw le, khalam kha chu sawi thui duh mah ila hunin a daih leh dawn lo va. Excise & Narcotic lamah hian han sawi ka duh chu ka question-ah khan a awm a, ka zawt hman lo chiah chiah a, zingah khan. Excise & Narcotic Department hi a pawimawh hlein ka hria a, a chhan chu zu kan khap a, ruihhlo dotu tur pawl chak taka kan kal pui leh si loh chuan kan zu khap hian awmzia thui tak a nei lo palh ang tih ka hlau a. Tin, kan lo thianghlim theihna tur leh ruihhlo laka kan fihlim chhoh zelna turin, ram pum huapa kan thianghlim chhoh theihna tur chuan he department hi kan tih chak a tul hlein ka hria a ni. Example han sawi ta ila, thil tul deuh mai, Lawngtlai-ah sawn Excise & Narcotic Department hawn ve ni se, hawn tumna a awm em tih ka zawt a. Ka zawh hman loh avangin tunah hian sawina remchang tak ni pawhin ka hria a, Pu Speaker.

Sawlai saw Excise Department hi kan neih loh chuan KMMTTP road (Kaladan Multi Modal Transit Transport Project) saw an zo dawn hnai tawh lam a ni

a. Border trade sawtah sawn ropui takin buatsaih tum a ni mek a. Tin, Saisihchhuah-ah border trade buatsaih chhoh a ni mek bawk a. Lawngtlai-ah hian Excise & Narcotic Department hi a awm loh chuan harsatna tam tak a la awm dawnin a lang a. Chutiang ngaihtuah chuan hmanah khan sorkar lam pawhin Lawngtlai-ah he department tan hian ram inpe thei em tih a awm a. Chu chu District Council pawhin ram an pe tawh a, Council veng lamah Chengkawl tlangah ram tha tak Excise tan dah a ni tawh a, tun thleng hian he department hi hma la lak chhun zawm a ni lo a, churang chuan kan Minister hian dah ngei hi tum ta se tih ka ngen duh a.

Tin, post sanction 635 Excise-in an nei a, chutah chuan 531 chauh lak a ni a, 104 Excise-ah post ruak a la awm a. Hei hi hnawh khah theih a nih chuan sawlaiah Excise Department pawh hi min dah sak ngei se ka duh hle a ni.

Tin, Demand 34-na, AH&Vety hi a, pawimawh hlein ka hria a, kan Minister zahawm tak nen Selesihte pawh kan han tlawh a, a lo hlui tawh a, building a chhe hlawm em em tawh a. Sai Ar awmna lam phe chu awmna tlak hi a ni tawh lo hrim hrim a, an building te a chhe em em a. Tin, Ramrikawn-ah ar vulhnate pawh kan en a, MULCO hmun te pawh kan tlawh a, ran chaw siamna te pawh kan en a. Vety Department hmalakna hi hei aia nasa lehzuala tan an lak chuan nasa takin sa lampangah te kan intodelh chho dawnin ka hria a, a phurawm hle a. Ar-ah hi chuan kan intodelh chho thei maiin a lang tawh a, vawk te, kel te, bawng te leh sial thleng mai hian kan ramah vulh theih vek a ni a. Churang chuan heng lamah hian nasa lehzualin tan kan lak a tulin ka hre bawk a.

Tin, ran han vulh tak tak tur hian RAH center, nichina kan ngaihtlak pawh kha a dikin ka hria a, ka bial Lungtian-ah tunah hian RAH center Vety Department-in hawn an tum mekin ka hria a, lawmawm pawh ka ti khawp mai a. Heng hi thingtlang hmun tam zawkah hian hawn belh zel theih ni se, kan rante an lo hrisel ang a, tunah hian Vety Minster zahawm takin vawk note sem tur a nei lehngal a. Vawk note a nu pathumah a pa pakhat zel, chutiang chuan chungkaw engemawzat pek an tum niin ka hria a. Pu Speaker, ka sawi zo tep tawh a, minute hnih khat lek khawngaihin. Heng pawh hi a venna thingtlang lamah kan neih that si loh chuan a buaithlak leh dawn hlein ka hria a.

Tunah hian China-ah (khawchhak lamah)s Swine Flu kan tih ang chi, a aia nasa zawk, a aia hlauhawm zawk a leng mek an ti lehngal a. Chuvang chuan thingtlang lam hmun tam takah hian RAH Center ang chite pawh hi min dah belh thei zel se, chutiang chuan rante pawh hi an lo hrisel chho ang a a tha ang tihte ngaihtuahna ka nei ve a.

Tin, Demand no. 29-na Social Welfare hi department pawimawh tak leh department zau tak, kan Demand For Grant-ah hian (SPEAKER : tawi deuhin aw) department 49 kan nei a. Heng 49 zingah hian Social Welfare-in a connect theih loh department chu tlemte chauh a ni a. Chuvangin he department hma la zau thei tak tur pawh hian central lamah te, Ministry hrang hrang atanga sum pawt chhuak a, he kan Budget hi chu a chi tur kan tih angin a tlem a. Chuvang chuan sum tam zawk lak chhuah theihna tur Social Welfare hi niin ka hria a. Pu Speaker, old age pension lawmman hi kan bial lamah chuan an la thei lo tih hi a awm fo mai a, min lo phone fo mai a. Hei hi kan Minister pawhin old age pensioner ho lawmman hi a hunah hian pek theih vek tum thin ni se tihte kha ka han sawi tel duh a ni e. Ka lawm e, Pu Speaker.

SPEAKER : Member zahawm tak Pu Lalrindika Ralte i lo sawm ang.

PU LALRINDIKA RALTE : Pu Speaker, ka lawm e. Demand no. 7 hi Minister fel tak kan nei a, a lawmawm hlein ka hria a. Chutih lai chuan department enkawlina tur sum leh paite hi a beithamin ka hriatpui deuh hlek a, an department hian hna an ngah hle tih kan hria a. Zu zawrh lai a ni emaw, zu zawrh loh lai pawh ni se anni hi an buai em em a ni tih kan hria a. Tin, thawktu indaihlohnate a nasa hle a, thawktu kha an dil niin ka hria a, mahse an duh ang pek tur a rem dawn loh tih kha kan hriat dan kha a ni a, a pawh hlein ka hria.

Constable-te pawh hi an awm ve nual a, amaherawhchu Driver-ah hian an pawt peng nasa riau mai a, hetiang motor khalh tura an beisei rau rau a nih chuan a driver zawngte hian tihnggeh dante a awm em tih ka sawi duh a. Tin, Constable pawh hi lak belh an ngai hle mai a, hengte pawh hi kan sorkar hian ngaipawimawh tur khan an insawi a. Amaherawhchu, sum dah han en hi chuan engtingge a kal dawn tih a hriat lo va. Engpawh ni se, tihchak an ngai hle a ni tih ka han sawi duh a. Tin, kan bial mamawh ka sawi hmain ama mamawh hi ka han sawi hmasak sak teh ang. Siaha-ah sawn Asstt. Commissioner kha a awmlo niin ka hria a, a hmaa awm

reng tunah hian a awmlo niin ka hria a. Hei hi dah let leh theih a ni ang em tih te kha ka han sawi duh a. Chutih ruala ka sawi duh chu khu kan bial khu ramri depa awm kan ni a, Assam leh Tripura inrinaa awm kan ni a. Zu zawrh kan ti tawp a, zu kan zawrh lai kha chuan Kanhmun, a ral leh lam mai Damcherra kan ti a, khulailah khuan zu dawr a awm thin a, zu kan zawrh lai zawng kha chuan zu dawr a awmlo a, amaherawhchu, tunah hian a awm leh tawhin ka ring a, a awm leh tawh em tih chu ka hre lo va. Khulailah khuan check gate a awmlo tlat mai a, khulai khu a pawimawhin Assam leh Tripura inrina lai a ni si a, Chuvangin, Excise check gate min dah sak turin ka ngen duh bawk a ni. Tichuan, Pu Speaker, zu kan hria a, an man thin a, hei hi a tihral leh dan hi eng angin nge an tihral dan ka hre chiah lo va, zu khap pawh lo ni se, phalna neia zu in thei kha kan awm a, khangah te khan an hralh thin turah ka ngai a. A rate hi tunge fix a, eng angin nge an hralh thin hi min hrihl a rem chiah loh pawhin, zu hi kan zawrh leh dawn loh rau rau chuan hengte pawh hi Excise tihpun nan te a to zawka hralh dan te ngaihtuah sela a thain ka hria a, tlawm te in khang te kha tihral mai mai a ni ang tih te kha ka hlauh pui deuh a. Chuvang chuan, department-ah sum te an dah tlem si a, khang te kha tlema sum an lo lak luh theih ve nan tiin ka han sawi duh a ni.

Tichuan Pu Speaker, Demand no. 31-na hi ka han sawi leh ang a. Agriculture hi a pawimawh hlein ka hria a. Agriculture Sector atang lo hi chuan Mizoram hi chu khaichhuah theih tak tak a ni lo tih te kan sawi thin a. A chang chuan ka ngaihtuah a, ram hruaituten Mizoram kan kaihhruai dan ang hian kan chhungkua hi kan kaihruai duh ang em aw tih te ka ngaihtuah thin a ni. Chung ka sawi duhna chhan chu sum leh paiah kan pachhiat zia kan hria a. Entirnan, buhfai kan sawi berte pawh kan lei sak a, a lei dan zawng zawng pawh sorkarin a ngaihtuah sak a, chutah a sem zawng zawng sorkarin a ti leh bawk a. Hengte hi kan sawi luai luai thin a, buhfai a buk a tlinglo, chuti khati tih te kan sawi tam thin a. Hengte hi ka rilruah tak chuan, hetiangka kan inseng phal rau rau a nih chuan kan lo neitute hi a sum hian pe mai ila, an ei tur hi chu lo indap ve mai se, duh leh market atang tein lei ve mai se ti ngam mai ila a thain ka hria a. Nimina sawlai Vathuampui kan sawi kha, ₹ 2,750-a buhfai kan lei kha ₹ 3,590-in quintal khat a thleng a ni. Chuvang chuan, buh kan chin tir ang a, an thar kha a lei nan a ni nghal mai ang a, tichuan a pawisa khan pe ila, buhfai a buk a tlinglo tih neuh neuh kha chu a bo a ni mai, Pu Speaker. Chuvang chuan, huai deuh thek thawka kal ngam te pawh a tha in ka hria.

Tin, sorkar loh te MLA nih loh te hi kan hlau nge maw ni te ka ti a. Kei, hei thla ruk emaw erh awrh MLA ka han ni a, MLA ka nih hmaa ka awmdan anga awm leh hi ka ngam lohna ka hre miah lo a, chuvangin, hei hi niin ka hria a, kan sawi zawng zawng hi Agriculture ka han sawiah pawh hian chu chu a in ka hria a. Agriculture ah hian hma kan lak nat a ngaiin ka hria a ni. Amaherawhchu, hma lak nat kan tum lo tih kan budget-ah khan a lang bawk a. SEDP te kan ti a, khang kha project zawngin a ni, kan lo neitu te kha chuan project siam dan pawh kha an thiamlo ang a, tute emaw sum siam tumna kha angin ka hria a. Chuvang chuan Agriculture hi kan beih nasat a ngaiin ka hria a. Kan ram hi kan hria a, engkim that duhna tiin kan hria a. Chuti chung a Agriculture-a hetiang leka hma kan la hi chu a pawiin ka hria. Tin, ka sawi tel leh duh chu, Pu Speaker, sorkar hian eng eng emaw thil a buaipui thin a, sawhthing a ni emaw, thil hrang hrang a buaipui tawh thin a, hengah hian a hralh kawngah sorkar hi a inrawlh loh thain ka hria a, kan kut hnathawktu te hi hlawk zawka an hralh theihna tur zawn pui mai ila, a lei duhtute nen khan direct-in indawr mai se a thain ka hria.

A bik takin kan bial chu kuhva tamna a ni a. Kuhva kan hriat angin a to em em a ni. Tunah pawh Burma lam atangin kuhva a lo lut a, to tak takin hralh a ni tih kan hria. Truck trip khat hi nuai 40/50 vel a ni a, kuhva ro hi tuna marketah hian. Chuvang chuan heng kuhva te hi hma lak tak tak chuan kan lo neitu, kut hnathawktu te hian a hmun tak, a hralhna tur taka a hralh ve theih chuan hlawkna nasa tak a thlen thei ang tih ka ring a. Engpawh ni se, Agriculture hi nasa takin han bei teh ang tiin ka insawm duh a.

Tin, chutih rual chuan kan bial khu Agriculture-ah chuan potential area kan ni a, kan hria a, chuvang chuan western lam khu rawn hawi deuh hlek ula tiin ka insawm duh a. Tin, a tawp berah chuan Pu Speaker, ka han sawi leh duh chu, khu kan bial Kawrtethawveng-ah khuan SDAO kan nei lo va, khu khu indaihlohna chu an sawi mai thei a, amaherawhchu Minister chak tak kan nei a, a rawn tir kal thei ang chu maw ka ti a. Chutiang chu min hriat sak turin ka rawn ngen a ni e. Ka lawm e.

SPEAKER : Dr. Z.R.Thiamsanga ko ang aw.

Dr. ZR THIAMSANGA : Pu Speaker, ka lawm e. Demand 31-na, Minister zahawm tak Pu C. Lalrinsanga chan Agriculture Department hi kan

ngaihthlak tak ang khan department pawimawh ber te zing ami, a bik takin thingtlang mite tan chuan kan inghahna department pawimawh ber te zing ami a ni a. Kan ei leh bar intodelhna kawngah pawh he department hi kan inghahna a ni. SEDP-ah te a lang lo kan han ti a, ni e, pawisa pawh hi kan dah tam lo a ni te kan han ti a. Amaherawhchu kan Chief Minister leh Finance changtu ni bawh khan untied fund kan ti a, Finance-ah te pawh sum tam tak a dah a. Khang atangte pawh khan kan la hmang thei zel tura ngaih kha a ni a, need based-in. Chuvang chuan SEDP-te kan la kal chho ang a, chungah chuan hmalak dan kha awm chho zel turah ngai ila.

Tichuan Agriculture Department hi keimahni Champhai bikah phei khi chuan potential area thatna a ni a. Champhai khi Mizoram-ah chuan phai pawh zau deuh ber pawl, Agriculture-ah pawh potential area kan tihna hmun thin, Champhai leilet tia hmingthang tak thin kha a ni a. Tunah khian hmalakna tam tak a awm tawh a, amaherawhchu tunah khian potential area, Champhai District-ah khian ka han zawh kual velin land development tur ram hectare 8000 chuang vel khi la awm niin ka hria a. Chuvang chuan hmabak a la tam khawp mai. Champhai District-a kan leilet neih sa leh tuna kan la hmabak khi han ti ta ila, Champhai District hi chu Champhai, phai vel leh a chhehvel khing Hnahlan te, Tuisaphai te, khing ho khian an chawm zo hlein kan ring a.

Chuvangin nichina ka hma ami in carrying charge, pawisa tam tak kan sen thin ang zawng zawngte pawh kha Champhai-ah buh kan thar ang a, SEDP-in kan lei ang a, mahni kawtkaiyah, mahni buhfai kha kan inlei sak mai turah ka ngai a. Kha kha a pawimawh hlein ka hria a, hei hi kan ngaihtuah chian pawh a ngai. Vawiinah hian vanduaithlak takin kan Chief Minister leh Finance Minister ni bawh han awm sela a hriata han sawi pawh a chakawm khawp mai a. Amaherawhchu la hre turah pawh ngai ila, a ngaih pawimawh berte zing mi a ni a.

Tichuan mahni bialte kan sawi lo thei lova, kan bialte hian min lo thlir ve thup si a, ram pum anga han sawi pawh hi a chakawm rualin mahni bial te pawh hi Pu Speaker, han sawi lan te hi a ngai thin a. Champhai-ah khian potential area a nih ang hian static short testing laboratory changtlungte pawh hi kan neih a ngaiin ka hria a. Tin, Agriculture kan han tih tak tak dawn chuan godown tha kan neih a ngai a, chu lovah chuan cold chain kan ti nge ni, khatiang chi te pawh kan neih that a ngai

a ni. Chutiang a nih loh chuan eng ang pawhin product nei tha mah ila kan ti tawih mai mai ang tih pawh a hlauhawm a ni. Champhai area khi kan sawi leh ang a, Ngur tlang atang khian han ti pheii ta ila, tichuan Lengteng tlangah, tin sawtah Ngopa-ah, Lengteng ramah khian Sialkal tlang, khingte khi alu thatna hmun a ni. A tha em em thin a, tunhma pheii kha chuan pum khat hi kg. chanve deuh thaw thaw awm theihna a ni. Chuvang chuan khing Ngur atang khian han ti tak tak ta ila, han chei ta ila, Selam, Lengteng tlang dungte leh Sialkal tlang te, khing zawng zawng khi alu hmunah han siam ta ila he kan Zoram hi alu pawh hian a chawm zovin ka ring. Hmanniah pawh khan, ‘ min rawn thar tem teh u,’ a ka ti a, Selam ami an rawn ti a. Pu Speaker, i phal chuan hei kawng a tha lo deuh hlek a, ka chah a, kan House member zahawm tak te hi Selam alu hi thar tem turin ka chah mek bawka. Karleh lamah te chuan kan dawng maithei a ni, rem i tih chuan. (Speaker : A lawmawm khawp ang.)

Chuvang chuan kan beih tak tak a ngai a, kan Agriculture Minister hi a fakawm hlein ka hria a, a hmuna kal peih mi a ni a. Khilam te pawh khi min la rawn tlawh sela, Lunglei lam te a tlawh zo tawh bawka, khawchhak lam khi min han tlawh ve se ka duh a ni, min han hmuh chian pui teh se. A lem te, a thla te ka la a, kan hmuh tir a, a practical ngeiin. Kan area-ah khian Irrigation lam te pawh kan la mamawh tam khawp mai a, kan department irrigation khi tunah khian an tha khawp mai a, amaherawhchu staff an indaih lova, J.E. pakhat vanduaithlak takin hmanniah a boral a. Pakhat pheii chuan tunah khian hnathawk thei lo a ni a, field-a han kal a, han survey tur khan a thei lova ni. Chuvang chuan manpower te hi kan mamawh khawp mai a. Tin, ka sawi tawh ang khan Agriculture godown changtlung leh tha tawka kan mamawh a. Tin, Rest House, meeting te leh exhibition te han nei dawn ila, official-te pawh lo thleng dawn ta ila, agriculture potential area thaah khian Rest House-te pawh khi kan neih a ngaiin ka hria. Agriculture-ah pawh khian tih tur tam tak a awm a, khing Hnahlan area-ah te pawh khian AEO-te pawh han dah ve ila, kan changtlun phah hlein ka ring.

Tichuan ka hmaa member zahawm takin a rawn sawi tawh ang khan link road te hi a pawimawh a, khingah khian link road kan neih that chuan product kan nei tha dawn a ni. Tin, chu lovah chuan co-operation chungchang kha chu an sawi tawh a, Champhai-ah khian Champhai tan multipurpose society city pact an ti a, an hlawhtling khawp mai a. Sikul tha tak an din a; tin, bank tha tak an siam a, mi tam

takin tunah khian eizawn nan an hmang a ni. Tichuan project lianpui pui te pawh tunah khian an la siam a. Khingte pawh khi min rawn en pui se ka duh khawp mai, khitianga co-operation society nei tha khi hmun dangah hian an awm ka ring lo a ni. Khingte khi a practical ngeiin min han hmuh sak se ka duh a ni.

Tin, society te kan han ti a, a then hi chu a mipui pawhin kan zirlo thin a, Mizo-ten kan thiam lova. A tirah kan han ti hlui a, amaherawhchu kan zuh tial tial a, a tawpah chuan leiba in kan awm teuh thin. Khatiang ang society te pawh kha keiniah te pawh a awm a, chungte pawh chu min la enfiah sak turin ka duh a ni.

Tin, chuloah chuan Irrigation chungchang kha ka sawi tawh a, kha lampang kha chu ka sawi tawh lo mai ang a. Tichuan, Excise Minister zahawm tak hi a fakawm hlein ka hria a, hun reilote chhungin total prohibition te kan han ti a, tih tur tam tak a awm a, amah ngeiin Rangvamual te zuk tlawhin Excise Check Post te an zuk siam a, amaherawhchu, manpower siam hi a pawimawh ber a ni Excise-ah hian. Total prohibition kan ti a, hna han thawk tak tak tur chuan manpower hi a ngai a, vehicle a ngai a, churang chuan Excise hi kan tihlen a ngaiin ka hria Pu Speaker. Nakinah pawh hna tak tak thawk tur chuan Excise hi kan tihlena kan tihchak a ngai hlein ka hria a. Nichinah khan ka sawi tawh a, zawhna leh chhanna ah khan, Excise chungchanga Champhaiin an mamawh dan leh thil dang kha chu ka sawi nawn tawh lo mai ang a, min lo chhinchhiah sak in ka ring a.

Social Welfare Department lamah hian ka hriat dan chuan Social Welfare Department hi Women Welfare Department nen hian bifurcate tum niin ka hria a. Hengte hi sorkar hian engtikahnge notification a chhuah dawn hriat te pawh a chakawm hlein ka hria a. Tichuan, Champhai khi District Programme Officer (DPO) awmna a ni a, entirnan CDPO, Social Welfare Department leh Women Welfare Department te kha lo inthen ta ang se, CDPO lampang khian office khi khawiahmah an nei dawn lo a ni. Churang chuan Champhai Zote-ah khian DPO khian hmun tha tak an nei a, (khingte khi mi in luah lova office hmun an nei bawk si a) khingte khi min han sak sak sela a duhawm khawpin ka hria a. Hmun nei reng si a mi in luaha awm

reng te pawh hi a department ang pawh hian a zahthlak hlein ka hria a, chuvangin khingte pawh khi minrawn ensak sela.

Tin, DPO te pawh hi central an niin ka hria a, amaherawhchu Mizoram sorkar pawh hian engemawzat chu a tum vein ka hria a sum leh pai pawh hi. Hlawh te pawh hi an lak lohna a rei tawh angreng a, April thla thleng chu an la a, central lam an nih avang hian a harsa deuh te pawh a ni ang e, khingte pawh khi min enfiah sak se ka duh a.

Tin, Vety. Champhai - ah khian tunhma khan bawngnhute siamchhuahna te kha kan han siam a. 2007,2008 vel khan an siam a, CHAMUL an ti a, 2010-ah khan bawngnhute pawh kan tichhuak chur chur mai a. Amaherawhchu, engemaw rokhawlhna leh khawl lam fel lohna avang te; tin, bawngnhute kha supply a tam lutuk a, hralhchhuah theih aia tam mah kha an tih avang khan tih theih a ni ta lova, electric bill bat te a lo tam ta a, khang van khan a lo tawp ta kha a ni a. Chuvangin Vety.-ah te pawh hian kan han tih tak tak chuan potential area a ni a, Champhai te pawh khi. Khing Murlen te pawh khi tui a tha a, ranvulh nan te a tha em em mai a ni. Chuvang chuan theihtawpa kan tih chuan poultry farm te pawh kan han ti a, a hlawhtling em em a, amaherawhchu manpower kha a ni leh thin a. Tin, Hnahlan-ah te Vety dispensary kan nei a, a building khi a chhe tawh a, sak that a ngai a. Doctor kan nei a, mahse a hriseh lova hna a thawk thei miah lova, chuvang chuan VFA tal hi minrawn dah sak se, entirnan ran a lo na a, jection tur tumah an awm lova. Tin, chuloah chuan Champhai Vety hospital-ah khian motor a awm bawksi lova, a bial a zau bawksi a, ran vaccine te han pe tur khian kea kal emaw, motor hire emaw te a ngai thin a, chuvang chuan motor pakhat tal te chu min han pe ve thei ula chuan a lawmawm ngawt ang.

Nimin lama ka zawhna pakhat chiah ka'n sawi leh ang e Pu Speaker, ka zo dawn tawh a nia. Zokhawthar-ah quarantine station building minrawn siam dawn niin kan hria a, khangte pawh kha a hma lamin minrawn tihsak thei ula. A chhan chu Mizoram-ah ran vulh tur kan indaih lova, khi lampang atanga lakluh te pawh a la ngai mai thei tunah khap rih nimahse. Chuvang chuan khinglai te pawh khi a pawimawh khawp mai a, a ranglamin

quarantine station building te pawh min rawn sak sak turin ka ngen duh a ni, ka lawm e.

S P E A K E R : Midang tan hun a awm ta tlat lo, a ti zo vek mai. Dar 1:00 P.M. a nia kan chawl ang a, dar 2:00 P.M. ah kan lut leh dawn nia aw.

RECESS TILL 2:00 P.M.

2:00 PM

S P E A K E R : Member zahawm tak Pu Nihar Kanti Chakma kan sawm nghal ang.

PU NIHAR KANTI CHAKMA : Pu Speaker, ka lawm e. Ex-Minister vuina kha a zawh tawh ka ring a.

Vawiinah Minister pahnih demand kan sawi dawn a, sawi tur tam erawh chu ka nei lo va. A hmasa berin Agriculture chungchanga sawi ka duh chu Mizoram buh leh balah kan la intodelhloh hi kan hre vek ang a. Economics survey-in a tarlan danin Mizoram pum pui requirement hi kumkhatah nuai khat leh sawmriat te a ni a. Kum khata a thar chhuah zat chu 59606 metric tone per year a ni a. Khami kha 30% chauh a ni a, a dang 66.80% hi pawn lam atangin kan la thin a ni. Chuvangin he department hian nasa taka tan lak a ngaiin ka hria.

Ka bialah hian potential area hi a tha lutuk a, chuvangin land development hi a ngai nasa a ni. Mizoram pum puiah survey-a lan danin, potential area kan neih chu 74644 hectare a ni a, area under cultivation hi 16526.7 hectare a ni a. Mizoramah hetiang zat potential area nei chung hian, area develop ngai chu 58117.3 hectare a ni a. Chuvangin potential area kan neih zawng zawng te pawh tun thlengin la develop thei loh a ni a. Mizoram a intodelh theihna tur hian kan zavaia tan lak a ngai a ni. A chhan chu nitina kan mamawh a ni a, chaw ei lovin kan awm thei lo va. Chuvangin he department hian nasa takin tan lak a ngai a ni. Ka biala problem awm chu fencing a awm atang hian kan buh thar pawh a tlem em em a ni. Tunah hian fencing hian mi tam tak leilet a ti chhia a ni. Hmun tinah water log an

nei nasa a, chuvangin duh ang angin buh hi a thar thei lo a ni. Agriculture atang hian tui luan na tur hi min ngaihtuah sak sela a thain ka hria. Tui luan na hi tha takin min ngaihtuah sak sela chuan tun ai hian buh kan thar tha ang. Mechanized programme hnuaiah ka bial chhungah custom hiring center pahnih min pe ka lawm khawp mai. Tunah a bikin farmer ho in an hmang tangkai zel a ni. Mansuri leh Khojoysuri-ah min pe leh thei se ka ti khawp mai. Tichuan buh pawh tha tak kan thar thein ka ring a ni.

Tin, Tlabung hi sub-division a ni a, Agriculture SDO awmna hmun a ni a, tichuan office staff hi an indaihlo khawp mai a, a bikin Field Officer hi kan mamawh a ni. Tunah hian SDO pakhat, Cashier pakhat, AEO pakhat an awm a, AEO hi pension mai tur a ni bawk si a. Chuvangin Minister zahawm takin hma min lak sak thei se kan ti khawp mai. Pu Speaker, Agriculture chungchangah chuan khati zawng kha ni mai se.

Social Welfare Department hi a tha khawp mai a, hmuntinah Anganwadi Centre-te min pe a, a lawmawm a. Minister zahawm takin hmanni lawk khan Anganwadi Centre sak thar tur leh repair tur awm te ka bialah min tihsak a, hei vang hian lawmthu ka sawi a ni.

Social Welfare Department hnuaiah tho Tribal Ministry hnuaiah sikul tam tak sak hi Economic Survey bu ah khan kan hmu a. Ka bial chu kan hre vek a, Higher Secondary pakhat chiah kan nei a. A pum puiin College pawh kan nei miah lo a ni. 10+2 an zawh chuan zirna chu a tawp a ni mai a, facilities pawh an ngaihtuah miah lo a. Chuvang chuan Aglobo Model Residential School ka bialah min dah thei se ka lawm khawp ang. A tam zawk hi an sawi dan chuan keimahni area lampang vangin Education-ah pawh percentage-ah kan tlahniam nasa a ni. Min dah theih chuan engemaw zat hi percentage chu kan up chho zel thei a ni, Pu Speaker.

Excise & Narcotics Department chungchang tawi te ka sawi duh chu tunlaiin nitin News-ah te pawh kan hmu ve thin a. Drugs hi Mizoramah international boundary-ah kan lalut nasa khawp mai a. Kan zavaiin thawh tlan a ngai a, hetiang thilah hian. Mihring hi kan la tam vak lova, nuai 12 chauh kan nia. Nuai 12-ah pawh hetiang zat drugs a lut hi a mak lutuk! Chuvangin hei aiin he department hian nasa zawka tan lak a ngai a ni. Manpower a ngai a ni. Mahse, budget-a a lan dan

chuan nikum aiin kan hmu tlem zawk a ni. Chuvangin, manpower-te pawh theih chin chin lak a ngai a ni. Aw le, Pu Speaker, chu zawng chu ka sawi theih ni sela. Ka lawm e.

SPEAKER : I hun i hmang tha e. Dr. K. Pachhunga.

Dr. K. PACHHUNGA : Pu Speaker, ka lawm e. Minister zahawm tak tak pahnih Dr. K. Beichhua leh Pu Sangtea te demand vawiinah member zahawm tak takten an sawi a.

Pu Speaker, a detail chuan a figure te ka sawi lo anga, hun te a tlem a. Member zahawm tak takte pawhin an rawn sawi a. Comparison te neiin kum hmasa te ngaihtuah chuan a tlahniam tihte pawh a ni a. Kan hriat theuh angin, NLUP leh NEDP line department Agriculture bikah nikum election oriented-in budget te pawh hi a awm ve bawk a. Chuvang chuan nikum kha chu a tluk thei lo hrim hrim turah te pawh ka ngai a.

Agriculture bikah chuan Minister fel tak Pu Sangtea, inpe zo tak, a hmuna kal zel thin kan nei a, lawmawm ka ti a. Ani hi department-ah tui em em a, a tum pawh a ruh a. Mihringin kan ei thin purun te, dal te, alu ah te pawh intodelh tumin nasa takin hma a la chho mek niin ka hria a. Tin, ka bial chhungah ngei pawh potential area kan nei tha em em a. Mizorama lui lian ber Chhimtuipui thui tak kan ramah a luang a. Chutiang chuan Mat leh Ngengrual lui te a awm a. Tin, khutah Khawmawi lamah Ngengpui lui te a awm a. Kan River Valley te hi potential tha tak a ni a. Hmanah lehkha kan zir laiin Mizoram-a Civil Service te leh Officer te nen Mizoram development chungchang kan sawi a. Dr. C.L. Rema (L), Mizote zinga IAS hmasa berin a sawi chu, 'Mizoram-a kan potential neih thatna hmun lui dungte hi link-road kawng emaw awm sela kan rethei lo ang,' a tih kha a dik hlein ka hria. Chu chu kan Minister pawh hian hriain link-road te pawh a rawn lai zel turah kan ngai a. Chutiang chuan ka bialah ngei pawh WRC project te kalpuiin hma a la mek zel a, lawmawm ka ti a. Tin, kan mamawh em em, leilet-ah te tui pipe te pawh an sem zel turah ngai ila. Chutiang chuan lei leh nan tiller te kan mamawh a. Hmachhawp tam tak kan nei a ni tih kan hre tlang a. Chutih lai chuan Asia ramah khawvel sik leh sa (global warming) avangin thlaiten harsatna an tawk a. Fall Army Worm kan tihte pawhin min rawn bei ve zel a. Chu chu kan Minister-in theihtawpa hma a lakna a zarah vawiinah kan fihlim te hi a ropui hle.

Agriculture hi sawi tur tam tak a awm a. Engemawti zawng taka ngaihtuah chuan pi leh pute kha technology tel lovin ei leh bar an intodelh a. Kan changkang zel a, kan intodelhlo tial tial a. Budget-ah engzat pawh dah ila, Agriculture-a ei leh bara kan intodelh hi a la awm lem lova. Chutih lai chuan Budget han en ila, buhfai phurhna tur leh buhfai leina tur kha kan dah tam tlat a. Chuvang chuan hei hi kumtina kan hmabak leh kan lo tih thin dan a ni tih kha tun sorkar a ni emaw sorkar kal ta a ni emaw ah khan a awm ve hrim hrim a ni. Kan thianten fiamthu in an sawi thin a, Mizoram hruaitute chu Delhi-ah an va kal a, Union Minister-in, “engatinge kumin hi buh in va thar tlem ve” a ti a, “Khua a kheng a, buh kan thar tlem e” an ti a. Nimahse, PWD an va kal leh a. “Engatinge kawng in va siam lo ve” an ti a, “Ruah a sur tam lutuk a” an ti a. Tiang khan kan inpuh kual tawn deuh mai mai bawk a. Chungte pawh chu kan harsatna, thil thar a ni lo ve tih kha ka sawi tel duh a.

Demand 47-na, Irrigation chungchangah te pawh hmalak tur tam tak a awm a. Kan hriat angin thlain tui a mamawh a, tui tel lovin engmah a tih theih loh va. Chutih lai chuan rain water harvest-ah nasa taka hma lak a tulin ka hria a. Chung chu hriain kan Minister pawhin tanky te siam mek zelin hma lakna a nei mek zel a, a lawmawm ka ti a. Tin, tui pipe ang vek chuan a hautak lutuk a. Khing khawchhak lamah te chuan lei an lai a, kawr te reuhteah angincanal an lo siam a, cement an hmang lem lova. Chungte pawh chu kan ramah hian ti ve ila a hlawhtlin a rinawm a ni.

Demand no. 7-naah kal leh ta ila, Excise & Narcotics- ah. Kan hriat angin total prohibition kan kal pui a. Dik taka sawi chuan, member senior te sawi ang khan mihring kan tlem ngaihtuahin ruihhlo-ah kan kal nasa em em a. UN research team pakhat finding-ah phei chuan South East Asia-ah hian hnam thenkhat, hnam engemaw hi chu ruihhlo avanga la ral turah an ngai a. Chu chu kan ni ang em aw tih hi ka ngaihtuah thin a. Ruihtheih zawng zawng kan duh emaw ni tih turin kan awm a. A chhan leh vang zawn chhuah hleih theih loh khawpin a lo awm a. Tin, zu vangin, chawhma lama kan zawhna ang khan kum reilote-ah pawh kan lo hralh nasa em em a, kan chhiatpui nasa bawk a, hmeithai fahrah kan tam a. Chutiang chuan economically-in, socially-in kan tla chhe nasa em em a ni. Kan Minister zahawm takin theihtawp a chhuah a. A hun reilote-ah pawh engemaw zat, drugs kan tih ang chi te tunah hian NGO te nen theihtawp chhuahin an man mek zel a.

Tin, ruihhlo laka inveng fihlima kan ram hi chhanhim tur chuan NGO-te leh kohhran hote pawh an tan ho that a ngai a. Sorkar ringawt hian a ti seng lova. A chhan chu, a ruka hralh a ni a. Chutah chuan Police emaw, Excise ten a chhun a zanin mi in an dap seng bik lova. A theih hram chuan Pu Speaker, Excise Minister hian min lo hriatsak sela, Check gate zawng zawngah te hian “Sniffer dog” an ti a, uifing, rim hre chak em em mai hmang ila, ui hian mihring aia hriatna a let 50 a chakin thil a hre thei a. Airport-ah te pawh kan hmu a, suitcase chhunga drugs te, bomb te pawh an man thei a. Chu chu tangkai zawka Mizoram sorkar Excise Department a ni emaw Aizawl-ah te, Lunglei-ah te leh khawpui dang dangah ui tha tak tak kan nei a. Chungte nena tang tlang in ruihhlo hi kan man chhuaha kan beih chuan awmzia a neih ka ring tlat a ni.

Tin, kan hriat angin kan awmna ramin a zir lova. Bangladesh leh Burma-in min karcheh a. Drugs leh smugling nasa takin a kal a ni tih hi chu phat rual a ni lo a ni. Chuvangin, kan phur a rit em em a, sorkar leh khawtlang leh kan za vaia mawhphurhna a ni tih ka sawi tel duh baw k a.

Tin, Demand no. 29-na Social Welfare Department-ah lut leh lawk ila. Social Welfare hi a lo huam zauin a tangkai tak zet a. Kan bial chauh ni lo, Zoram mipui mirethei zawkte inngahna a ni a. Thawktute pawh an taimain fakawm ka ti a. Theihtawpin an tang turah pawh ngai ila. A bikin tar pension te, pianphunga rualbanlote leh bengdar te thlengin engkim mai hi Social Welfare Department hian an lo nei deuh vek mai a, Rophumruk Department an ni deuh ber, an hman thiam chuan. Chuvang tak chuan a thawktute leh a changtu Minister lamte pawh kan tan thiam chuan bial hnufual deuh te tan pheh chuan Malsawmna Department an ni tih ka han tarlang leh duh a.

Demand no. 34-na, Vety Department hi kan hria a, intodelhna Department tur a ni a. Sa ei kan ni a, ar leh vawk te pawh hi Mizo society-ah chuan a lo bet tlat a. Vulh rawh ti lo mah ila kan vulh tho a ni. Mahse, bawng vulh erawh hi chu tihluh deuh kan ngai a. Chuvangin, sorkar ang pawh hian a variety tha, a breed tha min provide chuan ran vulhtute tan pawh hmasawmna a nih ka ring a.

Kan Minister-te leh vawiina ka thusawi ngaithla pha ten Mizoramin kan tih atana tha ka tih chu vawk rei tak vulh hi a hlawk lo va. Thla 6 thleng vulh hi a tawk viau a. Thla 6 hi a sa a hrisel tawk hle a, vawk upa lutuk sa te, ran upa hrim hrim sa

hi a hygenic lo va. Chuvangin, economy zawnga thlir te leh eng purpose-a thlir pawhin thla 6 hi a best time a ni tih kha ka sawi duh e.

Tin, Pu Speaker, (1 minute lek, member dang kan awm lo va, kan kep pawh ni chiah lovin extra min pe deuh la) Silk hi kan hria a. Khawvel ram chu sawi lo ila, Japan te, China te, khawchhak lam ram changkang tak tak hi, silk production an neih that em em vang a ni a. Keini ang duang chuan silk kan ha pha lo va, mi hausate thawmhaw a ni a. Khawvela species tha ber mai Muga variety hi North East-ah hian cultivable an ni a. Muga silk hi USA-ah te, Europe-ah te a chin theih lo va. Assam-ah te chuan nasa takin an kalpui a. Mihausa te chuan Muga silk sari neih an chak a, a nuai tel man a ni. Chu chu kan ramah hian potential a awm a, chuti takin sum sen a ngai lo va. Nauthak leh Bung kan chin chuan Muga silk production tha tak kan nei thei ang. Sericulture Minister pawhin prospect kan nei tha a ni tih a hriat ka ring. Pu Speaker, ka lawm e.

SPEAKER : Tunge sawi leh an? Pu C. Ngunlianbunga, member zahawm tak i lo sawm ang.

PU C. NGUNLIANCHUNGA : A bu chhung thu-ah budget-ah a tlem, a tam tih lamah luh vak ka tum lo va. A chhan chu ka hma ami ten an sawi tawh a.

A hmasa berah chuan Demand no. 31-na Agriculture-ah hian. Kuminah sorkar thar kan nei a, Minister viak tha tak, Minister chak tak tur kan nei a, abeiseina pawh a sangin ka hria a. Chutih rualin kan sorkar tharin programme a lo siam Socio Economic Development Programme (SEDP) kan tihah khan Agriculture lam side hi a lang ve ta lo reng reng mai a. Eibar hi kan intodelh loh chuan a khawnpui han tih kha chu, a khawnpui lam kha chu a rana rana lo deuh a ni. Zofate chuan buh kan ei loh hi chuan chaw eiah kan inngai lo in ka hria a. Chuvangin, helama hmasawwnna tur hi Mizoram sorkar, vawiin hi 8th Mizoram Legislative Assembly vawi 8-na a lo ni tawh a. Kan kal tawhna ka han en hian hmasawwnna Agriculture-ah a tlem hlein ka hria a. Chutah chuan kan Minister zahawm tak pawh hian ngaihtuahna thar han hmang se tun ai hian han tang leh zual se a neih ang ang, kan intodelhna tur hian hma lak a tul hlein ka hria a. A bik takin Agriculture hnuai hian RAD scheme tih te, PMKSY tih te, RKVY tih te, PKVY tih scheme-te hi a awm a. Sorkara kan awm ve laite pawh khan kan bial angah cluster anga thlante a ni a, RAD scheme tih ang chi te hi. Tuna kan kalphung anga khami cluster chhunga ram nei zawng zawng

intanpui tih ngawt ang chi te kha hmasawna hi a awm lo a ni. Chu ai chuan a tihlawhtling thei tur leh kan kal dan kha project scheme system khan kal ila, a thawkte hi intanpui ila, a thawkte hi chawikang ila. A area-ah khan chhungkaw 100 an lo awm a nih pawhin, a chhungkaw 100 mai ni lo khan chhungkaw 30 chauhah pawh in concentrate ila, hlawhtling zawk ta se, kan ram hian hma a sawn ka ring a. Ka bialah nikum hmasa lamah khan Sihtlangpui-ah te, Chawntlangpui-ah te he RAD scheme hnuaiah hian hna lak a ni a. Thenkhat hnenah ar vulhna pek a ni a, a pawisa an pe ringawt a, vulh tak tak pawh a awm chuang lo. Thenkhat sangha khawi tanpuina a ni a, pawisa an pe ringawt a, khawi pawh a awm chuang lo. Socio-forestry an ti a huan nei lo te. Thenkhatah tanky siamna tur a awm a, tanky nei awm tawh saah rawng an va hnawih tha leh a, khati mai maia kan ram kan kalpui hian Zoram a tihmasawn lo a, thanna thar kan la thei lo a ni tih hi vawiinah he House zahawm takah hian ka sawi duh a. Chuvang chuan kan Agriculture Minister zahawm tak, chak tak, tunah pawh kan hriat ang khan kan ramah harsatna, thlai chingtuteah a awm a, a hmunah, loah a kal zat zat mai a, beiseina sang tak kan nei kan kal chhohnaah hian. Heng kan central scheme-te pawh hi hlawk zawka hman theih ni se tih ka sawi duh a.

Tin, keini lam saw, a bikin Lawngtlai bialtu MLA zahawm tak Pu H. Biakzaua khan a sawi a, Chamdur-te, Tuichawng dunga awm kan ni a, potential nei tha pawl tak kan ni. Mahse, kan WRC tih danah pawh hian kan thei sem a. District pakhat 50 hectare emaw, 100 hectare emaw lek lekin kan insem a, hlawhtlinna tur a awm lo a ni. Chu ai chuan project system-in kal ila. Kuminah Kolasib District/Mamit District kan thlang a nih chuan thlang mai ila. Tichuan, nakumah Lunglei District/Lawngtlai District kan kal a nih pawhin tikhan kal ila, kan bawh chinah hian rah chhuak ila, hlawhtlinna kan hmu awm mang e. Kan bialah sawn leilet hi Agriculture Department atangin min laih sak thin a, kan lawm khawp mai. Mahse, chutih rualin darkar 30, darkar 20, darkar 10 te, ni 2, ni 3-te emaw kan han laih sak a, khata tang ngawt khan ei leh bara ropui taka intodelhna tur hi chhuah ngaihna a awm lo a ni. Chu ai chuan Tuichawng dungah Lawngtlai District zawng zawng mai kha lut ta phawt mai se, Siaha District chu Phura-ah emaw, Lawngtlai East lam a nih pawhin Hmunchhumtual lamahte emaw, tikhan a project thlan bik neiin kal ta ila kan hlawhtlin chhoh ka ring khawp mai a. Potential tha tak tak Mizoramin kan neih lai hian, kan kal rei tawh a, ka hmaa West Tuipui bialtuin a

sawi ang khan kan tih dan hi a luau luau deuhin ka hria a. Chuvangin Agriculture-ah khan theihtawpin hma thar, ruahmanna thar nen min han kalpui se. Kan Chief Minister zahawm takin, 'Thingkhawnah pawisa a awm' a ti a, tun ami pheih chu a 'chi tur' a ti a, a chi lo tur atangte pawhin pawh chhuah tur a awm theih ka ring a. Chung atang chuan Agriculture, ei leh bar kan intodelhna ber tur hi dah pawimawh ni se tih kha ka han sawi ve duh a.

Demand no. 37-na, Co-operation hi Mizoten kan thiam lo khawpin ka hria. Nikum hmasa khan Gujarat-a Gandhinagar-ah, khatih hun laia kan Finance Minister-te leh Agriculture lama kan hotute nen kan zuk kal ve a. Chulaia kan hmuh chu alu an lo ching nasa em em a, society khan alu chi kha a hun takah an lei sak a, alu kha a hun takah an ching a, an thar chhuah kha cold storage mimalin PMGP hmangin ₹1000 crore man dawn kha tha deuhin a sa a, an alu thar kha, kha cold storage-ah khan an lo dah sak a, a hun takah alu a thar a, a hun takah alu an hralh thin a ni. Chu chu society-te tih a ni a. Mizorama kan society tih ve dan chu pawisa insem tur ang zawnga ngaih dan hi kan neiin ka hre thin a. Helaiiah pawh hian hma thar kan lak a, society-in hma chak taka an lak a thain ka hria.

Demand no.47-na, Minor Irrigation hi kan bial lamah pawh hian kan mamawh. Hei pawh hi ka sawi hnu ang tho a ni. Thei sema insem lo hian project wise-in kal se. Tum bik, thlir bik, tin bik nei ila, chutiang chuan hma la ila kan hlawhtling ang tih ka ring a, beiseina sang tak ka nei a ni.

Tin, Dr. K. Beichhua Demand no. 7-na Excise & Narcotics Department. Nichinah khan kan hotuten, ka thianten an sawi teuh tawh a. A hlauh lamah chuan a pung nasa khawp a. Amaherawhchu, man-power lam tihna tur erawh chu a awm lo khawp mai a. Sipai General, sipai nei lo a ang dawn khawpin ka hria. Eng tin nge zu kan khap a, khaptu kha nei teuh se la, thingfak nen nge ni an kal dawn a, kein nge ni an duty dawn? Zu an check-na tur leh zu buaipui, zu khapna tura an kalpuina turah khan kan thingkhawn dah that, rap chung ami ni lo atang khan pek belh dan awm se a pawimawh khawpin ka hria a. Chutiang a nih loh chuan hah takin a thawk ang a, zu kan khap a, zu duh kan tam si a, a enzuina tur atan khan man-power an mamawh, scooter-te pawh an mamawh ang, bike-te pawh an mamawh ang, tumphit kan ti em ni, khangte te te pawh mamawh tam tak an nei a. Kan Finance Minister, kan House Leader a awm lo a, kan speech-te pawh a la hre turah ngai ila, Excise & Narcotics

lamah duhsak hle an ngai a ni. Chutih rualin Lawngtlai East bialtu zahawm tak Pu H. Biakzaua khan a sawi tawh a. Lawngtlai-ah sawn Excise & Narcotics Department hian hun rei tak atangin ram hmun laili tha takah a lo pe tawh a. Tin, Lawngtlai saw hmun pawimawh tak a la ni dawn tlat. A chhan chu Myanmar-te leh khawchhak ram zawng zawngte nena Mizoram an rawn luhna tur a nih avangin, sorkar hmasa pawh khan a ngai pawimawh a, IR Battalion Thingkah-ah a dah hial a ni. Ruihhlo Saisih lam atangin a ni emaw, Zochawchhuah lam atangin a ni emaw, a la rawn lut nasa dawn a. Chung ang lo check thei tur leh lo veng thei tur chuan Lawngtlai-ah sawn Excise SP office min dah sak ve ngei se tih ka sawi duh a.

Tin, Demand no. 29 na – Social Welfare. Hei hi kan Chief Minister zahawm tak khan Chief Minister a nih a Press Conference a neih khan ‘ruihlo ngaite chhanchhuahna hna hi kan ngaih pawimawh leh kan hna hmasa tur a ni’, a ti a. Mahse, budget bu kan en chuan Social Welfare Department, Demand no. 29 – ah hian Establishment & Rehabilitation of Home, minor works-ah hian ₹87.45 lakh chauh a awm a. Hei hian hna ngaih pawimawh ber leh hna hmasa ber tur thawhna tur kha a va nep em! Hei hian eng Home nge, kan ruihlo ngaite chhanchhuahna tur hi hei hian eng nge a thawh ang? Chuvangin, vawiinah hian kan Minister chan, Social Welfare Department-a heng ang ruihlo ngaite Rehabilitation Home enkawlna tur hian thingkhawn dah that atang khan a tam thei ang ber pek ni ve se tih kha ka sawi duh a.

Tin, a pahnihaah chuan De-addiction Centre, minor works-ah hian ₹10 lakh chauh dah a ni. Kan hre theuh a, ruihlo ngaite enkawl ngai, chhanchhuah ngai kan ramah hian an tam em em a. Kan fate, kan control theih loh te an ni. Chungte enkawlna tur chuan sorkar hnapui ber hmalakna tur hi a van ho teu teu ve! ₹10 lakh tih vel hian eng ram ropui nge kan thlen ang aw tih ka sawi duh a.

A tawp berah chuan Pu Speaker, khawngaih takin ka Department enkawl hluite a ni ve a, AH & Vety hi kan sawi ve lawk ka duh a. Helaiyah hian kan Minister hi a fakawm ka ti a. Kan hun ve lai khan hmachhawp tam tak kan nei a. Thenzawl-ah te kel lian chi vulhna tur kan ti a, kan zawh hman chiah loh tunah an tan tawh a. Tin, sial chi tih punna tur te pawh kalpui a ni a. Tin, Ramrikawn-ah khuan ran chaw herna, tunhma nikhata 8 qtl lek kha 8 mt dawn nikhata her theihna 5 crore laiin kan siam a. Tin, Tanhril-ah khuan ar farm lian tak, ZPMS an ti a, Zoram Poultry Society

te nen dinin; tin, Thingsulthliah-ah khian vawkpui 200 vulhna tur a awm a. Khang kha kan hunlai khan privatization, outsource tum turin, hma la turin kan ti a, tihfel hman a ni ta lovin ka hria a. Kha kha department-in a enkawl reng hian burden, phurrit a nei a. Khang ang chi kha chu outsource zung zung ta ila. Tichuan, farm tu ten emaw, entrepreneurship ho in emaw an lo neih atang khan sorkarah revenue an rawn chhung ang a. Sorkar in sum a sen reng thin kha resource a rawn nei thei dawn a. Khangah te khan hma la thei se tih a duhawm hlein ka hria. Pu Speaker, hun min pek belh avangin ka lawm e.

S P E A K E R : Er. H. Lalzirliana, chumi zawhah Pu Chhuana.

Er. H. LALZIRLIANA : Pu Speaker, ka lawm e. Vawiinah Pu Lalrinsanga, Minister zahawm tak leh Dr. K. Beichhua department chante present a ni a, sawihona. Hei hi a detail a luh ka tum lo va. Ka han sawi duh lai zawk chu pawisa tam tham tak hmasawnpui nana hmantlak budget an rawn present a ni tih hi ka sawi thiam dan a ni a. Department zawng zawng pawh ka hrut kual hmanin ka ring lo va. Ka hmaa rawn sawitu member zahawm tak kha NLUP expert a ni a. A advice kha a lak tlak hlein ka ring a, experience atanga an rawn sawi tawh a ni a. Chuvangin, an advice kha pawmtlak turah ka ngai hle a ni.

Agriculture Department bik hi han sawi ta ila, sum tam tak a awm a. Tunah hian Agriculture Department hnuaiyah focus a awm a, chu chu fostering climate resilient upland farming systems tih a ni a. Chu chu Northeast-ah Nagaland leh Mizoram hi project tihna tur a ni a. Mizoram-ah hian district 4 tunah thlan a ni a. Chutah chuan, kan district pawh an telh ve avang hian lawmawm ka ti hle a. Chumi chu IFAD (International Fund for Agriculture Development) tih International Financial Institution, hei hi hnam hnuafual zawk te, rethei zawk te chawikanna leh retheihna um bona tura hma la thin a ni a, kum 6 chhung project a ni. Hei hian Green Revolution kan sawi kan sawi hi min thlen dawn ni te in ka hria a, a lawmawm ka ti khawp mai a. Kan sawi tak ang khan kan ram hi engkim that duhna kan ti a. Tin, an district han thlanah hian focus project hnuaiyah hian khawthlang lam te, kan phai ram tha, develop theih, potential area an rawn hmu pha hi lawmawm ka ti khawp mai a. India ram pum pawh han thlir ila, kan economy rawn tum tute chu phaia cheng hote an ni. Keini Northeast mi-ah pawh hian tlang rama awm reng tho, a bulthut lui bula awm tho hi an awm ve bawk a. Keini Mizo te hi chuan tlang sang

sang kan han chuh a, phai ram develop tlak tam tak kan nei a. Tunah hian chungah chuan potential tam tak a awm a ni. Chumi tur chuan kawng tha kan neih a ngai a, link road. Vawinah hian Tut phaizawl te, Teirei phaizawl tea kan thar te hi kawng tha chu nei ila darkar 2, darkar 3 lekah Aizawl tlang te, Champhai te han thleng thei se la, market a awm chuan tharchhuah hi chu a awm a ni.

Tin, chu mai piah lamah chuan, roadways mai piah lamah waterways develop tur pawh hi potential a awm tih kan hriat a pawimawh a. A bik takin khumi Dapchhuah, Tut kan tih khu, tui a tam lai leh ruahtui, fur lai chuan lawng ten an kal ve thin a ni, Speedboat kan tih ang chi ten. Chu pawh chu thal lai a nih chuan suar chhia hmun li, hmun nga a awm avangin a kal theih tlat loh. Ka zir chiang tawh a, Tut, Dapchhuah atang khuan Bairabi kai thleng thleng tur khuan suar chhia, bomb darh ngai hi 5/6 bak a awm lo. Khung kan tui kawngte khu han develop ila a kam phaizawl lei thaah hian thlai chi hrang hrang leh kan thar chhuah theih tam tak hi a awm a. Chu chu a kalpawhna a that phawt chuan kan mite hian hnathawh hi an hreh lo. A market a awm tlat loh avangin hnathawh tha a tho thlawt lo a ni. Chuvang chuan, chungte chu Transport Minister te leh Agriculture Department te pawh hian min lo hriat sak sela, a tangkawp zawnga waterways develop dan te hi a awm lawm maw ni le, tih te hi min ngaihtuah sak se ka ti khawp mai.

Tin, Vety. hi a pawimawh khawp mai a, thingtlangah chuan Vety Department kan hriat dan hi a ler ang reng khawp mai a. Arnote sem tih bak leh thil dang tam tak hi kan hriat tam loh, ui nei ho hian an va chiu tir thin ni te hian kan hria a. Chuvang chuan Vety Department hi a pawimawh a, tunah SEDP hnuaiiah project hrang hrang kan han take up dawn a. Chungah chuan ti kawp dum lo in cluster area ang te hian then ta ila, vawk vulh tur area te, ar vulh tur area te, bawng, sial area te pawh hi han nei ta ila. Tin, ka bialah Lengte leh Nghalchawm te, tui pawh a tha a. Tin, tunah hian vawk vulhna note tih chhuahna tur project lian te pawh a awm in ka hria a. Hengte pawh hi khitah Burma atanga lak ngai lo in heta tang te hian kan vawkte sem tur te intodelh ta ila. Jack of all trades, master of none, tih ang deuhin kan ti kawp dum a, kan ti pherh ang reng riau a. Khatiang ai chuan khatianga cluster area wise te a han then a, a ti tur bik te pawh kha han thlan theih ni sela. Chungte chu min han bengvar sak sela tha in ka hre deuh a.

Hei Excise & Narcotics tih hi zu kan khap chuan, another alternative chu drugs a ni mai a, chu chu oil industry-ah chuan kan hmelma number one chu fire a ni. Fire rawn awm tir tu chu thil pathum a awm a, pakhat chu source of ignition a ni a, pakhat chu air, oxygen, pakhat chu a kang tura kha. Chutiang chiah chuan engemaw pakhat kan tih bo khan, source of ignition a awm loh khan a kang thei lo. Oxygen chu readily available a ni a, a awm reng a, a kan tura pawh a awm reng. Amaherawhchu a rawn ti kang tu tur, a source of ignition kha kan erase chuan a kang ta lo a ni. Chutiang chiah chuan zu leh in tu tur leh supply tu tur an awm a, khawi emaw ber a kha kan erase a ngai ta a ni. Zu chu a awm sa, a awm leng lung a, kan state bul lawkah, a in tu tur pawh kan awm ka ring. A in tur a kha engtin nge kan arrest ang? Khalai kha, khami khawi emaw bera kha, a mihring in tu tur kha, a khawi emaw bera kha kan invaw hlum vek a nih loh chuan a theih loh a. Tin, a in tur lah kha an siam reng dawn bawk si a, chuvang chuan a supply chain a kha kan combat a ngai ta a. Chumi ti tur chuan force kan mamawh a ni. Chuvangin wawiinah hian kan tih dawn chuan engnge kan hmanraw mamawh? Lo vattu chuan chem hriam tak a mamawh angin kan beih tur kha kan hriat a ngai a, chutiang chuan kan lo in equip ve a ngaih tih hi chu beng nei chuan hre rawh se tih ang deuh a ni e.

Tin, Irrigation chungchang hi a pawimawh khawp mai a, kan Minister in Mamit ah te pawh Irrigation Department tih kan tum e, a ti a. A hre dik ka ti a, a ti dik ka ti a, khulam khu potential area a ni ka tih kha. Tui hi India ramah pawh kan buaipui a, Godaveri Water Dispute Tribunal te pawh a awm a ni. State leh state te pawh an lo inbeihna a ni a, Tamil Nadu leh Karnataka-ah te. Khatiang khan tui hi harsatna kan nei. Mizoram-ah chuan Pathian zarah kan la vannei a, ruahtui tha tak kumtluanin kan dawng a, heng te hi kan hman tangkai thiam a pawimawh hle a ni. Agriculture develop tur chuan irrigation tha kan neih a ngai, chutiang chuan co-operative society, co-operation hi kan hmang tangkai thiam tawk lo tih kha a dik khawp mai a. Kan Minister in min lo hriat sak sela, Mamit ah khuan Co-operation hi thar deuhin an ding ve a, society te pawh an ding ve a, primary society te pawh an ding ve a. An mamawh leh an budget te pawh an han present ve a, amaherawhchu pakhatmah approve sak an ni lo a, chuvang chuan che thei miah lo in tunah chuan an awm a ni. Chungte chu min lo hriat saka, tihpuitlin dan min ngaihtuah sak theih chuan kan lawm hle ang tih ka sawi tel duh bawk a ni.

A dang hi kan sawi ve leh hram ang e, a nih leh ka sawi tawh lo mai ang e. Ka lawm e.

SPEAKER : Tunge phar hmasa kha an awm em? Pu Chhuana kan ko tawh tlat kan ziak tawh e. Member zahawm tak Pu Lalchhuanthanga.

PU LALCHHUANTHANGA : Pu Speaker, ka lawm e. Vawiinah hian demand kan sawi tur te hi a pawimawh khawp mai a. A langlo lamah hian an pawimawh a, chuvang chuan demand tam tak hi kan sawi hman lo ang a, a hmasa berin Demand no.37-na Co-operation-ah hian bul han tan ta ila. Co-operation hi department pawimawh tak, department senior tak a ni. District Council hun lai atang tawha he department hi awm tawh a ni, 1972 UT hun lai khan Registrar neiin puitling takin a lo awm tawh a ni. Amaherawhchu he department hi kan sorkar kal tawh te hian a buk thelh hian an thelh ni hian a lang thin a. A pawimawhna ang leh mipui tan a tangkai tur ang hian hman tangkai a la ni lo tlat mai a, a pawu khawp mai. Tin, he department lu ber hi Registrar a ni a, IAS post a ni, hetah hian kan sorkar hruaitute hian in eng emaw kahpah ang deuh hlek hian Registrar tur hi an rawn ruat thin a, thla hnih thla thum lek lekah an transfer leh thin a, an han inchul nel dawn chauh a an transfer leh mai thin a.

Co-operation department hi India ram state pawimawh leh lian hausah te chuan an ram, an state economic khawih nghing lawih tham an ni deuh zel a. Chuvang chuan kan Minister pawh hian kan thusawi hi lo ngaithla chiang deuh sela, tuna kan sorkar flagship programme SEDP nen te pawh hian kal kawp thei chi tak ni te pawhin ka hria a. Miretheite chawikanna tur hmanraw tha tak tak hlir he department-ah hian a awm a ni.

Tin, kan han sawi tak ang khan he department hian ngaihsak a hlawh lo khawp mai a, post hnawh khah loh hi a tam khawp mai a. Senior Inspector post 18 turah hian post 9 hnawh khah a ni a. Junior Inspector post 28-ah hian filled up hi post 8 lek a ni a, post 20 hi hnawh khah loh a ni. Chutiang bawh chuan UDC te, LDC te leh Office-a hnathawkte pawh an indaihlo khawp mai. Chuvang chuan he department hi ngaihtuah deuh ni se.

Tunah hian Inspector 16 an awm a, heng hian state level society-te leh society zawng zawng 1300 an enkawl a, an indaihlo hle ang tih kha chu chiang sa a

ni a. Chuvangin he department hian ngaihsak hlawh deuh se, kan SEDP flagship programme-te nen pawh hian han kal kawp ta se, kan economic dinhmun hi nasa tak danglam dawrh thei turah ka ngai a.

Pu Speaker, demand 7-na sawi leh ta ila. Demand 7-na hi Excise & Narcotics a ni a, hetah hi chuan pawisa hman tur pawh hi a pung tam khawp mai a; 39.87%-in a pung dawn a ni a. Zu leh ruihtheih thil kan han khuahkhirh dawn a ni a, hetah hian tan lak a ngai dawn khawp mai a. Dan-te kan han nei thar a, khang te kha tha taka kenkawh a, hremnate pawh hi na deuh zawka lek te hi a tha awm mang e ka ti deuh a. Kan Rules 7-naah khan hremna kenkawh dan turah khan small, intermediate leh commercial-ah te kan then a. Khang kha a quantity lam zawng sawina deuh a ni a. Amaherawchu, helaiah hian zu chi hrang hrang- beer, IMFL-te leh Mizo zu-te kha thliarfel ve leh deuh hlek ni ta se, hremna tih dan turte pawh kha a chiang deuh turah ka ngai a. Hremna kengkawh tur hi chuan kan dan te hi a felfai a ngai thin a.

Tin, section 32-naah khan, zu zawrhna hmun leh a siamna hmunte, khalaia ram neitute kha hriattir an ni ang tih a ni a. Kha kha a ho ang reng khawp mai a. Hengah te hian an LSC-te pawh hi cancel thlenga kan dante hian huamtir ni ta se kan khapna-te pawh hi a kal that deuh ka beisei a. Kan han khap a, prohibition kan han puang a, a pung leh hluai mai ang tihte pawh kha a hlauhawm khawp mai a. Chuvangin kan dan hi felfai zawka kenkawh a, kan tih chhoh hi a pawimawh dawn khawpin a lang a.

Tin, Chapter 6-naah khan 'State Prohibition Council' a lo lang ve leh a. Hei hi eng ang dinhmuna ding chiah nge a nih tih hi ka hrechiang lo a, kan Minister khan nakinah min hrih chiang ta se. Eng thuneihna nge a neih tihte pawh hi hriat a chakawm khawp mai a. Hei hi ka hmuh danah chuan tul lova sum khawhralna mai mai te pawh hi a ang deuh a. A nihna takah chuan department hnathawkte, kan Excise Force te leh staff te dukhawp lohna te pawh hi a kaw deuh rum rumin ka hria a. Chuvang chuan hetiang a laia Council lo awm vea lo tih ve khan kan hnathawktute, kan Excise Force te leh kan Police Force te tana harsatna siam thei a nih ka'n ring deuh hle a ni.

Pu Chairman, demand 31-naah hian kal leh ta ila. Agriculture Department hi department lian leh hlun tak a ni a. Tunah hian an pawisa hman tur hi 23.38% a kiam tlat mai a, a pawi khawp mai. Hei hi thingtlanga kuthnathawktute lo inngah

vena ber kan budget-ah hian a kiam ta duai mai a, a pawl khawp mai. Agriculture Department hi Mizoram mipui 60%-70% vel in kan innghahna a ni a. Amaherawhchu, hei hi ministry kal tawhte hian kan enkawl thiam vaklo nge ni a, a nihna tur ang hian a ni thei lo a. Sum tam tak hman tawhna thin ni si hian kan ram hi kan intodelhlo viau mai a. Ei leh bara kan intodelhna tur hian ka ngaihndanah chuan Minister pakhat hian Agriculture Department hi mal thlur sela, department portfolio dang nei lo hian. Kan ram ei leh bara kan intodelhna tur hi chuan Agriculture hi a ni lo thei si lo a. Chuvang chuan hei hi ngaihpawimawh leh zual a thain ka hria.

Tin, he department-a pawimawh tak mai pakhat chu link road chungchang hi a ni a. Link road hluihlawn hi a tam hlein ka hria a, tam tak te hi chu fur laia kal theih loh, thal laia kal theih ang chauh te an ni a. Chuvangin, link road hi a that loh chuan kan agriculture product hi a sang thei dawn lo hrim hrim a. Chuvangin link-road maintenance nan hian sum te pawh hi dah tam deuh ni se a that ka ring a. Chung atang chuan ei leh barah hma kan sawn theihte pawh a rinawm. Chung chu ka sawi theih ni tawh mai se, ka lawm e.

SPEAKER : Member zahawm tak Pu Lalrinsanga Ralte kan sawm e.

PU LALRINSANGA RALTE : Pu Speaker, ka lawm e. Sawi tur a tam ang reng si a, hun kan nei tlem si a, ka sawi deuh pawr pawr ang a. A hmasa berah chuan Demand no. 29-na Social Welfare Department hi han sawi ka duh a.

PU LALRINSANGA RALTE : Social Welfare Department hi kan hriat theuh angin engkim huap department pawh a tih theihin ka hria a. Anganwadi atanga Master Degree an neih thlengin zirna lamah; tin, ruihhlo ah pawh a enkawl dan, a ven dan, a buaipui chhonzawm dan thlengin engkim mai hi Social Welfare Department-ah hian a leng a ni tih kan hre tlangin ka ring a.

Term hmasa lamah chuan high protein biscuit kha kan lar pui a, tunah erawh chuan a tha lam zawngin thil dang lar pui kan tum chho turah ka ngai a. Helai hian Social Welfare Department Minister leh kan department official te pawhin tan an laka, kan ram damna, kan ram himna he department atang hian tih theih tam tak a awm a ni tih kan hriat a thain ka hria a ni.

Kan Minister chak tak Pu Beichhuuaa hnenah pawh lawmthu sawi ka duh a. Hun reilote chhungin Tribal Girls Hostel 10 lai a nawr chhuak a. Tin, Eklavya

School, central school tha zet mai tur tunah hian 5 an nawr chhuak a ni. Chutah chuan ka bial chhung Bilkhawthlir te pawh kha a tel ve a, kan lawm hle a. Tin, social security lam ngaipawimawhin drugs treatment leh rehabilitation lamah pawh nasa taka tan lak tumin tunah hian an inbuatsaih chho niin ka hria a.

Tin, thalai kum 10 atanga kum18 inkar te ruihhloa an inhnamhnawih dan te zawn chhuaha, hma lak chhoh hi tunah hian kal pui an tum chhovin ka hria a, ka hriat sual loh chuan tun hi India rama a vawikhatna tur ni hial te pawhin ka hria a. Hemi kawngah pawh hian a lawmawm ka ti a. Social Welfare Department hi kan ram leh kan thalai te kan siama kan enkawl chhoh theihna atana department pawimawh tak an nih avangin kan official te leh kan Minister te pawh hian tan la chho zel turin ka beiseiin ka sawm bawk a ni.

Chutia kan sawi rual chuan ka bial khu ramri dep kan ni a, vawiina kan Minister pahnih te department nen a in relate vek mai. Tuna kan mamawh leh kan harsatna te kan sawi hi Zoram mamawh a tling phak a ni tih min hriat sak turin ka ngen hmasa duh a ni. Vairengte-ah khuan kan hriat theuh angin tunah pheih chuan zu khapna kan han kal pui a. Ruihhlo ti Zoram hmun hrang hrang atangin an tla thla nasa hle mai a.

Tunah khuan enkawltu tur, buaipuitu tur mumal tak an awm thin loh avangin Block MHIP ten Hope Centre an din a. Tin, Revival Team ten Golgotha Camping Centre te dinin hmun nghet pangngai ang deuhva inbunin tunah khuan Mizoram puma thalai khunglaia tla thla te Pathian thu ah te enkawlina hmun an han siam a. Khungte khu ngaihpaawimawh a, department ang te pawhin tanpuina sum kan pek theih chuan a lawmawm ngawtin ka ring a ni.

Tin, kan sawi tawh ang khan hmar bial area kan ni a, Pu Speaker, nang pawh i bial Chalfilh bialah pawh a nih ka ring a. Kan bial area tuna HPC demand area hi a bik takin ngaihthah hi a lo ni hle mai a, eng department atang pawhin, chuvang chuan khang kan sawi te kha kan Minister zahawm tak hian Social Welfare Department atanga tanpui theihna awm ang ang te min duhsak deuh turin ka han ngen a.

Tin, Bilkhawthlir ICDS-ah hian staff kan indaihlo khawp mai a, Computer khawihthu tur Data entry Operator emaw, Computer Operator emaw kan mamawh

hle a ni tih min hriat sak se. Office run a nih a, office a kal dawn chuan computerised te a lo ni tawh si a, khawih thei kan awm tawh si lova. Tlawmngaiin tute emaw te kan khawih tir mai mai a, daily rate ang deuh te in. Chu chu min ngaihtuah sak turin ka ngen bawk a. Tin, Vairengte-ah khuan kan VC te enkawlin Anganwadi hi kal pui a ni a, khung te khu sorkar a min lak sak theih dan a awm lawm ni tih ka sawi duh bawk a ni.

Demand no.7-na Excise Department hi han sawi ve leh ka duh a. Vawiinah kan ram natna tihdam tumin zu kan han khap a ni a. Chulaiah chuan kan excise force te hi an tlem hle mai a. Tunah hian sipai 440 leh tlem vel kan nei niin ka hria a, excise force kan neih te hi an beitham hle mai a. Tunah hian kan Minister chak takin hma lain thla ruk chung lek hian excise sipai 33 lai lak theihna advertisement an chhuah tawhin ka hria a.

Tin, nichinah kan Chief Minister zahawm tak, Finance Minister ni bawkin zawhna leh chhannaah khan tul leh mamawhah sum hman tur a awm theih thu leh 'kan buaipui chhunzawm dawn nia, rawn dil rawh u', ti khan a sawiin ka hria a, a lawmawm ka ti hle a ni. Vairengte khu khaw hmawr tawp a ni a. Tunah khuan Mizorama ruihhlo kan tih, a bikin zu 70% hi Assam atanga rawn lut khu niin ka hria a. Khulaiah khuan Vairengte hi kan hre hlur ringawt a, Saiphai lamah te, Phaisen lamah te luhna tam tak a awm a ni. Kawng 4/5 khu a awm tlat mai a.

Chuvangin a theih hram chuan Excise Check Gate hi Phaisen leh Saiphai-ah hian kan mamawh hle mai tih ka sawi duh a. Tin, khulai Mizoram chhunga zu rawn luh tamna hmunpui ber Vairengte-ah khuan Excise office chu kan nei, Inspector pakhat leh Sub-Inspector pahnih, Head constable pakhat leh sipai 11 kan nei a, a vaiin 15, a beitham khawp mai a. Khulai kan hmun pui khu prohibition a hlawhtlin theiha, ruihhlo a rawn luh tlem kan duh chuan Vairengte-a kan Excise hmun khu kan tih chak hle a ngai a ni tih Minister chak tak hian min hriat sak se a lawmawm hle ang.

Tin, Demand no.34-na AH & Vety-ah hian han sawi ve leh ka duh a. Kan hriat theuh angin kan ramah sa kan intodelhlo hle mai a, vawk te, bawng te pawh engkim maiah kan intodelhlo tih kan hria a. Chulaiah chuan nasa takin kan hotute hian hma an la chho turah ka ngai a. Kan hmalakna turah hian a pawimawh ber chu nichina Mamit bialtu zahawm takin a sawi ang khan ruahmanna tha tak neiin kan

intodelh theihna tur pawh hi idea tha tak pawh nei mah ila, a thawktuah te; tin, a hmunhma te kan neih that loh chuan awmzia a awm chuang lova.

Chuvangin keini hi Agriculture a ni emaw, Vety lam a ni emaw, Fishery lam a ni emaw potential area kan ni a. Kan hriat angin leilet phaizawl, khulaiah vai ho nena inawmchilh reng kan nih avang khuan bawng kan vulh nasa a, beram te, kel te, vawk leh ar te, chungah chuan kan bial Serlui pawhin Vety atang pawh hian Mizoram mamawh tam tak kan rawn pui thei dawn che u a ni tih ka sawi duh baw k a ni.

Chuvang chuan Saiphai-ah te khuan Vety Minister zahawm takin min hriat sak tura ka duh chu Vety staff hi MR pakhat a awm thin a, kum 2014 khan an sawn a, chuta tang chuan Saiphai-a Vety department-a awm Staff pakhatmah an nei ta lo va. Quarter leh an hmunhma te khu a tlabal ta viau mai a. Chuvang chuan Saiphai-ah khuan Vety staff pakhat tal min dah sak a, quarter te khu min chei that sak loh chuan khulai khu ramri depa awm an ni a, ka sawi tawh ang khan, state dang atanga ran rawn lut ran hrisello tak tak te pawh a awm thei, chung lo danna tur chuan a tulin ka hria a ni.

Tin, N.Hlimen khua-ah VFA thawklai kha January ni 21, 2011 khan a boral a. Khata tang khan aiawh dah a ni ta lo hrim hrim mai a. Department quarters leh hmunhma kan nei a, chungte pawh chu cheibawl a dah leh theih ni se a thain ka hria a. Tin, Buhchangphai-ah Vety. quarters te, office te luah tlak lohin a awm tawh a. Tunhma chuan VFA te an awm thin a, kan rauh san viau tawh mai a. Khungte khu kan cheithat a, a hnathawktute kan pek phawt chuan kan bial atang khuan nasa takin kan ram mamawh hi kan rawn puhruk thei dawn a ni tih ka sawi duh baw k a. Tin, Bilkhawthlir-a Vety. Department RAH Centre an tih hi a area coverage zau tak a nih avang khuan dispensary a min dah sak theih ngei ka beiseiin ka han ngen baw k a ni.

Tin, Pu Speaker, Agriculture leh Irrigation hi ka sawi kawp tawh mai ang a, Demand no.31 leh 37 hi. Nichina term hmasa lama kan Minister zahawm tak ni thin, member zahawm tak Pu Ngunlianchung a rawn sawi kha tha ka ti a, dik ka ti khawp mai a. Kan lo kal tawh dan a lo diklo a nih chuan huaisen taka a dik lam pan tura kan insiamrem hi a thain ka hria a. Kuthnathawktute kan chawikana kan khaichhuah dawn chuan election oriented ni lo zawngin, kuthnathawktute chawikan duhna tak

tak rilru pua kan sum neih te hi kan hman phawt chuan kawngro a su dawn a ni tih ka sawi duh a ni.

Chuvangin Agriculture-ah pawh hian kan Agriculture Minister pawh hian min hriatpui viauin ka hria a. Mizoram-ah chuan potential area nei tha ber kan nih ka ring a, Kolasib District hi. Kan Minister zahawm tak hi han fak lawk ka duh a. Ka bial chhunga kuthnathawktute hian zan khat chu kei pawh min hrilh lo a, an lo han lenchilh a. (Pu Speaker, ka sawizo tep. Minute 1 lek a ni ang)

Khulai leilet hmun tha tak kan neih, vai enkawl thin khu tihchhuaha Mizo te hi kan intodelh thei a ni, kan leilet hmun te hi kan siamtha thei a ni tiin fuihna a lo hrilh a. An haw thla a, thian hlawm hnih hlawm thum hian an insiam a. Chulai ah chuan kan Mizo leilet tha tak tak nei te, vai enkawla hlawkna tel tak tak lo khan vai an chhuah tir a. Anni ho chuan enkawlin tunah hian nasa taka buh ching in tan lak an tum chho a. Chungah chuan kan Minister zahawm takin ruahmanna a lo siampui te, a lo fuihphur te kha lawmawm kan ti tak zet a. Chuta an mamawh tur tractor pek a tum chho zel hi lawmawm ka ti tak zet a ni.

Chutiang chuan kan Minister zahawm tak pawh hian potential area kan nih zia min hriatchian sak a, hetiang a hma min lakpui hi lawmawm kan ti a. Chulaia han sawi ka duh chu potential area tha ber nei siin a kum 1976 atang khan (kum 43 a upa anih tawh chu) Bilkhawthlir-ah khuan Agriculture IB kan nei ve a, a chhe tawh khawp mai a. Khualchhia/khualtha, farmer lampang hotute kan dawng ve nasa si a. Khungte khu min sak that sak theih hram chuan kan lawm ngawt ang. Tin, Bilkhawthlir-ah SDAO nei reng thinin kan nei tawh lova. Hengte hi hunrei tak ata kan neih tawh loh kha, a hmunpui lai a ni si a, SDAO min dah sak theih chuan kan lawm ngawt ang.

Tin, Bilkhawthlir-ah Agriculture Department hian godown tha tak an nei thin a, kum 10 lai kalta atang khan enkawl zui loh a ni a. Hetiang a buh leh bala intodelha, agriculture lama tan lak kan tum chho dawn a nih chuan kan Agriculture godown te khu hman leh theih turin min siam sak leh se tih ka sawi duh baw a. Tin, Pu Speaker, pakhat lek ka sawi tawh ang. N.Hlimen ah khuan AEO post kan nei thin a. Chutah chuan staff MR, IV Grade 1 a awm ve a. Hmunhma kan nei tha a, khungte khu thuamthat theih ni se tih kha ka sawi duh baw a.

Tin, Pu Speaker, Agriculture ah hian ka rilruah chuan WRC anga kan kalpuia kan tih rual hian tlangram lo neih a, tlangram terrace siam te hi kan inzirtir chho tan a. Chutianga hma kan lak phawt chuan kan ram neih tam tak, hman loha kan neih te hi hlawk zawkin, tha zawka kan hman chhuah theih ngei ka ring a, kan Minister zahawm takin min hriat sak se tih ka sawi duh a ni e. Ka lawm e.

SPEAKER: Pu Andrew H.Thangliana, member zahawm tak i sawm ang.

PU ANDREW H.THANGLIANA: Pu Speaker, ka lawm e. Demand no.31, kan Minister zahawm tak Pu C.Lalrinsanga chan Agriculture hi ka han sawi dawn ang a. Ni e, ka hmaa ding zawng zawng Treasury Bench lama thu te pawh khan budget-a pawisa nikum lam aia estimate a tlem ta kha an rilru tak chuan pawl an ti ve tho tih kha a lang Chiang a. Kha lam kha chu sawi thui ka tum lemlo a.

Agriculture han tih hian a huap hi a zau em em mai a. Tin, Agriculture & Allied Sector kan ti a, chumi hnuaiiah chuan a kaihhnawih Horticulture te, Fisheries te, tin, wawiina kan demand zinga tel Animal Husbandry te pawh a broad definition ah chuan Agriculture hnuaiiah hian a tel vek mai a. Amaherawhchu, wawiina ka han sawi duh tak hi chu Crop Husbandry leh (Research & Extension) bik a ni a. Hemiah hian sawi tur a tam ang a. Research & Extension chungchang bik hi kan sawrbing duh deuh a.

A bik takin buha intodelh chungchang hi party tin leh sorkar apiangin policy lian bera kan neih a ni a. Nikum chhung ringawt khan kan Economic Survey a kan hmuh dan chuan physical aspect for procurement of rice ah khan ₹ 13.90 crores bawr vel hmang anga chhinchhiah a ni a. Hei hi ka hriatsual loh chuan FCI atanga kan lei chauh a nih ka ring a. Open Market nen phei chuan a let deuh thaw sum kan seng tihna a ni. Tichuan Economic Survey-ah tho, WRC potential area hi area under cultivation, a taka kan hman hi 22% vel chauhah buh thar chhuah hi a lang bawk a. Hetiang hi kan dinhmun a ni a.

Heng ka han sawi lan duh nachhan chu nimin khan Food & Civil Supplies Minister zahawm tak khan kan buh tharchhuah te, kan rama tharchhuah ngei te lei tura a inpeih thu leh tun dinhmunah erawh chuan duhkawp lei tur kan la hmuh loh thu a sawi avang a ni bawk a. He a thusawi atang hian buh chin kha a phurawm viauin ka ring a, theih ni phei se chuan thlai dang sawhthing leh thlai thar leina tur te

hi han dah nghe nghe se, opposition bench lama thu ni mah ila kan ruling thut thei maiin ka ring deuh a, a bik takin ZPM member te tan Buh kan ching dawn a nih chuan a kaikuang ber, a pawimawh ber chu Agriculture Department hi a ni tlat a ni.

Crop husbandry lam hi chu sawi thui lo ila, pawimawh em em maia ka hriat chu Research & Extension lam hi a ni zawk a, Director hranpa ngatin a awp a ni a, Research & Extension atana budget hi a beitham ka ti a. Nikum lam atang pawh khan estimate te kan en chuan percentage eng emaw zatin tihhniam a ni a, hei hi pawimawh ka tih nachhan chu R&E mi hian kan hmelhriat loh em em mai a, kum tam tak lo kal tawha din tawh ni si hi a tangkaina te, a pawimawhna te kan Chiang lo hle niin ka hria a. Hemi hnuaiia thil pakhat ka sawi duh chu research a pawimawh zia kan hria a, ram dangah te pawh tunlai hmasawna thang zelah technology pawimawhna hi a ni. Tin, machinery hmangin entirnan Israel-ah te pawh a ni tho va, thlaler chhenghe tak ah pawh technology leh machinery te hmanga tuna agriculture-a economy lian ta em em an ni tih kan hria a.

Research lamah chuan entirnan central-in KVK centre dictrict tinah a dah a, tunah hian KVK centre 8 vel kan nei mek niin ka hre bawk a. Hemi atana state-in pawisa a contribute ve tur hi kan budget-ah hian cheng khat mah a awm lo va, anni hi ICAR (Indian Council of Agricultural Research) atanga fund ni awmin ka lo hria a, kum khatah hian ₹100 lakh vel erh awrin centre pakhat hi a intung nung ve chauh a ni. A pawimawh em ema kan hmuhna chu tuna kan sawi lai mek buh chungchangah pawh a chi tha te an identify a. Tin, kan terrain-ah Mizoram district hran hranah kan sik leh sa, kan boruak kan climatic condition te pawh hi a inang lo va, chung hmuna thlai chin tur te, buh chin tur te lo test-tu an nih avang khan KVK centre te hi an pawimawh a ni. Department hrang hrang leh farmer te pawhin information kan lakna ber tura din an ni nghe nghe a. Tin, an pawimawhna chu khatiang thil piah lamah farmer te hnena tunlai technology thar te information pe chhawng tur an nihna lai hi a ni. Kan economic survey-ah hian an hmalak tawhna kan hmu a, amaherawhchu duhthu a la sam lo va, kan la mamawh viauin a aia nasa lehzuala kan kal pawh a ngaiin ka hria a. Chulaiah chuan state hian equipment chungchangah leh thil dangah te pawh thawm thata contribution hi a pek ve theih chuan a nihna ang tur taka kan hman theih ka ring deuh a. Awareness te hi farmers-ah hian awm tam se tih te ka rilruah a lang a. Chung chu kan KVK centres te Agricultural & Allied Sector Department ten tangkai zawka kan hman theih nan

(SPEAKER : Chair kan han in thlak lawk ang e.) (Dy. Speaker at the chair) kan KVK centre te thawm that dan kawng hi state atang pawha contribution ti sang turin ka ngen duh nghe nghe a. Chu chu Research & Extension Department, Department han ti ilar, Agriculture hnuai Directorate hi tlema duhsak deuh a ngaiin ka hria. An hmalakna te kan chhawr thiam chuan kan thlai production te, kan buh production te pawh nasa leh zualin a sang thei ngeiin ka ring a, chung chu R&E chungchangah chuan ni ta se.

Thil pakhat ka rilrua lian leh em em chu ram tan tiin ke kan pen chhuak ve a, chung atana kan campaign hunlai chuan (thingtlang bialtu ka ni a, kan bialah chuan zaa sawmkua vel khu kut hnathawh leh lo neiha innghat niin ka ring a) mi inah kan lut nasa a. Ka han sawi duh tak chu mi tam tak inah khuan lo nei mite an lo ni a, hlo kahna khawl knapsack sprayers kan tih ang chi hi inah khuan an tlar del dul mai a, chhungkaw thenkhat hnenah, ‘Enge maw awmzia le?’ tiin ka zawt thin a, sorkar atanga subsidy-a an lei thin te, a thlawna an dawn te a quality a tha tawh lo thin a, ‘Rei lo te kan han hmang a, a chhe nghal zel a, a man tlawm tiin kan han um ve bawh a. Kan mamawhna a sang si a, tihngaihna kan hre lo va, a dang kan lei leh thin a, heti hian kan dah hner hnur mai a nih hi tih kha hmun tam takah ka tawng a ni. Chumia ka rilrua lang chu Agriculture Department a ni emaw, department dang pawh ni se quality control lam kan ngaihtuah a tulin ka hria. Purchase of machinery tools & equipments chungchangah a bik takin farmers ho tan tender kan han float thin te pawh hian a rate chhang hniam ringawt la lova a quality zawk te thlan nachang hi kan hriat a hun tawhin ka hria a ni. Kum eng emaw zat kalta a ka hriat ve chinah ‘trend’ angreng deuha kan neih tawh State Purchase Advisory Board te, DPAP te an han thu thin a, a hniam hniam kha hmu tura ngaihna kan officials ah te leh mipui rilruah hian a awm thinin ka hria a. (DY.SPEAKER: Minute khat ilar nei e.) Khatiang a nih kha chuan hlawk lo duh ve bawh si; quotation emaw, tender kan han float a, a chhangtu tan chuan quality chhia peka compromise a ngai leh thin a, khang kha department dangah pawh a nih tho ka ring a. Chuvangin hemi chungchangah pawh hian sorkar leh mipui lam pawh kan thanharh deuha thil tha, tlo tur hi nakin zelah pawh hetiang thil kan lei leh dawn a nih chuan kan technical mite chhawr tangkaiin board-a an lo thut ve nikhua pawha an thu te ngaichang a, annin tha nia an hriat te kan ngaihpawimawh hi a ngaiin ka hria. Hun a tlem bawh si a hun ka hmang zo deuh der. Ka lawm e.

DEPUTY SPEAKER : Hun i hmang tawh hle mai. Member zahawm tak takte kan tang tlang a, kan inbuatsaihna a tha hlawn hlein ka hria. Khang kan thusawite kha kan dawng let leh a, Assembly atangin minrawn pe let leh vek a. Kan tanna kawngah khan lo sawi pelh palh te pawh a awm thei a. Tin, thuziak an lo lak chhawanna kawngah tihsual palhte pawh kha a awm thei a, uluk takin correction kan siam ang a. Kan lehkhaw dawnah khan a ni zat tur kha an bithliah thlap a, khami hun chung khan theihngihl lovin theihluh leh hram hram kan tum dawn nia. A chhan chu kan correct loh kha chuan, kan tihthat loh chuan Mizoram sorkar awm chungin a dik tawh dawn lo a ni mai a. Kan tu leh fate pawhin kan thusawi te kha an larawn en duh thei a, chuvangin uluk takin kan thusawite kha question paper lo thlen hunah kan siamtha dawn nia tih kha ka chah duh che u a ni.

Tunah chuan Dr. Vanlaltanpuia i lo sawm ang u.

Dr. VANLALTANPUIA : Pu Deputy Speaker, ka lawm e. Vawiih hian kan Minister zahawm tak takte demand pharh a ni hi lawmawm ka ti a. Pu C. Lalrinsanga, Minister zahawm tak Department te tan ₹ 2,30,45,43,000/- pharh a ni te; tin, Dr. K. Beichhua Department chan atan ₹ 2,84,81,77,000/- te pharh a ni hi a lawmawm ka ti a. Pu Deputy Speaker, vawiih hian i vei lam amite hian 'nikum lam kan budget aia a tlemna te' tih te kan sawi nasa viau a, beidawng zawng ten an sawi nasa viau a. Amaherawhchu, kan sawi fo thin a, kan budget pattern te a lo danglam ta a. Kan sawi fo thin angin share of taxes te, post devolution, revenue deficit grant te kan kutah, kan duhtawka state-in kan khawih theih turin autonomy, mahnia rorel theihna pek kan lo ni ta a. Chungah te chuan tha deuhin kan dah a, kan khung thlap a, lo zam lutuk lo sela, a lo tlem deuh hlek a nih pawhin tha deuhin kan kal dawn tih kha ka han sawi duh a.

Muhil der hi muhil tak tak aiin kaihtawh an har zawk a, chuvangin anni pawh hi khalai kha hrilh nawn fo an ngaiin ka hria. Nichinah member zahawm tak Pu B.D. Chakma khan arawn sawi leh a. Engpawh ni se, helaiah hian theihtawp chhuah kan tum tih kha ka han sawi duh a ni.

Demand No. 31-na Agriculture-ah hian Pu Deputy Speaker, sawi chak thenkhat ka nei ve deuh a, kan ramah hian kan economy determined-tu, ei leh bara kan intodelhna chungchang sawifiahna GSDP kan ti thin a. Nikum lama statistics-ah te a lan dan chuan 12% deuh vel chauh kha a contribute a, he sector hian. Agriculture-ah hian tan a la ngai hle a ni tih chu a lang a, chuvangin kan mithiam hote pawhin bengsika ngaihtuahna kan sen a ngaiin ka hria.

Kumtin sum tam tak kan dah thinin ka hria a, hun hmasa lamah pawh khati zat kha kan dah a, Amarawhchu vawiina Mizoram dinhmun chu khati chauh kha a ni a. Sem ral leh a sir ah khan eng emaw ral a tam a ni tih kha a lang a, chuvangin tan a ngai hlein ka hria a ni. Chung kawngah chuan thar chhuah punna tur kawng lam hi sawi a nih rualin thil pakhat sawi ka duh a. Development Works kan han lak dawna programme kan siam hian, kan ram tha zawng zawng bawh vek ang chi te, vah darh vek lam te hi kan thinlungah a awm nasa a. Mahse sustainable development hi kan ngaihtuah reng a ngaiin ka hria a. Kan thenawmah Bhutan sorkarte an lo awm a, anni hian an sawi uar deuh chu carbon neutral an ti a, an ram khawvel lum zel ah te leh an ram humhalh nan carbon neutral tihte kha an lo sawi daih kha a lo ni a. Hetiang kawngah pawh hian kan fimkhur a ngai a.

Tin, insecticide, rannung thahna hlo te, lei tha/fertilizer, pesticide te kan hmang nasa lutuk hi (mithiam chu kan ni hauh lo va) enchian a ngaiin ka hria a. Tunah hian Minister chak tak leh he Department pawh lo chang tawhtu kan nei a, organic farming lam te uar a, rannung thahna hlo leh chemical fertilizer lam te pawh hi kan tlansan hret hret a ngaiin ka hria a ni.

Tin, SEDP-ah khan kan ziah chiang tak chu Green Revolution tih tawngkam kan hmang thin a, chumi awmzia chu India rama state hausa ber ber, agriculture product-ah chuan Punjab te, Haryana te India ram buhzem an tih mai thin 'Granaries of India' an tih hote pawhin programme an lo kalpui tak tak ang hian Green Revolution hi kalpui ang u kan ti kha a ni a.

Hengte hi kan Minister zahawm tak pawh hian khang programme hrang hrangte kha nasa deuhin rawn kalpui se ka duh tak zet zet a ni.

Tin, crops selection, thlai kan thlan ah pawh hian high yielding viriety, a thar chhuak tam thei lam ah te pawh hian kan in focus a ngai khawpin ka hria a. Tin, technology eng emaw pawh hi neih ve a hun tawh a ni. Fiamthu thawh nan te kan hmang a, ‘bulldozer tlang lawn thei’ tih te hi a tak takah chuan hmang ve thei tur awm tak hi chu kan ni. Thlai chi han phun pawhin han vih deuh hleka rawn in phun mai ang chi te, khawl mawl ang reng deuh chi te pawh hi hman ve tak tak hi mechanization khatiang lam kha kan beih uar a ngaiin ka hria a ni.

Tin, Pu Deputy Speaker, a bik takin keini thingtlang bialtu te phei chuan kan hmu thin a. Maipawl ban chen pui pui tha deuhthe hi ramah hian a let rem rum a, a chhan chu market an neih loh vang a ni a. Hetiangah hian inphaman tura kha thingtlang khua khan a leh pek khua lian deuhah a va thlen a, chu chuan khawpuiah a phurh ang chi market change system tha te pawh hi kan mamawh khawpin ka hria.

Entirnan ka bial han sawi ve ta ila, Lungmawi khua kan nei a, Lungmawi khua chuan an thar tha thei em em mai a, mahse, a hlawkna kha an hmu theilo a ni. Khaw hnaite Haulawng khua te kha rawn phur thleng thei mai sela chuan, Haulawng atangin Lunglei-ah a lo lut leh mai ang a, khatiang market change tha deuh te hi kalpui theih a tha khawpin ka hria a. Tin, Minister zahawm tak Agriculture changtu hi, a bial hlui a enkawl thin hi kan rochun a, a hre chiang khawpin ka hria a. Serchhip Zawlpui rawn ep ho, khing ram tha Chemtum ram te, Vanva phai te, Mat phai te tam tak nei kan ni a. Tin, kan bial hi Mizoram laili taka awm a ni a. Agriculture potential area tih kha in uar bawk a, agriculture potential area tha tak tak nei kan ni bawk a. Tin, Mizoram laili-a awm kan nih avangin kal a awlsam em em mai bawk a, hengte hi min lo hriat sak sela. DPR lian tha kan rawn dah hote kha min lo ngaih pawimawh sak se tihte pawh kha ka duh bawk a ni.

Irrigation & Water Resources, Demand no. 47-na ah hian sawi ka duh chu, he department hi a lar lo ang reng a, tui an lak dan velte pawh hi. Mi ram Phillipines te, S. America ramahte pawh tlang ram tam tak nei ve an ni a. An agriculture

practice tha deuh pakhat chu Sloping Agriculture Land Technologies (SALT) an tih ang chi te hi an uar em em a. Anni chuan tlang chhipahte tui an dah a, terrace tha deuh kha an siam kual a, tichuan, tlang pumpuite kha agriculture bawhzuina atana tha deuhte a lo ni zel a. Tunlai technology hmangah chuan phaizawl chauh kha a lo ni tawh lo va. Chuvangin Irrigation lamte pawh hian khati zawng deuha tlang chhip, sloping agriculture land technology lamte pawh hi lakluh ve a, tih dan thar, innovations, thil thar dah luh ve hi a hun tawh riauvn ka hria a. Chungte chu ka rawn sawi ve duh bawk a.

Tin, Demand 34-na, Animal Husbandry & Vety. tihah hian tawite sawi ve leh ka duh a. Sa-a intodelh hi a tul khawp mai a, sa hmeh hi kan uar em em mai si a. Mikhual neihte phei chuan sa hmeh loh kha chhung tinin kan duh ngai lo kha a ni a. Chuvangin, sa thar chhuak tura mumal deuh hleka kan beih pawh a tul hlein ka hria a. Research Centre tha zawkte kan din a, Selesih-a kan Vety. College mai pawh ring lo va, sorkarin a enkawl breed tha zawkte tih a, bio-technology lampangahte kan kal a, khatianga kan tan hi a ngai khawpin ka hria a. Chutiang chuan a changtu Minister zahawm tak hian a tihchangtlunna lam tur kha han ti se ka duh hle a.

Tin, sawi ka hriat pakhat chu, Mizo hian zo vawk kan tih tui deuh mai hi kan nei a, a dul hniam lih leih, a te hi. Khawvel ram dangah hian an nei lutuk lo va, hengte pawh hi zawrh thiam a, a sa kha tehin a hlawk lo pawh a ni mai thei a, mahse, a dan kha a dang a ni. Kha kha market-ah pawh a hlawk theiin ka ring a. Zo vawkte research a, tha deuhva produce tihte hi hmanah Vety. lama mithiam ka thiante ho sawi ka hre tawh a. Ka ngaihtuah Chiang a, a tha khawpin ka hria a. Chung lamah te chuan kan Minister pawhin thil thar min lo chhinchhiah sak sela. Zo vawkte hi an ngaisang em em mai a, a sa a tui danglam bik em em mai a ni tihte ka han sawi lang bawk a.

Pu Speaker, Sericulture hi tlemte han sawi lawk ka duh a. Sericulture hi hmanniah an department-a ka len tumin thil tha deuh ka zuk hmuchhuak a. Silk-ah hian mulberry, muga kan tih te, tasar te, arry kan tih te hi India rama a lar zualho a lo ni a. Tah chuan, Mizoram hian mak deuh maiin theihna kan lo nei a, arry tih bikah hian. National production, India rama khawlum hmun thenkhatahte hian entirnan 30 vel an thar chhuah theih lai khan keini Mizoram hian arry-ah hian 50 vel kan lo thar chhuak daih thei a ni tih hi an hmu chhuak a. Chung thu chu an office-ah min lo

hrilh a. Pu Dy. Speaker, kan potential neihnate hi kan nawr vak mai dawn em maw ni le tih te ka han sawi duh a.

Tin, hmanni khan kan hotu zahawm takte remtihain Union Minister Smt. Irani kha a chenna inah ka zuk hmu a, ani pawh khan min lo sawipui nasa a. ‘Silk-te pawh hi Mizoramah bei nasa ve ta che u’, tih kha Union Textile Minister khan min lo sawipui a. Chuvangin, hengte pawh hi theihna kan nei nasa hlein ka hria. Chungte chu tan kan lakna turte ka han sawi ve duh a. Vawiina demand pharh a han ni hi Mizoram tan thil hlu tak a lo nih theihna tur leh heng te hi kan Agriculture product leh kan Vety lam product-te tam tak a lo pun a, kan economic growth nasa taka a lo pun theihna tur a nih ngei ka beisei a ni. Ka lawm e.

DEPUTY SPEAKER : Dr. Vanlalhlana, Aizawl North II bialtu i lo sawm ang.

Dr. VANLALTHLANA : Pu Dy. Speaker, ka lawm e. Nimin khan kan Chief Minister zahawm tak thusawi ka han commentnaah DoNOR Ministry chauhte ka han tarlang a. Ka lo hriat dan leh a thusawi dan kha a lo inanglo va, ka hriatsualah thupha ka han chawi a. Kan Chief Minister zahawm tak hian kum 1996 atanga an puan tan Central Ministry tinin development sum 10% atanga North East State te tana dah tur kan ‘fund’ dawn theihnte a sawi ngun khawp mai a. Sorkar-na an chan atanga thlarukte a lo ni tawh bawk a. ‘Amaherawhchu, nimin piah lawk khan ‘han hisap ila’ ti-a tanin a ‘quote unquote’ ang a, vaibelchhe nuai 10-ah khan hmun 10-a thena hmun 1 hi North East tana reserve a ni a, chu chu vaibelchhe nuai khat tihna a ni. Chu chu state 8 hian inzahsem dawn ila, vaibelchhe 12,000 kha plan sector anga kan zuk dah kha kan chan tur daih a ni a ti a. Kan C.M zahawm tak hi present pek ka duh a, chu chu hei hi a ni. Tunah hian kumin Union Budget analyze tur ka la nei thei lo va, an pharh mek a. Budget circular Ministry of Finance in a siam zulzuia North Eastern Region tana Ministry 42-in nikuma an dah kha ka siam zawh meuh chuan pawn light off a lo ngai tawh a. Revenue expenditure-ah vaibelchhe 38,647.55 leh capital expenditure-ah vaibelchhe 9,366.27 a ni a. Tichuan, vaibelchhe nuaikhat ni lovin, vaibelchhe 48,013.82 a ni e. Hei hi state 8-in insem dawn ta ila, vaibelchhe 12,000 ni lovin, vaibelchhe 6001.73 a ni a. Kan C.M zahawm tak hi MNF C.M a ni bik lo va, ZPM ho C.M a ni a, wawiina ka thusawi ngaithlatu zawng zawngte Chief Minister a ni a. Ka Chief Minister neihchhun a ni. House-ah hisapa thu sawi lo, facts

leh tih tak tak theih thu sawi tura ka duhsak avangin nimin khan ka han puakchhuak ve hlawn ania. Tawngkam te ka thiamlo a, aggressive deuhthe pawhin ka lang a, tah khan min lo ngaidam sela. Kan thusawi te hi New Delhi lamah thawng zel a ni thin a, kan thangthar ten kan thusawite an lo hre thei thin dawn a. Chuvangchuan, a zawna vawnhim nan ka rawn puakchhuak a ni tih kha ka sawi duh a. Kan CM hi huatna pakhatmah ka nei lova, kei aiin tawnhriat a ngah a. Budget-ah pheih chuan kei aiin hriat a ngah leh zual tih hi ka hai lova, CM a zawnga biak nuam leh pa inngaitlawm tak mai a ni tih hi ka sawi fo a ni.

Tichuan, kan CM hi nikum lawka vaibelchhe 48,000/- chuang North-Eastern Region tana dah kumin maia pung tur leh NLCPR-a vaibelchhe sing1 chuang thal tur a nei dawn a ni hian central scheme tam tak a la awm cheu dawn bawk a. Hisap mai lova facts la thin tur leh heng sum bawm awm te hi tangkai taka a hman theih nan duhsakna kan hlan a ni.

Nimin lamah te demand te kan han sawi a, Minister-te ka fak duh a, thla 6 deuh chauh a la ni a. MLA ten mahni bialah kilkhawr tak tak ami thingtlang hmingte an sawi a, an lo hre thei zel a. Kha kha an fakawm ka ti a, ka fak duh bawk a. Budget Demand-ah hian han lut ila.

Demand no.31-na Agriculture hi nikum aiin 23.38%-in a tlahniam a, Minor works revised estimates-ah khan 4825 kan hmu a. Chu chu kuminah hian 40 chauh a awm ta a, 99.17%-in a tlahniam a, minor works ah hian kumin hi a awm tam vak dawnlo a nih hmeh. RKVY scheme hi budget allocation zulzuia tih a ni a. Kuminah hian kan budget a tlahniam dawn a, chumi a nih avang chuan hetatanga kan hmuh theih tur hi a tlahniam dawnin ka ring a. Amaherawhchu, 2200 a ngai reng la dah a ni a, hei hi enchian a ngai deuh hlek mai thei. Kan productivity hi Aieng hmannah ka zir chiang ve a, Aieng hi kan productivity a lo tha viau a. Hemi tih loh hi chu state dang kan pha vak lo va, research lamah kan tan a ngai khawp mai. Research hi ka han keu a, nuai 516 senna tur Agricultural research-ah hian other charges-ah hian nuai 2 dah a ni a. A bak chu salaries, medical treatment, domestic travel expenses tihte ani vek mai a. KVK lah a awl thla vek mai a, hetah hian kan tan a ngai khawpin ka hria. Kan productivity tisang tur chuan research-ah kan tan a ngai, kan zirchian tam a ngai a. Chumi tur chuan kan Minister pawh ka ngen duh a, Oil-palm chingtute hi an mangang khawp mai a, 3F Oil-palm te, Ruchi Soya te, beisei ang an

ni pha ta si lo va. Chuvang chuan, helam pawh hi kan ngaihtuah a ngai a. Tin, economic survey thar berah khan kan hnathawk neih ho ah hian cultivators ho leh agricultural labourers (a inziah danin ka sawi mai ang a) Agriculture kaihhnawih hnathawk te hi 65% kan ni a. Chuvangin, ngaihven an ngai a, kan GDP thawh ve thung erawh chu 13.69% a ni GDP-a kan thawh hi. Chuvang chuan, kan tan a ngai viau a ni.

Tin, kan GSDP chhutnaah khan kan sale price-ah khan 2013-14 atangin kan han kang chho ve a, kan ti chho zel a. 2015-16-ah 2.07-in kan pung a. A kum leh lamah kha chu tlakhniam lam kan pan ta a, helamah hian tan lak a ngai a ni.

Tin, terracing lamah kan tan a ngai bawk a, hemi a hma kan sawn theihna tur kuhva lam te; terrace leh leilet tih te, Hachhek, Serlui leh Champhai te, Serchhip te aniang chu lehkhabu-a a landan deuh chuan, khangho ah te khan tan la ila tih kha ka sawi duh a.

Tin, Demand no.37-na Cooperation kha 3.17%-in a tlahniam leh a, kan Minister hi vanduai nge ni, a tlahniam zelin a budget hi a kal a. A dawt leh pawh hi a awm tho mai a, MIZOFED hi tunah hian professional an enkawl tir ta a, hma an sawn chho viauin ka hria a, a lawmawm ka ti a. NLUP an sem khan kan lo tilo a ni aw ka ti a. NLUP pawisa hmang khan a dawngtute khan Cooperative lo din ta se an tangkaipui awm mang e ka lo ti deuh vawng vawng thin a. Tin, Education & Training-ah cheng nuai10 dah a ni a. Hei pawh hi Cooperative that zia, tangkai zia inzirtir nan tha taka a hman theih nan enkawl zui ni se.

Demand no.47-na Irrigation & Water Resources Department pawh hi 22.43%-in a tlahniam leh a. Kan Minister budget hi a tlahniam vek mai a, 20%-in pahnih a tlahniam a, pakhat chu 3% a ni a. Major works CSS hnuai 2500 awm a kha an tlahniam ta si a. Chu chu a chhan nite pawhin ka ring a.

Tin, Dr. K. Beichhua, Minister zahawm tak chanah khan Demand no.7-na Excise & Narcotics kha 39.82%-in a pung a. Hei hi hlawh punna, nuai 1,246.43-in hlawh kha a pung dawn a. Hna pawh lak belh tum a nih hmel e. Kan receipt budget kha ka en a, finds and confiscation tih kha a kum hmasaah revised estimates-ah nuai 25 dah a ni a. Kuminah hian zu te kan han khap ang a, inman te pawh a awm chho ang tih a rin theih a ni a. Amaherawhchu 20%-in a tlahniam a, nuai 20 dah a ni a.

Thil kan buaipui ngai chiang tak chu (a thawktu ngeiin an sawi) Excise department-a thawkte hi a tam zawk hi zu in an ni tih hi kan enchian a ngaiin ka hria a, kan fimkhur a ngaiin ka hria.

Demand no. 29-na Social Welfare-hi 15.07%-in a rawn pung a, a lawmawm khawp mai a. Old-age pension kan senior ho te an nghahhlelh em em hi a punna a awm lem lova. A zat hi tihpun a ni dawn lemlo a ni ang e. Tin, De-addiction Centre kan ruling lam te an sorkar tirha an tlan thlaka an zuk en nghalte kha an ni a. Hetah hian pawisa dah tam a ni vak lo va, Pu Dy.Speaker, minute 1 chiah. Hetah hian tan lak a ngai khawpin ka hria a. A thingkhawn lam atang khan lak tam dan te awm ta se. Assistance to NGO hi Revised Estimate-ah khan nuai 17.76 a awm a, Kuminah dispensary-ah hian engmah dah a ni lo va, NGO ho hi tanpui tumna a awm lo nge ni?

Tin, Demand 34-na Animal Husbandry & Veterinary hi za 54.3% in a pung a, screening of the Hospital & Dispensary ah hian engmah dah a ni lova, hei hi chu en deuh a ngaiin ka hria a. Kan Hospital te tih changtlun te pawh a ngai dawn a. Tin, major works ah hian engmah dah a ni lova.

Demand no. 41-na, Sericulture hi 9.9%-in a pung a, amaherawhchu salaries tih te, medical expenses tih ah te khan budget pumpuia nuai 200, 2900.67 atang khan 2087 chu chu a percentage-in 98.96 a ni . Chu chu a thawktute hlawah a lut dawn a, 1.04% kha hnathawhna tura dah a ni a. Kumin kumtir khan vanneithlak takin Budget Workshop Delhi-ah ka zuk tel ve a, state dang ho te nen kan thuho a, budget kan analyse khawm a ni. He budget hi ka analyse palh ang tih ka hlau khawp mai a. Kan sawiho a, kan ti ti thin a. Chuvangin hetiang hian hnathawhna tur te hi han dah tam deuh thin ni se a lawmawmin ka hria. Pu Deputy Speaker, ka lawm e.

DY. SPEAKER : Tunge ka sawm leh ang aw? Pu VL.Zaithanzama, West-III MLA zahawm tak i lo sawm ang u.

PU VL. ZAITHANZAMA : Pu Deputy Speaker, ka lawm e. Waviinah department 7 lai demand kan sawiho dawn a ni a. Avai pawhin kan sawi hman lo turah ka ngai deuh a. Kan tuina deuh te kan luhchilh lo thei lova. Ka hmaa MLA zahawm tak khan a rawn sawi rik ka rilruah a lo awm a.

Minister zahawm tak Pu Lalrinsanga department chan Demand no. 31, 37 leh 47 te hi kan tlahniam tlat mai a. Tin, heng department ho hi kuthnathawktu kan eizawngtu kan farmer te nena inhnimhnai em em department pathum an ni a, hei hi ngaihtuah that leh deuh theih se a va duhawm ve aw ka ti a. Hei hian kan ei leh bar zawna kawngah harsatna min siam ang tih a hlauhawm tak zet a ni. Heng department pathum hi kuthnathawktute nena inngheng hnai tak zet an ni lehngal tih kha ka sawi duh a.

Demand no. 37-na Cooperation Department-ah ka lut nghal mai ang a. Lawmna deuh mai ka nei a, Cooperation hi he House zahawm takah hian sawi rik a ni khat khawp mai a, vawiinah hian a ri a ri mai a, chu chuan min ti lawm khawp mai a lawmthu ka sawi a ni. Amaherawhchu nichinah MLA zahawm tak Pu Ngunlianchnunga khan 'Cooperative hi kan la hmang thiam tawk lo' arawn ti a. Midang pawh khan inrawn ti deuh bawkin ka hria a, kha kha ngaihdan pakhat a ni a. Ka rilruah erawh hi chuan Mizoram sorkar hian a nih tur angin kan ngaimawh tawk lo va, kan enkawl tha lo. Mipui lam thiam loh ni lovin, Department lam thiam loh pawh ni lovin, sorkar hian kan la ngaihtuah lo hrim hrimah ka ngai deuh a ni.

Cooperative hi kan hmelhriatna a rei tawh hrim hrim a, Mizoramah hian 1947 khan Aizawl Central Trading Cooperative Society a lo ding tawh a. Khata tanga chhut phei kha chuan kum 70 zet kan hmelhriat ve tawh a ni. 1951 khan Cooperation Department Office hawn a ni a, 1956 atangin Gazetted Officer puitling enkawlin hna a thawk tan a. Department kum 68 zeta upa a ni ve tawh a. Chuti chung chuan department naupang te te ten an kal pel zel a, vawiin thleng pawhin a dinhmun hi a thalo hle mai a. Vawiinah pawh kan budget hi a lo hniam leh ta a. He department hi a pawimawh tehlul nen, nichina ka sawi tawh, kan enkawl dan a dik tawh lo lutuk kan tih kha, Department head ber RCS te saw kan thlak reng ringawt mai a ni. Ka tehkhin ber chu bawlhhlawh bawm angah kan ngai deuh nge maw ni? Kan IAS Officer awmna mumal nei lo emaw dahna tur mumal hriat loh emaw, pension tur emaw, damlo emaw vawm nan kan hmang a. A chang phei chuan kum khatah RCS 3/4 te nan inthlak kual a, khatiang khan he department hi kan sawp a, he department tan hian hmasawn a har tak zet zet a ni. Tuna kan RCS pawh saw February thla maia pension tur a ni a, tun atang chuan kum 2/3 tal mumala an awm ve theihna tur hi kan Minister hian min dah sak sela, a nih loh chuan he department tan hian hmasawn a har hle dawnin ka hria a, chu chu ka han ngen nghal a ni.

He department hian Cooperative Society 1300 bawr vel a enkawl a, state level federation pawh 11 zet a enkawl a ni a. Kan hriat lar chu APEX Bank te, MIZOFED te, MULCO, ZOFISHFED leh PIGFED, a tam mai. Ka sawi pawimawh kualna chu he department hian kuthnathawktute hi a sawkkhawm nasa em em mai a. Agriculture te, Sericulture te pawh kha SERIFED tih te pawh hemi hnuaiah hian an awm tho va. Chuvangin department dang dang nen hian thawhhona tha nei te pawh hi a pawimawh em em mai a. Chutiang department si chu nichina kan sawi tak ang khan tunhma atangin a bilh a la tho lo va, kan enkawl dan hi a dik lo a ni. Chuvangin, awmze neiin tun atang chuan kan Minister hi experience nei a ni a, tunhmaa lo enkawl tawh a ni a. Chuvang chuan kan Minister zahawm tak hian he department hi a term chung ngei hian hma thui tak a sawn pui ka beisei a, ka ngen nghal bawk a ni.

Budget-ah khan han en ila, travelling expense kha nuai 20 dah a ni a, kha kha hetia en mai chuan a awm ang ve fu a. Amaherawhchu, he department hi lian lo hle mah sela, district tinah office 7 an nei a. Mizoram khaw tinah hian registered Society hi an awm a, Vanbawng atangin Lushaicherra thlengin, sawtah chhim tawpah khaw te reuh te te-ah pawh an awm a. Chung zawng zawng chu kum tin audit-a tlawh kual an ngai a, chuvangin khatiang dinhmun atanga chhut kha chuan travelling expense-a kan pawisa dah hi a tlem hle mai a. Chuvangin dah belh theih dante hi awm se tih hi rilruah a awm deuh a. Primary Society mai bakah khan nichina ka rawn sawi tak APEX Bank leh MIZOFED ringawt pawh kha district tinah an inzar pharh a, khangho zawng zawng kha he department hian a enkawlin a audit a, a fan kual reng a ngai a ni tih kha ka sawi duh a. Chumi avang chuan nuai 20 hi a tam lo tak zet a ni.

Tin, Office expense-ah khan nuai 27.94 dah a ni a, hetia han en mai hi chuan heipawh hi a awm viau-in a lang a. Amaherawhchu, nichina ka'n sawi tak Co-operative, Primary Society sang chuang zet han audit khan, Society pakhat han audit a balance sheet siam nan pawh paper tam tak chhah deuh a ngai a ni. Sang tel kha audit an ngai a, chuvang chuan hetia ngaih mai ai hian an expenditure-te hi a hautak a. Khangte pawh kha han dah belh theih ni se a lawmawm hle awm e.

Co-operative movement hrim hrim hi Mizoram hian la hlawhtling lo mah se, hlawhtling turin kan Minister thar nen hian kan thawk chho turah ngai ila, mi

ram angin kan la hlawhtling ve ngei ang. Kan thiam loh a ni lo, kan enkawl dik loh a ni tih kha uar takin ka sawi duh a. Co-operative movement hlawhtling ram hi ram changkang an ni tlangpui a, Europe ram changkang kan ngaihsan em em te, USA, Israel, Japan-te co-operative hlawhtlinna ram a ni. Khawvela ram changkanglo kan tihte hi Co-operative-a hlawhchham leh hlawhtling lo te an ni tlangpui. Mizoramah pawh hian Co-operative Society din hleihtheihlohna khua hi chu khaw changkang vak lo an ni tlangpui. Pu Deputy Speaker, chuvang chuan hei hi Mizo ten kan thiam loh ni lovin kan enkawl dan dik loh vang a ni. Chuvangin enkawl dan dika enkawl tawh turin ka inngen a ni e.

Demand no.31-na Agriculture kha an rawn sawi tel zel a, tlem han sawi ve ila. Second Session March ni 15 khan ka zawhna min chhannaah kum 3 chhunga Mizoram buh thar chhuahte kha a tlahniam char char mai a. Kum 2015-2016 khan metric ton 62,089 kha 2017-2018-ah kha chuan metric ton 59,605 a ni. Hma kan sawn tlat lo mai a, chutih laiin kan budget kha 23.38 zetin an minus bawk lehngal a. (Dy SPEAKER : Minute khat i la nei aw.) He department hi ka hmaa member zahawm tak tak ten an rawn sawi ang khan, department pawimawh tak a ni a.

Mizoramah hian Agriculture Department-in an record danin leileta siam theih ram kha hectare 74,644 a awm a, a zahve talte hi chu han let i la chuan tlem chuan kan ziaawm deuh chuan ka ring Pu Dy.Speaker. Tunah hian hmun li a thena hmun khat pawh hi kan la let lo a ni. Chuvang chuan heta tan la tur hian he department hi duata budget pawh hei aia tam lehzuala lehpekah chuan pek tawh ni se tih ka sawi duh a.

Thil pakhat lek, Demand no.29-ah khan han lut ve zuai ila, kan budget pawh a pung a. Nichinah khan kan ngaithla tawh a, Old Age Pension chungchangte kha(Dy.Speaker : I hun a tawp a) (Minute khat chiah, ka'n sawi zo law law ang e, helaite chauh hi a bak ka kal tawh lo ang) Kum 80 chung lam central-in cheng 500 a rawn pe a, kum 60 leh kum 80 inkar cheng 200 central-in a rawn pe a, Mizoram state hian cheng 50 chauhin kan do let mai a, a tlem lutuk deuh a ni! An khawngaihthlak, a do letna hi tihpun a va tha ve tih leh Anganwadi-te hi rin aiin enkawl hi a hautak khawp mai a. Hmanniah ka zawt a, workers-te hian ₹ 4,950 kan la an ti a, tunhnai khan a lo pung ve a niawm e. Central-in ₹ 4,500 a rawn tum a,

keinin ₹ 450-in kan lo do let a, tunlai khawvel angah chuan a tlem lutuk deuh a ni! Tihpun sak dan a awm em tih ka rawt duh a.

Pahnihnaah chuan Helper phei hi chu ₹ 2,750 chauh an hlawh a ni, puitling nitina chhuak ve si hetiang ringawta inchhawr hi tih rilruah a awm a. Kha kha kan Minister zahawm tak hian min lo hriat sak se tih ka sawi duh a ni. Pu Dy.Speaker, hun tha tak min pek avangin ka lawm e.

DEPUTY SPEAKER : Minute 5 kan la nei a, dar 4 khi kan hun tawp a ni a, member te kan inbuatsaihna a tha a. Kan khat liam si a, kan zo hman dawnin a lang lo va. Tin, kan sawi thin a kan demand sawina kawngah, Mizoram pumin min thlir a, kan rorelna hi an hlut a. Khawpui atanga thingtlang kilkhawr thleng TV awmna apiangah chuan min thlir a ni mai a, chuvangin kan tawngkam hman thuah te, keimahni tawng kan neih theih kha chu hmang hram hram ila. Chu chuan kan thu sawi hi a ti tla tha duh a ni tih ka sawi duh a. Tawng hi a hlu a, sorkar official meeting-ah te pawh hian kan tawnga kan neih reng a dang han hmang hi a lar khawp a. Chuvangin i hmang hram hram ang u tih kha ka han sawi leh duh a. Engtingge ni ang? Minute 5 kan la nei a, kan chawl ang a, minute engzatnge kan chawlh ang? Dar 4:15-ah luh leh i tum mai ang aw, i chawl phawt ang u le.

RECESS TILL 4:15 P.M.

4:15 PM

DEPUTY SPEAKER : Quorum kan la tling lo deuh a, kan tling mai turah ngai ila. Rin aiin minute 15 kha a lo tight deuh hlek a nih kha. Aw le, quorum kan tling ta a, member zahawm tak Dr. F. Lalnunmawia, Aizawl South-III bialtu i lo sawm ang.

Dr. F. LALNUNMAWIA : Pu Dy. Speaker ka lawm e. Vawiinah hian Minister zahawm tak pahnih Pu Lalrinsanga leh Dr. K. Beichhua te demand kan sawiho a ni a, heng an chan ho hi a pawimawh hlein ka hria a. Vawiina department hrang hrang budget kan sawiho hi kan state ei leh bar atan pawh ki pawimawh department kan sawiho a ni a, pawimawh tak tak vek a ni a, hun tam zawk awm thei sela ka duh hle a. Theih ang angin kan hun neih ang chinah sawi ka han tum ve ang a.

A hmasain Minister zahawm tak Pu Lalrinsanga department chan Demand no. 31 leh Demand no. 37, Co-operation leh Demand no. 47 Irrigation & Water Respurces, heng department 3 hi a hrang theuh ni lovin, a kaihkawpin han sawi ka duh a.

Agriculture atangin han tan ila. Agriculture lam hi Pu Dy. Speaker, i veilama thu te khan an dukhawp lo deuh niin ka hria a. Chutih ruala ka rilru-a lo awm chu member zahawm tak pakhat Pu Chhuanthanga sawi/tarlanah khan ka lo ngaihtuah pakhat chu kum hmasa lamah budget-ah a tam tiin a sawi a. Chutih rual chuan kan ei leh bar thar chhuah kha a pung chuang si lo tih a rawn tarlan kha ka rilruah a lo awm a. Chuta lang Chiang tak chu sum leh pai tam tak, a tam lam hi a ni ber lo a ni tih kha vawiiinah hian a hmuh theihin ka hria, a data han sawi atang khan. Chuvangin kan sum leh pai neih leh kan dah ang ang te awmze nei zawk leh efficient zawka kan hman daihzai kha a pawimawhin ka hria a. A tam lam chu a pawimawh rualin sum tam zawng kha a tehna ber tur niin a lang lo va. Eng angin nge kan hman a, kan sum leh pai neih ang ang te hi eng anga tangkaiin nge kan hman tih kha a pawimawhin ka hria. Chuvangin MNF sorkar tharah hi chuan kalphung her rem hi, kalphung tha zawka kal hi kan hotute, kan CM zahawm tak kaihhruaina hnuaiyah hian tum a ni a. Tin, sum hi mipuite hnenah nuai tam tak pawh sem mah ila, a thiam thil kan sem tel si loh chuan sum an hman zawh hun hun kha ngai an awl leh hun chu a ni mai dawn a ni. Chuvangin Agriculture bikah hian a research leh a technology hi a pawimawh viau dawn niin ka hria a. He sorkar thar pawh hi an kal chho ang a, lo neitute hnenah hian eng thiamna nge kan pek, eng technology nge kan hlui tih hi a pawimawh dawnin ka hria a ni. Chung te avang chuan research lamah pawh hian nasa zawka hma kan lak hi a pawimawhin ka hria a. Chu chu Minister zahawm tak Agriculture changtu pawh hian a tul angin helamah hian hma a la turah ka ngai a ni. R & E lamah te pawh hian a tul anga sum an mamawh ang zela kan CM zahawm tak leh Finance changtu te pawh hian a pek zel ka ring a ni. Tin, agriculture ah hian keini bial bikah han ti ta ila, potential area kan nei tha khawp mai a. Ka han tarlan hram duh chu Sialsuk, Sailam leh Samlukhai velah sawn buh chinna ram tha tak tak kan nei a, a tlawhpawhna duhthu a la sam lo nangin lo neitu, buh chingtu an pung zel a. Sawlai atang sawn buh thahnem tak thar ve kan tum a ni tih kha Pu Dy.Speaker, ka sawi duh a ni. Chutih ruala ka sawi duh chu, buh thar chhuah leh a hralh kawngah hian, kum 4 kalta khan Burma ramah kan

zin a. An buh tharna, a her chhuahna hmun kan en a, an tualchher khawl khan favai atangin electric an siam chhuak a, chu chuan buh an her a, a hmunah khan a bukna an nei thlap a, buara packna an nei thlap bawk a an ti zung zung a, a hmuhawm khawp mai. Ka rilruah chuan Mizoram te pawh hian engatinge kan tih ve mai loh tih kha zawhna a lo awm a. Kan buh thar herna leh a pack-na thleng hian hma kan lak chuan, buh thar hi nasa lehzualin kan intodelh ang tih ka ring a ni. Tin, chutih rual chuan Agriculture-in a ken tel pawimawh tak mai tura ka ngaih chu Cooperation Department hi a ni dawn a. Cooperative system hmangin kan SEDP pawh hi kan kalpui dawn a ni tih CM zahawm tak pawh hian a lo sawi tawh thin a. Chuvang chuan pawisa hi tawngpawng sem ni lo va, Cooperative Society System hmanga Bank te leh financial institution-te nen inzawma tang kawpa, awmze neia hma kan lak chuan tun aia nasa fe in kan buh thar chhuahte pawh a lo pung ang tih ka ring a.

Tin, KCC, lo neitu ten awlsam zawka loan an lak theihna, loan pung tlem chi te pawh hi tangkai zawka hman dan awm se, nasa takin kan tangkai pui ang tih ka ring a ni. Chuvangin Bank leh financial institution-te pawhin theihtawpa ngaihtuahna an sena, sorkar nen tangruala kan loneitute dinhmun hi kan chawikan theih ngei ka beisei a ni.

Tin, tui lakna, Irrigation chungchangah hian Mizoram hmun hrang hrangah hian ka hmuh ve chinah, tunhma kan hun kal tawhah khan tui lakna, tanky leh pipe te siam a ni thin a, amaherawhchu hmun tam tak ami chu hman tlak loh leh hman tangkai theih loh hi a awm nual a ni. Hemi ah hian department hrang hrangte pawh hian awmze nei zawka kan thawh hoa, tui lakna kawnga hnathawktu department te pawh inpawh zawka, convergence hmanga awmze nei zawka kan kal theih ka beisei a. Chumi hmang chuan tui mamawhte tha zawka kan inpek theih ngei pawh hi ka beisei a ni. Chuvangin Agriculture te, Cooperation te leh Irrigation te hi rual thapa hna kan thawh chuan awmze nei zawkin loneitute kan dawmkang ang a. Thiamna tha zawk te, kalphung, tih dan tur tha zawk te kan zirtir chuan kan thlai thar chhuah hi a pung ngeiin ka ring a.

Chutih rual chuan a hralhna lamah sorkarin awmze nei zawkin an kalpui turah ka ngai a. Kan thlai thar chhuah te tha zawk leh man man zawka kan hralh chhuah chuan tun kum nga lo awm tur chhung hian nasa takin ei leh barah hian kan thar chhuah hi a pung ngei ang tih hi Pu Deputy Speaker, ka ring a ni. Chuvang

chuan heng atana sum kan dahte hi a tha tawkah ka ngai a. Tin, Board siam tum a ni a, heng Board te pawh hian kan mamawh bak hi chu, Agriculture Development Board kan neih turte pawhin nasa takin hma la in, mamawh te chu an la haichhuak ngei ang tih hi ka ring bawk a ni.

Minister zahawm tak Dr. K. Beichhua Department chan Excise & Narcotics leh Social Welfare Department, Demand 7-na leh 29-na te leh 34-na AH & Vety te tawite han sawi ka duh a. A hmasain AH & Vety hi han sawi hlek ka duh chu ran vulh lamah hma kan sawn ve hlek hlek a, chutih rual chuan sa-a intodelh hi chu kan la hlat deuh hlekin ka hria a. Tin, helaia pawimawh deuh chu ran vulh dan hrisel zawk hi kan kalpui a tulin ka hria a. Keini bialah chuan Pu PDeputy Speaker, Samtlang leh a chhehvelah sawn ar an vulh nasa khawp mai a, chhungkaw 60/70 velin ar an vulh a. Lo neih vak vak kha a hlawk lo zawka an hriat avangin ar vulh lamah an kal nasa em em a, ar vulh hi an tui a ni. Chutih rual chuan kan ar vulhna hmunah sawn tho a pung chak em em a, nipui lai pheih chuan tho hi a phu luih luih mai a ni. Chutah chuan engtinnghe tho hi kan control ang tih hi kan Minister zahawm tak khan ngaihtuahna min lo sen sak se thain ka hria a. Tho a tam lutuk a, ar vulhna hmuna a vulh ve lo te pawhin tho kan insem tlang a, kan ri luih luih mai a ni.

Tin, vawk vulh chungchangah pawh hian hrisel zawka vulh dan te pawh hi ngaihtuah a ngaiin ka hria. Hman kumah Minnesota University amite an lo kal a, Mizorama kan eizawna min zirpui turin (Deputy Speaker : Minute khat ila nei aw.) Chuta an presentation pek leh chu, 'Mizoramah chuan an chenna bulah vawk an vulh a,' an ti a, a thlalak nen khan an tarlang a, 'A thlang lamah tuikhurte a awm leh a,' an ti a, mak an tih thu leh a hrisel taw lo va an rin thu te an sawi a. Hmai a uang duhlo khawp mai. Chuvangin kan ran vulhna hmunte pawh hi tlema inchiahpiah lutuk lo zawka, ran leh sa dangte kan vulhna kawngah hian hmalak dan hi awm thei se a tha awm mang e tih ka ngaihtuah a. Tin, kan sa thar chhuahte vawn thatna tur hmun hi a tulin ka hria a. Ar te pawh kan han vulh a, a chang chuan a tam vak a, a hralh theih loh va, tlawm deuh deuh ten an hralh thin. Chuvang chuan a tam vak lai pawha dahthatna tur fridge lianpui te hi nei ila a tha awm mang e tih ngaihtuahna ka lo seng a.

Tin, Social Welfare leh Excise department hi sawi pawlh ka duh a. Helai hi kan SEDP-a social development kengtu pawimawh tak mai pahnih

an ni a. Kan economic development policy kengtu tur te an ni a, chuta Minister tha tak a ngaihna hria kan nei hi ka lawm a. Ruihhlo do chungchang leh ruihhlo ngaite chhawmdawl chungchangte leh rualbanlo, changhai, mirethei harsa zawk dawmkan kawngah hian sorkar mai ni lo NGO puihna te hi kan mamawh zel dawnin a lang a. Tha taka kan thawh tlan chuan NGO te, Kohhran te leh sorkar te tangho hian khawtlang nun nuam siam kawngah nasa takin hma kan sawn ang tih ka beisei a. Heng atana mamawh tur sum dah a ni hi lawmawm hlein ka hria. Tin, department thar Women and Child Development Department din tura hmalakna kawngah te pawh hian lawmthu sawi ka duh a. Hmeichhia leh naupangte tha zawka kan inenkawl chhoh theih nana sorkarin hmalak a tum dan hi lawmawmin ka hria a, heng hian nasa takin khawtlang nun te pawh a tih nawma a siamthat hi ka beisei tlat a ni. Aw le, tiang chuan he department changtu Minister zahawm tak Dr. K. Beichhua department chanah hian sorkarin hmalakna tur sum a dah hran sak hi lawmawm ka tihpui a. Heng department hrang hrangte hmalaknaah hian SEDP kan Social Development Policy hi a hlawhtling ang a, nasa takin khawtlang leh ramin a chhawr ang a, hma kan sawn phah ngei ang tih hi ka ring tlat a ni. Ka lawm e.

DY. SPEAKER : Pu C. Lalsawivunga, Aizawl South I bialtu zahawm tak i lo sawm ang u.

PU C. LALSAWIVUNGA : Pu Dy. Speaker, ka lawm e. Vawiihah Minister zahawm tak tak pahnih te demand kan sawiho leh a ni a, a lawmawm hle a. Chawhma lamah kan tel kim thei lo va, chawhnu lamah kan lo tel ve leh thei a.

Demand No. 31-na Agriculture-ah hian han lut ta ila. Kan ram hi ei leh bar ah kan intodelh lo va, kan nitin mamawh zawng zawng hi ram dang atanga kan chawkluh vek a ni a. Buh leh balah phei chuan kan thar hi sawi tham a la awm lo a ni. Chutiang dinhmunah chuan kan ding a. Chuvangin, tan lak a ngai hlein ka hria. Ram leh hnam intodelh lo, ei leh bar, sum leh paia intodelh lo hnam leh ram hi hnam zahawm leh ram ropui tak kan hre lo va, riltam leh pum ruak chung hian a huaisen theih loh. Chuvangin ei leh bar, sum leh paia intodelh tura tan lak a tul hle a ni. Nikumah khan tuna kan

House Leader zahawm tak hian ‘Kan sorkar hunah chuan vai buhfai kan ring tawh lovang’ tih kha ni 28th August, 2018 nitin chanchinbu headline ah lianpui mai khan an rawn ziaak a, ka chhiar a, ka hre reng a, a lawmawm ka lo ti a. Kan ram dinhmun han ngaihtuah vang vang pawh hian buh thar theihna ram zawl tha tak hmun tam takah a awm a ni. Phaizawl leileta siam tur ram tha tak Pathianin min pe a. Tin, slope area pawh kan nei bawk a. Amaherawhchu Pathianin leilung min pek hi vawiin thleng hian kan hmang tangkai lo va. Chaw atana kan rinpui ber buhfai pawh hmun hla tak atanga kan lei a la ngai a, hei hi a pawl hlein ka hria a ni. Chuvangin, ‘Kan sorkar hunah chuan vai buh kan ei tawh lovang’ tia mipuite min thlamuantu kha tunah chuan kan Chief Minister zahawm tak niin a ho hian hma kan la chho dawn a ni a, a phurawm hlein ka hria a ni.

Pu Dy. Speaker, hetiang hi kan dinhmun a nih lai hian Union Budget te kan en chuan Agriculture hi an ngaipawimawh viau zel a. Tun tum kan budget-ah hian Agriculture lam kan hawi na lo deuh ni hian a lang a. Pu Speaker, hei erawh hi chu kan Minister leh kan House Leader te hian lo enchiang sela. Agriculture-ah hian pawisa dah tam dan ngaihtuah se tiin ka ngen a ni.

Horticulture Based Farming system-te, Livestock Based system kan leh project chi hrang hrang ah te, Water harvesting structure-ah te hian hma nasa taka lak a ngai a ni. Tunah hian keini ho hian ram leh hnam intodelh tura theihpatawp chhuaha ke kan pen loh chuan thangthar ten min dem let a hlauhawm a ni. Chuvangin, tih tak takna thinglung nen roreltute pawhin ro i rel ang u, ke i pen tlang ang u tih ka sawi duh a ni. Sawi tur chu a tam lutuk a, ka duh tawk dawn mai ang a. Tui lak a awm loh avanga leilet siam theih loh te hi a tam lutuk a ni. Chhim lamah te pawh phaizawl zau pui pui, hman tangkai lohva dah mai mai saw a uiawm lutuk a ni. Chuvangin tan i la ang u. Pawisa pawh i dah tam ang u tih kha ka sawi uar duh a ni.

Tin, Demand no. 34-naah hian han lut leh ta ila, kum tinin ran pul hri a leng a, a hri len hun tur hriat lawk theih a ni lova, mahse ran pul hri a lo thlen hian buaipuiawm tak a ni si a ni. Kumina kan thlai chinah pawh pangang a lo puang a, khang kha kan hriat lawk a ni miah lo a ni. Hetiang

thil lo thleng hi a awm ve thin a ni. Hengah hian politics thil deuhva indem hi a awm thin a, kan fimkhur hi a tha in ka hria.

Tin, kan ram chhunga ramdang atanga ar, vawk, bawmg etc. lo lut thinte checking kan kal pui mumal lo lutuk hi a pawiin ka hria. Chuvangin border area hrulah reng reng hi chuan central thuneihna mah ni se, quarantine station mumal tak din a pawimawh hle a ni. Border area hi uluk taka venhim hna kan kalpui a thain ka hria. Hei hi kan Minister hian min umzui sak se a tha ngawt ang. Animal examination hi kalpui ngei ngei a ngai. Tha taka hma kan lak theihna tur chuan hmun hma kan neih a ngai a, qualified doctor kan neih te pawh a ngai a ni. Hengte hi he demand-ah hian ka tarlang duh a ni.

Demand No.41-naah hian silk production hi kan ram economy chawisang tur hian hmanraw tling a ni. Kan state revenue hnar tha tak tur niin sum kan deuchhuahna atan silk production hi a pawimawhin a tangkai em em dawn a ni. Kan state dinhmun en hian tih tak takna hi a awm lo nge, central atanga project hrang hrang kan neih te tipuitling zawnga tih tak takna kan nei lo nge ni, hei chen Department a kal tawh hnuah pawh kan economy chawisang tura silk production-ah hma kan sawn theih loh tih hi vawiinah ka zawnhna lian tak a ni. Chuvangin, thingtheihmu a ni emaw nauthak kan tih ang chi product hmang hian kan ram economy hi a chawisan theih em em a ni tih hi a chiang lutuk a ni. A hralhna lam nise a buapui awm bawkw si lova.

Chuvangin Integrated Sericulture Development atang te hian tun aia nasaa hma kan lak a ngai hle a ni. Tin, RKVY atangte hian engtingge tun aia nasaa hma kan lak theih ang? Theihtawp chhuaha Sericulture Department hmanga kan ram economy siam tha tura tan lak a tul tak zet a ni. Silk production hian kan state sum dinhmun a chawikang dawrh thei a ni tih hria in budget-ah pawh pawisa tam zawk dah ni thei se a tha hle ang.

Pu Speaker, Demand no. 7-na Excise & Narcotics-ah hian sawi duh ka nei a. Zu kan khap ta a, a lawmawm em em a ni. Amaherawhchu, zu kan khap rual hian damdawi kan ram tan, kan thalaite tana thil thalo kan thenawm state atanga lo lut a awm a ni. Hei hi uluk taka kan ven a pawimawh dawn a, check gate changtlung tak kan neih a ngai dawn a. Excise Force mi 4,5,6 vel duty na tur check gate hian awmzia a nei vak lo. Chuvangin, awmze nei check gate kan siam a pawimawh

dawnin ka hria a ni. Tin, Vairengte leh khawthlang lam atanga thil thalo lo lut lo veng tur hian hmeichhe officer pawh Excise & Narcotics-ah hian kan mamawh dawn a ni. Constable awm ho pawh an indaih chuang lo. Hmeichhia check turin hmeichhia vek tan lo chuan a lo harsa a. Chuvang chuan he harsatna kan neih mek sukiang turin hma engtinngge kan lak theih ang? Kan Minister efficient deuh hian a hrethiam ang ka sawi duh hi chu.

Tin, Social Welfare-ah hian tlemte Pu Deputy Speaker, ka sawi ang a. Pianphunga rualbanlo te hi a bika enkawl ngai leh duhsak bik ngai an nih avangin tuna kan kalphung aia tha deuh zawk hian engtinngge ke kan pen theih ang tih kha a ni a. Tin, Old Age Pension Scheme hi state matching share hmang hian i tipung teh ang u a, a tlem lulai lutuk deuh a ni. Upa te hi an hlu si a, min dampui chhung na na na hi chuan an hlawh hi state matching share hmang hian tipung teh ang u tih kha ka sawi duh a ni. Anganwadi Workers leh Helper te hlawh pawh hi enawna tihpun ngai a ni tih ka sawi duh baw a. Chutih rual chuan Pu Deputy Speaker, Minister zahawm tak khan ka bial chhungah Govt. T. Romana College leh Pachhunga University College-ah hian Tribal Girls' Hostel sak tura nikum lama approved sanction awm tawh kha engtikahngge min sak sak theih ang? Hma min laksak zel thei ang em? Kan va nghakhlel ve tih kha ka tlangkawmna a ni e. Ka lawm e.

DEPUTY SPEAKER : Tunge kan sawm leh ang? Pu Lalrintluanga Sailo, Dampa bialtu MLA zahawm tak i lo sawm ang.

PU LALRINTLUANGA SAILO : Pu Deputy Speaker, ka lawm e.

Vawiinah Minister pahnih demand kan han sawi leh a ni a. A bik takin demand-a ka luh hmain lawmthu sawi duhna Pu Deputy Speaker, ka nei a.

Hriat lawk hauh loh lam atangin chhiatna nasa tak hmannah pangang Fall Army Worm chungchangah kan ramah harsatna namenlo a lo thleng chho a ni tih kan hria a. Khawvel ram dang leh hmun danga a thleng angin kan Minister inpekna te leh a bik takin department hotute inpekna a nasa hlein ka hria a. Ka bialah pawh sawn South Sabual velah te a lo thleng a. A hmuna ka awm laiin harsatna an tawh thu ka hria a. Khaw chhe hnuaiah PWD Chief Engineer te nen kan kal a. Information ka dawn veleh department lamte ka phone a, kan Minister zahawm takte, ruahsur leh office kai loh ni pawh sawi lova hma a lakna a ropui hlein ka hria

a. Vawiinah hian a bik takin kan Agriculture Minister Pu C. Lalrinsanga leh a thawhpui department zawng zawng chungah lawmthu ka sawi duh a. Chhiatna lak ata min chhanhimtu Agriculture Minister kan nei a ni tih hre reng chungah he demand kan sawinaah hian kan ngaihtuah tel thain ka hria a. Chulai chu Pu Deputy Speaker, ka han sawi hmasa duh a ni.

Demand hi hun a tlem a, ka lut thuak thuak dawn a, ka chul ram fan dawn a ni a, min lo hriatthiam ka duh a.

Demand no. 31-na, Agriculture Department chungchangah hian ka sawi duh chu Pu Deputy Speaker, min hriatpui angin ka bial khu MLA bial 40, Constituency 40-ah hian potential area nei tha ber kan niin ka hria a. A chhan chu Tlawng Lui a luang a, Tut a luang a, Mar a luang a, Teirei Lui a luang a, Khawthlang Tuipui, chutiang chuan luipui lian tak tak 5 ka bial chhungah khuan a awm a. Chuti chung chuan vawiin thleng hian, Thangkura fiamthu sawi ang deuh hlekin Tiauchhum kian hma ei pawh hi kan thar lo a ni. Chutih rual chuan Saithah Zau-ah khuan Zau tha tak mai, leilet hmun tha tak tak mai kan nei a. La hman tangkai loh kan nei a ni tih kha kan Minister zahawm tak hian min lo hriat sak se ka duh a. A chhan chu khu bial khu enkawltu mumal nei lovin U.T kan nih atangin kum 47 vel a lo kal tawh a. Thinlung leh tih takzeta enkawla hma lak kan tum a ni tih hi min hriatpui ka duh hle a. A bik takin hetah hian a enkawltu department lam pawh hi kan bangbo viau a ni. Mamit District-a awm kan ni tih kan hre theuh a. Mamit-ah khuan DAO (District Agriculture Officer) a thu a, a hnuaiyah SDO a thu a. Chuta tanga khaw 2 kal kanin Kawrtethawveng-ah SDAO a thu leh a. Chuta tanga khaw 3, Kawrthah, Rengdil leh Zamuang kal kanin Zawlnuam-ah SDAO post kan nei leh a. West Phaileng, kan Civil Sub-Division-ah khuan engmah a awm lo a. Khulaiah khuan AEO (Agriculture Extension Officer) a thu a, chu chuan khaw 41 vel a enkawl a ni. Chuvangin, kan bial khu kan hnufum hle mai a. Kan Minister zahawm tak pawh khulaiah hmannah remchang neiin kan zuk kal dun a. SDAO office hmun tur te pawh kan neih theih thu kan inhrilh a. Khulaiah khuan hmun tha tak mai kan nei a. Hma han lak tak tak chuan a thawktu, hma han tawngtu tur, sipai hmatawngtu tur kha kan duh ve a ni tih kha he House zahawm tak hian min hriatpui se ka rawn sawilang tel duh a ni.

Tin, kan bialah khuan aieng te hi kan produce nasa em em a, heng hi a bik takin hma min lak sak a tulin ka hria a. Nimin lama kan Minister demand kan sawi

khan Industry lam te pawh khan hma min lak sak dawn a ni tih te pawh a lo lang a, kan lawm khawp mai a. Chutih rual chuan a tak taka enkawltu Agriculture Department hian min han hawi deuh se kan duh a.

Tin, Oil palm te pawh hma nasa takin kan la a, mahse, a hralhna hi a buaithlak em em mai a. Tin, kan inzirtirna a tha lo a nih ka ring a. Ka biala harsatna oil palm a kan neih chu loneituten nasa takin an bei a. A rah a lo lian a, 20kg-25kg te a lo ni a, awihpanga chin chi a lo ni vak lo va, Pu Deputy Speaker. An ti lum palh a, 1km dawn dawn um a ngai flat mai a. Chuvangin farmers hnenah kan introduce thar dawn a nih chuan a hmun pawh hi kan thlan thiam a thain ka hria. A nih loh chuan oil palm pakhat chema an han sahtlak lum kha umin nilengin chungkua an buai kha a ni mai a. Chuvangin, kan Minister pawhin a duh nazawng chin hi remti lo ang deuha kan kal loh chuan a hlawk lo a, a tawpah thing anchhedawngah kan chhuah leh mai ang tih ka hlau deuh a ni.

Demand no. 37-na Co-operation-ah hian sentence hnih khat leka sawi duh ka neih chu, nichinah khan member zahawm tak Pu Zama khan a rawn sawi a. Kan Finance Minister, kan Chief Minister ni bawkin a thusawiah khan chiang deuhin kan hmu a, kan hmuh thelh loh thain ka hria. Co-operation thumthatna atan hian NCDC loan a bik takin hemi atan hian lak a nih dawn thu a speech-ah khan a tel a, ka lawm hle a. Co-operation thumthatna atana Ministry hma la hmasa ber pawl kan ni awm e tiin wawinah hian ka sawi lang duh a ni.

Tin, Irrigation chungchang, Demand no. 47-ah hian, ka bial chungah hian khatiang hmalakna tur tam tak a awm a. Nichina Mamit bialtu zahawm takin a sawi ang khan a thawktu te pawh hian min thutchilh ve deuh se, enge an thawh thin te pawh hi kan hre chiah lo deuh a ni, mipui hian tih lai kha ka tarlan duh dan ni mai sela. Dr. K Beichhua, Minister zahawm tak Demand no. 7-naah hian, ani pawh hi ka fak duh a. Zoram mipuite ruma kan tahna zu chungchangah harsatna namenlo a awm a. Pu Deputy Speaker, zu han sawi leh a kaihnhawih han sawi reng reng hian i veilam ami te hian a neitu emaw an inti deuhin ka hria a, an rawn react nghal zel mai lai hi kan ngaihtuah nawn te pawh a tha awm e ka ti duh a. Mizo mipui kohhran thlenga kan rumna tireh tura Minister chak takin hma a la mai ni lovin, Rangvamual-ah te pawh khuan zanah a duty peih a ni. Excise Force-ah te hian kan let law law dawn em maw ni chu ka ti deuh thin a. Chuti khawp chuan hma a la a, thahnem a

ngai a, a thawhrimna hian rah tha a chhuah ngei ang tih ka ring a. Chutih rual chuan Budget Speech-ah te pawh khan sum dah belh a nih dante kan hmu a, Excise Force tihlen a nih dan tur te. Vawinah a hma hruai turte pawh sorkarin lak phalna te kan han pe ta zel hi a lawmawmin ka hria a. Tin, a bik takin Phaileng-ah khuan khawthlang lam Tripura panna lam te , hmun pawimawh tak Phaileng khuan kan nei a. Tah khuan check gate te, out post te pawh min dah sak thei em tih kha min lo chhinchhiah sak se. A chhan chu ruih theih thil a hluar nasa em em mai a, camping kan nei luh luh mai a, chutiang chuan kan bei a ni. Chulai chu kan Minister zahawm tak hian min lo chhinchhiah sak se ka duh a.

Tin, Demand no.29-na Social Welfare chungchangah hian nichina member dangten an sawi kha ka thlawp khawp mai a. Old Age Pension hi tih pun mai ni lovin, a thar kumtina lo chhuak zel te pawh hi department-ah hian kan in register chhoh zel hi thain ka hria a. A ngai hi kan ring rei deuh hlekin ka hria. Hei hi kan ennawn thain ka hria a. Chuvangin helai hi hma lak ni se ka duh a. Tin, a thil sem lamp ang chi, NGO ten min bawr viau vek a, i ding leh vei ami, kan vai hian. Social Welfare Department te hi kan hmang tangkai thin a, ketli, no, PA set tih chi ang neuh neuh kha, tun hnuah hian a lo lang ta meuh lova. Hei hi kan Minister hian hma lak leh dan a hria em ? Keini MLA ho hian kan mamawh nasa si a. Bial han fang ila, he House zahawm taka kan din theihna tur atana hma min lakpuitu ni chiah lo NGO rual hi application rawn thelut hmasatu an ni fo mai a. Chuvangin helaiah hian he Department kaltlang hian Pu Deputy Speaker, hma min lak sak se tih ka han ngen duh a.

Tin, Social Welfare Department hi ka lo la hre chiang lo em em mai a. Amaherawhchu, ram mipuite zara MLA-ah te ka han awm ve hnu hian thil kan han hmu chho ve zel a ni a. Detailed Projects Reports-te siamin hma kan han la a. Central-ah Tribal Affairs-te nena in tied-up-a thil lo tih kha a ni tih kan hmuin, a takin kan tawng chho zel a. Hengah pawh hian kan Minister hian a men lo tizau deuh hlek se ka duh a. A chhan chu state sumin a daih loh tam tak hi concept paper-te ziaka hma han lakna tur hi keini bial vawngten kan nei ve a ni tihte hi min lo admit sak se ka duh a, ka han sawi advance a ni.

A dawt lehah chuan Demand no. 34, Animal Husbandry & Veterinary chungchangah hian (**DEPUTY SPEAKER** : Minute 1 kan la nei aw) Pu Deputy

Speaker, he House hi zawh duh ka nei a. Sorkar hmasa khan Australia vawk lian kha a sawi mawi vut vut mai a, man to tak khan a leiin ka hria a. Khawiah nge a awm? A lian viau tawh ang ka ti a. Vawiina kan vawk vulh pangngai anga thang a nih chuan Sai a tiat hial awm mang e aw ka ti a. A nih loh chuan a thlah punna lamah hian hma kan la nge ni, Lawngtlai lamah sawn a enkawlna a awm nge tih ka zawt duh a. No nei chi a nih chuan mipui hmaa theh lar turin MLA-te hi min han sem ta se, a man kha a to em em mai baw si tih kha he House-a kan thut ve hmaa a thawm kan lo hriat kha a ni a. Kan Minister zahawm tak hian min zawn chhuah sak teh se tih kha ka han sawi duh a.

Tin, AH & Vety chungchangah hian district hi thum chak a tha khawpin ka hria a. Natna chi hrang hrang ranin a lo vei a. A bikin keini bial khu Bangladesh lam atanga ran lo lut a awm a, Tripura lam side atangin, Assam side-ah lo lut awm baw thin a. Hemi bikah hian District AH & Vety hi thum chak a ngai hle a, chu lai chu Pu Deputy Speaker, ka sawi duh a.

A tawp nan Demand no. 41-na Sericulture chungchang hi tawitein kan tarlang duh a. Ka bialah a bik takin, Mizoram leh India ram pumah pawh lang pha khawpin Darlung Centre-ah sawn kan ti tha a ni. Kan Minister hian all India-ah te pawh khulalah khan lawmman kan zuk dawng a ni tih min lo hriat sak se a thain ka hria. Tin, sawlalah sawn eizawn nan tak taka hmang kan thahnem viau mai a. Kei hi chuan pangang lam hi ka lawm lutuk lo a, ralkhata ka hmuh hi ka duhtawk viau a. Amaherawhchu, midang tana malsawmna ni tur kan nih chuan kan lawm vak lo a nih pawhin a enkawlna kawngah te chak zawka hmalakna tur kawngah hian tha kan thawhpui a ngai si a, kan Minister zahawm tak hian min hriatpui se tiin Pu Deputy Speaker, he demand hi kan ram tan, kan bial leh kan department tan thil tha a nih avangin a nih ang taka pass ngei tur hian ka rawn ngen baw a ni e. Ka lawm e.

DEPUTY SPEAKER : Tunge kan sawm leh ang le? Pu Ramthanmawia, East Tuipui bialtu MLA zahawm tak i lo sawm ang u.

PU RAMTHANMAWIA : Pu Deputy Speaker, ka lawm e. Vawiina Minister zahawm tak pahnihte demand sawi tur zingah hian Demand no. 31-na leh Demand no. 47-na Agriculture leh Irrigation & Water Resources tih hi ka sawi kawp mai ang a. Pu Deputy Speaker, kan hriat angin kan ram hi ei leh barah kan la intodelh lo a. Intodelh tur chuan buh leh bal, thlai thar chhuah tam a pawimawh tih

kan hria a, sorkar pawh hian a ngai pawimawh a. Chuvang chuan hemi department pahnih tang kawp tlat hi buh leh bal kan thar chhuahna tur hian an pawimawh em em mai a. Mizoram hmun hrang hrangah buh chin theihna ram awl member zahawm tak takten an rawn sawi tawh a. Chung zingah chuan ka bial East Tuipui-ah hian kut hnathawka eizawng hi mi 190 zet an ni a. Tah chuan buh kan la chin theih lohna, land development siam theih si hi khaw 18-ah hian kan nei a. Pu Deputy Speaker, entirnan Vaphai-ah Hmawngpui zau leilet kan ti a, hectare 50 dawn lai leileta siam theih a awm a ni. Tunah hian tin 10100 vel thar chhuah mek a ni a, a siam theihah khian. Tuna la siam tur khi siam theih ni ta se tin 20000 dawn hi Hmawngpui zau-ah khian siam theih a ni. Tin, chutiang bawkin Phaizau, Vangchhia-ah hectare 25 siam theih a ni a. Thekpui-ah hectare 30, Leisenzo-ah hectare 43, Vanzau-ah hectare 4, 12 hectares Lianpui-ah, Zawlseih-ah hectares 28, Sesih-ah hectares 118, a vaiin hectares 300 zet hi buh leh bal chin theih na turin land development kaltlanga hma lak theih a ni a. Chumi chu kan hmabak ah a awm a, hei hi kan Minister zahawm tak hnenah pawh hian kan thlen tawh a, tunah hian ka sawi nawn leh duh a. Heng te hi vawi leh khata hma min lak sak thei lo a nih pawhin a theih chin chinah hma min lak sak turin ka ngen a. Vaphai leilet phei hi chu tin 20,000 dawn lai thar theihna tur a nih dawn avangin tui awm loh vanga leileta siam theih loh a ni a. Hei hi thil thar reh chuah ngaiin ka ring a, tun hmaa hma an lo lak tawhna te, irrigation hmanga tui an lo lak tawhna te, tunah hi chuan tui hna hi a tlem tawh avangin tuihna lak tur hi a vang em em tawh a. Thui tak te lak a ngai a , tunlai solar hmanga tui pump te hi sawi a ni a, water supply scheme ah te. Tiau lui te khi pump ta ila, chutiang chuan heng tui an hmuh loh vanga leilet siam theih loh hi chutiang scheme hmang te chuan project siamin hma a lak theih ang em tiin project siamin kan Minister hnenah kan thlen a. Tin, hmun hrang hranga ka rawn sawi te pawh hi a ni tho a, Thekpui te pawh hmun tha em em, potential tha lutuk a ni a. Ka bial chhungah kan sawi tak ang khan leileta kan siam theih la siam loh hi siam thei ta ila, buh tin sing tam tak, sang tam tak kan thar thei dawn a ni tih kha vawiinah hian ka sawi nawn leh duh a.

Tin, Irrigation chungchangah manpower chungchangah khan kai ta ila, tuna kan harsatna zawng zawng kha tui awm loh vang a ni a. Tui kan neih loh avangin, tui lak tur a awm loh avangin leilet a siam theih loh a ni. Heng hi tui lak tur awm ta sela chuan buh mai bakah thalah thlai chin theih nan kan siam thei dawn a, chumi ti hlawhtling tur chuan Irrigation Department a hi a pawimawh hle mai a, anni hi an

pawimawh ang hu in an manpower hi alo tlem viau mai a. Champhaiah khian division kan nei a, district pum pui enkawltu a ni nghe nghe a. Anni hnuaiah hian Sub-Division pahnih Champhai leh Khawzawl an awm a, district pumpui viltu Champhai Division office thawktu khi han en chiang ta ila, thawktu pangngai chu 5, a ngheta thawk chu EE pakhat, Account Officer pakhat, SA pakhat leh UDC pahnih chiah an nei. District pum viltu atan chuan an tlem viau mai a. Hei hi kan Minister zahawm tak hian hetiang department pawimawh tak buh leh bala kan intodelh theihna tura hma la tu tur department-a thawktu hi lak belh leh dah belh an ngai a ni tih ka sawi duh a.

Tin, Champhai Sub-Division bakah hian Sub-Division hran hi Khawbun-ah te hian dah theih a ni ang em? Champhai Sub-Division atang khian duhtusamin min enkawl zo lo niin ka hria a. Heng te pawh hi min en sak sela, Khawbung-ah hian Sub-Division nei thei ila chuan tun aiin hma kan la chak theiin ka ring a ni.

Demand no. 34-na ah khan han lut lawk ila, ka bial chhungah khianin ran vulhna a bik takin, sial te an vulh nasa em em mai a, Mizoramah vawkah hian kan intodelh hnai berin ka ring a. Tih loh chu ke pali nei sial, bawng, kel leh beram ah hian kan la intodelhlo hle mai a. Chuvang chuan hengah hian hma lak thar a ngaiin ka hria a. Tin, khilai kan ran vulhna, sial vulhnaah khian a bik takin Vanzauah te khian VFA kan nei thin a, amaherawhchu a kaisang a, hmun dangah an dah ta mai a. Heng te hi kan Minister hian min hriat sak sela. Tin, Vaphaiah hian Vety doctor kan mamawh em em mai a, tun hma deuh khan Vety doctor hi Vaphai-ah hian dah a ni thin a ni. Amaherawhchu hun rei tawh tak atang khan kum 6/7 lai vel chu Vety. doctor hi kan nei tawh lo a ni. Hei hi min dah sak leh turin kan ngen a ni, Khawbung leh Khuangleng-ah pawh hian Vety. doctor post neiin hun rei tak chhung helaiah hian doctor neilo in kan awm tawh a. Kan hriat angin ramri hnaiha awm kan ni a, member zahawm tak tak te khan an rawn sawi a, ran hri tha lo te lo lut thei a ni a. Hengah hian doctor khilayah khian kan neih si loh avangin ran lo lut tur te pawh khi eng ang dinhmun nge tih pawh hriat loh in an lo lut thin a, vawk hri te pawh a lo leng thin a nih kha. Chuvang chuan, khilayah khian Vety. Doctor min dah sak ngei turin ka ngen leh a ni. Tin, Farkawn-ah hian Rural Animal Health Centre khi a tlabal tawh hle mai a. Ramri hnaiha awm kan nih avangin khi pawh khi a sak that dan a awm thei ang em tiin kan Minister hnenah ka ngen leh bawk a.

Demand no. 29 na hi tlem sawi duh ka nei a. Member zahawm tak sawi tak ang khan Social Welfare Department hian kan hriat ai hian hna an lo thawk nasa daih mai a. Naupai lai atangin tar thlengin min enkawltu an lo ni reng mai a. Chu mai ni lovin, bial fanga kan han kal in, ka theihna apiangah Anganwadi Centre hi ka tlawh a ni. An lo lawm em em maiin an lo ti tha em em mai a. Naupang, naupang te te te nutrition tha tak nen an lo enkawl vek a, an lo enkawl fai em em a. Anganwadi Centre an lo cheimawi a, naupang inkhualtelem na tur toys te an lo nei. Chutiang chuan he Department hi kan ram tan hian a pawimawh a ni tih hi ka han hmuchhuak thar a, duat pawh an ngai viauin ka hria a. Social Welfare Department hi kan ram tan an va tangkai em em. Naupai mek atanga tar thlenga min enkawltu an nihna hi vawiinah hian sawilan ka duh ve hrim hrim a. Tin, worker ten min lo fiam danah chuan, ‘Anganwadi Centre, MLA min tlawh hmasa ber i ni,’ te min lo ti ve a, lawm pawh ka lawm khawp mai a, ka inchhir lo khawp mai. Heng atanga bul tan tha a, kan naupangte, kan fate an lo enkawl a, an theih ang angin thil an lo zirtir a, eitur tha an lo pe te hi a va hlu em! He department hi kan ram tan a va hlu em! A thawktute pawh hi an fakawm ka ti a. Kan Minister chak tak hian he department hi tan han la se la, kan ram tan, kan hnam tan hmasawna leh kan naupang te te te pawh hriselna tha nen an lo puitlin a, an lo seilenna tur a ni tiin he department-ah hian tan rawn la turin ka ngen a. Tichuan, Social Welfare Department ka han hmuhchhuahnaah chuan kan ram tan hian department langsar miah si lo, hriat hlawh vak si lo hi, an hnathawh chu a lo ropui viau a ni tih hi ka han hmuchhuak thar a ni. Pu Deputy Speaker, sawi tur chu ka la nei a, mahse ka duh tawk mai ang e. Ka lawm e.

DEPUTY SPEAKER : Pu K.T.Rokhaw, Palak bialtu MLA zahawm tak i lo sawm ang u.

Pu K.T.ROKHAW : Pu Deputy Speaker, ka lawm e. Demand no. 7 na – Excise hi kan sawi phawt ang a. He department hi a changtu Minister hi Siaha a MTP Hqrs. President term 2/term 3 lai lo ni tawh a ni a. Ruihlo dona kawngah hian Saiha District-ah hian sulsutu ber a ni a. Vawiinah Excise Department a chang pawh hi a chan awm tak a niin ka hria. Excise & Narcotics Department hi he sorkar tan chuan department pawimawh tak a niin ka hria a. A chhan chu MLA inthlan hma atang khan MNF party au hla ber chu, ‘kan sorkar chuan zu kan khap ang,’ tih kha a ni a. Khami kha mipui pawhin an lo vote tlinna pawimawh ber point a niin ka hria a. Tichuan, an lo sorkar ta ngei a. An sorkar veleha an tih hmasak ber pawh Mizoram

pum dry area a puan a ni. Chuvangin, mipuia an intiam angin zu khap kha an ngai pawimawh hle a ni tih tah khan a lang viauin ka hria. Chu chu a lawmawm viauin ka hria a. Mahse, ka rilru khawih viau mai point pakhat ka sawi duh chu- Kan Finance Minister-in budget a rawn pharh khan an flagship programme pawimawh ber SEDP-ah khan Excise Department tan pawisa chengkhatmah dah a nih loh khan mak ka ti khawp a, a chhan chu a dik tak chuan SEDP atanga pawisa, chhungkaw tina nuai 3 theuh sem leh zu khap kha a dik tak chuan tuna MNF sorkar an tlinna chhan pawh a niin ka hria a. Tin, Mizo mipuiin an lo vote nachhan pawh kha a niin ka hria a. Khata SEDP an flagship programme-a Excise & Narcotics Department tana pawisa chengkhatmah dah a nih loh khan zu khap hi an lo ngaipawimawh teh chiam lo a nih dawn hi tih ngaih dan min neih tir a ni.

Vawiinah hian thla 7-na he sorkar hian a hmang mek tawh a. Excise Minister khan Excise Constable mi 33 vel lak belh a nih tur thu a sawi a, kha kha a lawmawm em em rualin a beitham lutukin ka hria a. He Constable 33-te hi a dik tak chuan eng tham mah a ni dawn lo a, Vairengte Check-gate duty tur pawh an indaih dawn lo a ni.

Mizoram Liquor Prohibition hi hlawhtling ngei tura he sorkar hian hma a lak a nih chuan enforcement kan tihchak a ngai hle dawn a. Excise Force bik hi a tlem berah mi 500/600 vel lak belh a ngaih ngei ka ring. Chuvangin, kan Chief Minister-in zu khap a lo tiam tawh angin Excise & Narcotic Department-ah hian a demand-ah hian 39% in nikum ai khan he budget-ah hian a tam zawk a, hei hi a lawmawm ka ti a. Chuvang chuan Excise Force hi mi 500/600 vel tal chu he sorkar hian la ngei se. Tin, he zu khapna dan hi hlawhtling ngei se tih hi ka duh a. Chuvangin, kan Chief Minister-in zu khap a lo tiam tawh angin Excise & Narcotic Department hi thuan that a, zu tirem ngei turin hma lak ni se.

Tin, vawiinah hian phalna neia zu zawrh chu kan khap thei ta a, phalna nei loa zu zuartute erawh chu an pung chho mek zel a. He'ng mite titawp tur hian theitawp chhuaha beih a ngai a ni. Zu hi khap a nih rual hian khapna hnuaiah dan loa zu zawrh a hlawk em em a ni. A in duh an tam si a, zu khap hneh hi harsa tak a nih dawn avangin enforcement tih chak hi a pawimawh em em dawn a ni tih hi ka han sawi nawn duh a ni.

Tin, Pu Speaker, Demand no. 34-na Vety. hi tlem ka han sawi ve ang e. Ka bial 'Tipa' Sub-Division hi Sub-Divisional Veterinary Officer awmna hmun a ni a, mahse Tipa mipuite hian Sub-Divisional Veterinary Officer hmel an hmuh lohna hi a rei tawh khawp mai. Engpawh ni se kan Minister hian SDVO hi Tipa-ah khawngaiha min dah sak turin ka ngen duh a, a chhan chu Tipa hi Burma atanga ran, a bik takin ar te, vawk te, bawng te lo lohna hmun a ni a. Vety Doctor an awm loh avangin a check hleih theih loh a, an hrisel leh hrisel loh te kha. Chumi avang chuan hetah hian a rang lama SDVO hi min dah sak turin ka ngen a ni. Tin, Social Welfare- Demand no. 29 hi tlem han sawi leh lawk ka duh chu :

Saiha-ah khian District Social Welfare Officer kan nei a, a office-ah hmanni chu ka va leng a, District Social Welfare Officer pakhat leh LDC pakhat leh Grade IV pakhat chiah an awm a. District Social Welfare Office si officer pakhat leh LDC leh Grade IV pakhat chauh awmna hi an awm ka ring lo, district pakhat ve lem si. Chuvang chuan kan Minister hian clerical staff te hi a tul anga dah belh turin karawn ngen duh a.

Tin, ka rilru-a awm chu Tar pension hi a tlem lulai lutuk a, tunah hian tih san ni sela. A demand-ah pawh nikum lam aiin pawisa pawh pek belh a ni a. Tin, demand no 37na Co-operation ah hian kan Minister zahawm tak hi experience nei tha, Deputy Speaker te pawh lo ni tawh, Minister te pawh lo ni tawh a nihna a hriat khawpin ka hria a. Hmanni khan news paper ah leh TV news ah kan Minister khan MIZOFED petrol pump 24 hours, zan leh chhunah hawn a ni tawh ang tih arawn puan kha a ropui ka ti a, a lawmawm ka ti tak zet a. In hriat angin keini hi kan bial a hla a, mitthi kan neih chang te hian zan dar 11 leh dar 12 ah te petrol leh diesel thunna tur a vang khawp thin a. Zannah petrol pump hawn a nih loh avangin kan buai em em thin a ni. Tunah chuan kan Minister in a hmalaknaa a chhun a zana petrol pump hawn a nih tawh dawn avangin harsatna kan nei tawh dawn lova, chuvang chuan Cooperation Minister chungah lawmthu a hmasa ka sawi duh a ni.

Demand no.31 na Agriculture hi Saiha DAO, District Agriculture Offic-ah hian AEO 4 kan nei a, 4-ah chuan pakhat chauh tunah khian a awm a. Tin, SMS (Subject Matter Specialist) (Pu Deputy Speaker, a tawpna ka ni deuh tawhin ka hria a, chuvang chuan khawngaihin minute khat chauh,) SMS pakhat chauh kan nei a,

mahse SMS hi kan neilo district pakhat ah chuan SMS pakhat chu awm ngei ngei tura ngaih a ni a.

Tin, DAO khian Driver a neilo a ni. Computer Operator pawh kan nei lo a ni. Chuvang chuan khawngaih Agriculture Minister hian min lo dah sak se kan lawm hle ang. Tin, Custom hiring hnuaiah hian Saiha district atangin tractor 10 vel an rawn dil a. An dil ang hian khawngaih pek ni se a lawmawm khawp ang. Tin, Tuipang Sub-Division ah hian SDAO chauh a awm a, clerical staff pakhat mah an awm lova. Amah chiah hi a awm a, a chowkider nen, chuvang chuan clerical staff te hi khawngaih taka min lo pe turin ka rawn ngen bawk a ni e. Ka lawm e.

DEPUTY SPEAKER : Aw le, Group Leader te kan sawm mai tawh ang a, tunge sawi ang le ? Pu Lalduhoma, Serchhip bialtu MLA zahawm tak i lo sawm ang u. Ani hian minute 15 a nei a ni tih kha member ten hria ila a tha awm e.

PU LALDUHOMA : Pu Deputy Speaker, tuna kan sawiho mek department 7 te hi chhungkaw mal eizawna atana kawngro su tak tak mai hliir, kan per-capita income te pawh tih san kan duh chuan heng department te hi kan tuaihnum ngai te an ni tih hi kan hre vekin ka ring a. Amaherawhchu chutih rual chuan nikum lam budget an phak lo tlangpui a, ngaihpawimawh an hlawh lo va, chumai ni lovin sorkar flagship programme SEDP hnuaiah hian Cooperation chauh hi a tel a. Department 6 te hi chu tuna kan sorkar ding laiin a flagship programme-a telh ve tlaka a ngaih loh an ni hi pawh ka ti khawp mai a ni. Chuvangin heng department kawngro su tak tak ni si, mahse, flagship programme-ah pawh tel ve phalo heti zat kan han nei hi a vanduaithlak ka ti a. Helaiyah tawngkamin thil ropui tak tak sawi thin mah ila, a tak taka kan budget atanga thil rawn into chhoh dan en hian a tak chang thei tur leh tur lo chu a lo lang thin a ni.

(Dy. Speaker: Chair kan han inthlak lawk ang e.)

(SPEAKER AT THE CHAIR)

Chu chu thuhmahruaiah ka sawi duh a.

Irrigation chungchangah hian ka bial chhung Mat phai khi buh leh bal bakah zikhlum te, fur thlai leh thlasik thlai te, thei te thar tamna hmunpui a ni a. Amaherawhchu, irrigation-ah khian a chau em em mai a. Chamdur Project bik hi ka

han sawi ang a. Hetah hian tui kawng kan neih loh avangin hectare 80-a zau siam belh theih la awm khi siam theih lohin a la awm a ni. Kum 2003 khan tui lak tur tha deuh a awm a, lui pakhat an khuap a. A contractor khan mi pathum hnenah a hna kha a hralh chhawng a. Tichuan a lo chhe leh ta a. Tunah khian hnatlang tein an han repair thin a, chhungkaw engemawzat chuan an leilet an nei thei tawh lo a ni. Tin, link-road hi kum 2003 khan PMGSY leh BAFFACOS atangin laih a ni a. Kum 2018-ah repair a ni a. ₹12 lakhs hi repair nan pek a ni a, chu chu mi pasarih hnenah hralh chhawn a ni bawk.

Chuvang chuan a thawhna tak tak atana sum hman hi chu a zatve pawh a tling ta lo reng reng a, that ngaihna a awm lo a. Kum 2018-ah vek khan NEDP atangin ₹22 lakhs pek a ni leh a. Party mi ten an thawh thin avangin hna hi a chhe em em a, awmzia a neilo a. Tunah khian motor eng chi mah a kaltlang thei tawh lo a ni. Tui lak tur hi a tha hle a, khimi khi siamthat a nih chuan hectare 80 vel khi leilet ah kan siam belh thei ang a. Thlasik thlai chinna tur leh thei dang chinna tur pawh ram kan neih belh teuh dawn tihna a ni a. Hei hi min ngaih pawimawhsak turin ka duh a.

Amaherawhchu, hna hi kan pe leh a nih pawhin party worker-te hnenah contract hna pek vek hi chu sim hram hram theih tawh hi zir ila ka ti ngawih ngawih a ni. An sawi thin a, 'Pastor ten politics an sawi a, politician ten Pathian thu an sawi thung a, contractor ni lo ten contract an thawk a,' an tih ang deuh kha kan nia. Contractor ni miahloin contract kan thawk nasa lutuk thin hi tu sorkar hnuaiah pawh hna chhiat chhan a ni thin.

Chuvangin, heng sumte hi kan siam thei a nih pawhin Chamdur Field Management Society an awm a, tha tak, an kutah contract hna hi pe ila. Anni chuan an thawh belh duh hial ang, an eizawna a ni, a tha dawn tih kha a chiang reng a. Hetiang hi a principle in kalpui thei tawh ila tih ka sawi duh a.

Tin, tui lak tur nei, huan nei te kan tam em em a. Pipe a awm chuan tui lak tur nei hi kan tam a ni. Amaherawhchu, pipe hi a harsa viau reng mai a. Subsidy te a ngai a, dil te a ngai a. Chuvangin, budget atang hian pipe hi lei teuh mai ila, a thlawnin a duh duh hian an duh zat zat la mai se. Tui lak nan lo chuan hmanna dang a awm chuang lo a, hralhna tur pawh a awm chuang lo. Chuvang chuan khatiang pipe kha awm se chuan Mizoram ah hian kan thil tharchhuah hi a tam phah hle ang

tih ka ring a. Kei hi farmer dik tak ka nia. Tunah pawh lo ka nei a, thlai hmun ka nei a. thei huan ka nei a. Hlo thlawh ah pheih chuan tumah ka huphurh bik lo a ni. Chuvangin a tak taka hretu kan nia. Pipe hi a thlawnin awm thei se, cheng tam man a ngai miahin ka ring lo, chu chu la mai se, mi tam tak harsatna hi a solve nghal ang.

Tin, Mat lui khi a lakna, irrigation system khi an han siam a. Hman deuh lawk khan an commission a, an commission tuk lawk atangin tui a kal thei leh lo nghal mai a ni. Tih tak vekah khi aia a hnar deuh, a sang deuhah te khian lo han dawt tir se a tha tur a ni a. Sum tam tak a kal ral leh si a, pawl ka ti a. Kuminah te chuan kan budget atangin tihngaihna a awm tawh lo a. Amaherawhchu, hun kal zel turah, khi khi Mizorama kan chhekin pawimawh tur, kan buh in pawimawh tur a nih avangin kan Minister hian min lo chhinchhiahsak thei se ka ti hle a ni.

Tin, EE office hi sak zawh daih tawh a ni a, a rei tawh a. Division an dah dawn ni awm tak a ni a, EE quarters te an sak chuan. Vawiin thlengin Division kan la nei lova. Engtikahnge khi District headquarter ah khian Division hi kan neih ve theih ang tih ka zawt pah baw a. Tunah khian EE chenna tur chu SA in a luah mek a ni.

Tin, Sericulture ah hian kan kal ang a. Serchhip-ah khian District Office tur hi a hmun tur kan nei fel diam tawh a. Amaherawhchu, building hi sa mai tura kan inngaih lain thil a kal muang hle mai a. Hei hi kan Minister-in min hriat sak se la ka duh a. Sak thuai thuai kan nghakhlel hle a.

PU LALDUHOMA : Tunah khian khaw hmawr femah a awm avangin mipui tan pawh dawr a harsa em em mai a, buiding pakhatan an inekbeng a a buaithlak hle a ni.

Tin, Thenzawl Sericulture Farm hi upgrade a tha hlein a lang a, Muga Farm atan siam ni thei se, khilai khi ram pumin kan chhawr theih tur a ni a, approach road khi a chhe em em tawh mai a, hemi repair-na hi kan mamawh tawh hle mai a. Tin, regular staff pakhat chauh kan nei a, MR dah belh a ngai a, MR labourer hi pahnih chiah tunah khian an awm baw a ni.

Tin, Sericulture Cluster hi siam tumna a awm deuhin ka hria a, amaherawhchu kan budget lam te ka han en a, ka hmu fuh lo nge ka hmu mai lova, hei pawh hi a rang lamin tihpuitlin ni se kan duh a.

Excise-ah kan sawi tawh a, tukin lamah, kan Minister zahawm tak pawh khan tha takin min chhang tawh a. Thenzawl-ah khian Outpost hi kan mamawh dan hi a namailo viau a ni. Chuvang chuan remchang hmasaah Outpost min dah sak ve turin, kha hna lak tur eng emaw zat kan nei bawk a, ka han sawi nawn leh duh a.

Tin, Social Welfare-ah hian Serchhip-ah khian One-stop Centre sakna tur sum hi pek tawh kan niin ka hria a . Amaherawhchu sum te pawh sanction ni tawh siin tunah hian hmalakna hmuh tur a la awm lo va, khawilai stage-ah nge a tan ka hre chiah lova, hei hi min han enchian sak turin ka duh bawk a. Anganwadi repair-na hi Anganwadi Committee hian a tlangpui thuin an thawk thin a, a Committee na na na chuan thahnem an lo ngai a, thawh pawh an thawk tha a. Tunah hian he sorkar tharah hian ruling party unit ten an chuh nasa hle tih kan hria a, an lo thawh lai mek te pawh khaw thenkhatah chuan an chhuhsak a ni awm e. Hetiang hi tih loh hram hram hi a tha mang e aw ka ti a. Kan party mite an nih chuan an lo eiruk deuh te pawhin, an thawh chhiat pawhin kan hau tha leh ngam si lo va, an ina thlen te kan duh leh a kan dawih duk zel a. Chuvangin, anmahni veng leh khua theuha Committee te kutah n pe hram hram thei ila a thain ka hria a.

Ruihhloin min tibuai hle a, kan hria a Mizoram hi kan hmingchhiatna ber, ramthar field-ah pawh kan hmingchhiatna ber chu ruihhlo vang hi a ni mai a. Kan tu kan fate hi an soal bik a ni lo, an thatchhe bik pawh a ni lo, ruihhloin a tihchhiat hnu erawh chuan an soal ta em em thin a ni mai a. Ruihhlo hi awm lo ta se Mizoram hi kawng tam takah kan tha khawp ang, kan hming pawh a tha ang. Chuvangin hei hi chu ralpui phiara kan phiar a ngaiin ka hria a, kan House Leader pawh hian he thil hi a vei hlein ka hria. Community Healing Centre lian tham din hi ngaihtuah ta ila, kumin budget atan te pheih hi chuan sawi ngaihna a awm tawh lo zo va. Amaherawhchu, kan kal zelna turah hian Community Healing Centre tha deuh hi World Health Organization te nen pawh tang tlanga kan tih theih tur hi ngaihtuah ila. Tichuan sum pawh dah tam ta ila, kan ram hi ruihhlo in min sawisakna laka fihlim tum turin theihtawpin kohhran leh NGO-te nen, sorkar chakna nen thawh tlan hi a chakawm tak zet zetin ka hria a. Hemi lamah hian tunah hian hmalakna han sawi tur thil thar a lang lem lo hi chu pawh ka ti viau a, hun lo kal leh zel turah kan inchah ni se.

Tin, Agriculture-ah hian lemongrass hi nikum khan AMFU-in an supply a, Nagaland atangin. Thil chi reng reng hi a supply hunin a zir loh chuan awmzia a nei lo reng reng a, timing a pawimawh a, quality a pawimawh a. Chhim lamah sawn an chin tir niawm tak a ni a, hei hi sorkar hmasa hunlai amite a nih avangin tunah chuan min hrilh thei lo pawh a ni mai thei a. An that pui em? Engzah nge senso, a inbuk tawk em tih hi ka rilruah rinhlelhna a awm deuh hlek a. Heng hi kan tih dawn chuan A-Z kan chiang tur a ni. Entirnan Red Oil Palm te pawh tuna kan sorkarte sorkar hmasak tuma an tih kha a ni a, vawiinah chuan ti hi a ni tawh. Pu Speaker, huai taka ka sawi theih chu Bukvannei bul hnaia Red Oil Palm chingtute tih loh hi chu an hlawhchham vek dawn, Mizoramah hian. Red Oil Palm chingtute pawh hi frank taka hrilh mai tur, tha an seng thlawn dawn! Tunah a zik te an kheh leh tawh a, phawi leh turin JCB-te an ruai a, kung khat ₹60/- a paih leh tur tein an ruai a, BPL siam lehna khawl mai mai a ni heng te hi. Kan Agency 3-te pawh pakhat a in withdraw fel tawh a, pakhat hi in withdraw tluka ngaih a ni tawh a, Godrej hian Bukvannei-ah a la ti hram hram a. Thil hi kan ti ngawt zel a, kan mipuite hi kan hrem a ni ngawt zel a. Chuvangin, a principle-in Horticulture te, Agriculture atang tea mipuite chin tur hi chu a market nen, a rate nen kan hmutlang zan a nih loh chuan hawh u, i ti miah tawh lo ang u, PU LALDUHOMA : kan inhrem rei tawh tih hi vawiinah uar takin ka sawi duh a ni. Jatropha-te hi din chhuahpui chhungkaw pakhat tal kan hria em?. Aloe Vera te hi a khua khua in kan chin tir a, Pu Speaker, i dinglam ami te tih vek a ni a, an sorkar lain, a khua khuaa hlawhchham hi ka hria a ni.

A hmun ngeiah pawh kan tlawh, hetiang mai mai hi kan insawisak dan a ni a, a lungchhiatthlak ka ti tak tak a ni. Sawhthingte chu sawi thu a awm tawh lo, Tung-te pawh sawi thu a awm tawh lo, Pangbal-te pawh kan chhiatpui vek, chutiang chu a ni a. Tunah ngei pawh a market arawn tha a, Serchip ah khian Pu Rualza-a a awm a, a hming han sawi mai ila, Tung hi a duh khawp lei tur a hmu lo va, a mimalin company a zuk thlunzawm a, to deuhin a hralh thei a. Mimal Pu Rualzaan Tung a hralhna rate ang khan kan sorkar hian a hralh ve thei chuang reng reng lo, a leitu company ngai tho a ni si, kan mipuite hi kan hmangaih lo a ni. Mimalin rate tha zawk an hmuh lai pawhin, sorkar chuan inbiak remna leh eng emaw avangin a rate tha hi an hai der a, mipui an bum a, hetiang hian kan kal rei lutuk tawh. Hetiang tih

ching officer-te hi chu nawp sawk mai hi ka duh mai! Tun angah phehi hi chuan Tung hi uar tlak a ni leh lawi tawh a, a market a tha leh tawh a ni. Chu chu Lemon grass kan sawi zauna ni se. Thil reng reng kan chin tur hi a chin tlak em tih hi kan ngaihtuah a ngai hlein ka hria a ni. (Pu LALRINTLUANGA SAILO : Pu Speaker, Red Oil Palm kha kan chhiat pui lo viauin ka hria keini bial-ah chuan, a chinna a awih deuh kha a ni mai a. Tunah khuan an harvest mek a, an hlawk viau asin, an hawi zau lo deuh a ni lo maw ka ti a ni) Ani rawn chhan tur a nih ka ring lo va. Hei hi Assembly Committee-in nasa takin kan khel, a plantation zawng zawng, a family zat engkim kan nei document pawh. Tunah hian Lawngtlai leh Phairuankgai-ah sawn khawl hi dah hram turin i nawr teh ang kan ti chauh a ni. A hlawhtlin hram chuan sawlai chhehvel tlemte saw kan chhanchhuak mahna kan ti chauh. A chhan chu lawh atanga darkar reiloteah a factory a thlen a ngai a, a tihngaihna a awm lo, hmun danga lo ching ve ho tan hian beisei tur a awm lo tih i thudik a ni.

Pu Speaker, Ministry of Agriculture and Farmers' Welfare hnuaiiah hian Nationalised Livestock Mission Scheme hi a awm a, 2015-16 a central-in a rawn tihchhuah tawh a ni a, vawiin thleng hian kan la hmang tangkai ve lo niin a lang a. Hemi hnuaiiah hian ranvultute'n hamthatna tam tak an neihna tur hi a awm a, hei hi kan sorkar hian lo ngaihven ve sela, kan ngaihven tlai tawh mang e aw, state dangten an that pui hle si a tih hi thahnemngaihna thilah ka sawi lang duh a. Amaherawhchu, ranvulh lam a nih avang hian Agriculture hnuaiia kal zel tur nge ni ang Animal Husbandry lam khawih tur tih erawh chu, tukin lama kan thu ang deuh khan la rel fel ni ta sela.

Vety-ah hian District Vety Hospital hi NABARD hnuaiiah neih ve kan duh tawh a ni, Serchhip District hian. District dang zawng zawngin an nei fai deuh vek tawh a. Tunah hian RAHC hi 6 kan district chhungah kan nei a. Amaherawhchu, hospital kan la nei ve lo a ni. DVO te kan nei vek a, hospital erawh chu kan la nei lo va, hei hi ka han sawi hram duh a.

A tawp nan chuan, thingtlang lo neitute hi i ngaihsak ve ang u tih hi ka sawi duh a ni. Thingtlang lo neitute hian eng department mah enkawltu an nei lo tunah hian, an tan sum pawh dah a ni ve lo. Tihtawp tumin kan nawr

ngar ngar a, kan enkawl tawh lo. An buh thar chhuah erawh chu kan buh thar zatah hian chhiar kan chak leh viau lawi si a. Chuvangin, tihtawp tumna hi chu a kal zel ang, kan tihtawp theih hma hi chuan mi tam zawk eizawna leh inngahna a la nih avang hian an feh kawng a ni emaw, eng eng emaw tihsak theih tur tam tak a awmin ka ring a. Heti lutuka kan thingtlang lo neitute kan hlamchhiah hi tha lo ka ti a, hei ai hian i ngaihsak deuh ang u tih kha a hmawr bawh nan ka rawn hmang a ni. Ka lawm e.

S P E A K E R : Tunge sawi ti leh dawn? Minister kan sawm tawh mai dawn em ni? A nih leh aw.

Tunah chuan Minister zahawm tak Pu C. Lalrinsanga kan sawihona te wind up turin kan sawm ang a. Tin, sawifiah ngai a tih angte pawh rawn sawifiah sela. A demand te House-ah pass rawn dil bawh se, i lo sawm ang.

PU C. LALRINSANGA, MINISTER : Pu Speaker, ka lawm e. A hmasain a subject-a ka luh hma hian thuhma han hawn ve lawk ka duh a. Kan hriat angin Upa Lalrinchhana, Ex-Minister kum tam tak ram tana rammu-a, helai rorelna ah pawh ro kan lo rel pui leh min ho thin tu/min uap thin tu in van kohna min chhan san a. Vawiinah amah vui thei lo va ka awm hi hrehawm ka ti hle a. He hun tawite hi amah sunna leh amah thlah nan han hman ve hi ka tih makmawh niin ka hria a. I phalna in ka han tiri hmasa ve zawk a ni e. Ka lawm e.

Vawiina ka demand thahnemngai taka min sawipuitute in zavaiin 22 lai in ni a, a lawmawm hle mai a. Kan thu han sawi tlangpuih khan duhsakna leh thahnemngaihna, hmasawn duhna thinlung a ni tlangpui vek a. In han sawiho te pawh hi a theih ang chin chin kan lo chhinchhiah a. Amaherawhchu, a mimal anga han react vek sen kha a ni lo deuh dawnin ka hria a. Chuvang chuan, a thu common awm deuh tlangpui kha ka han la chhuak a. Chu chu a theih ang angin sawifiah tum ta ila. Hetiang nikhua hian wind-up naa mahni department lam han sawi chiam hi a nawm chu a nuam duh fu mai a. Amaherawhchu, member zahawm tak tak ten kan harsatna te leh kan bial mamawh kan han sawi ang te te te, kan han inngaih pawimawh sak a, kan han in react sak hi kan tih makmawh ni ah kan ngai a.

Pakhatnaah chuan RCS chungchang-ah member zahawm tak thenkhat khan kan ti mai ang e, sawitu kha in awm nual mai si a. RCS chungchang thu kha inrawn sawi a, kei pawh department kum 17 liam taa lo chang tawhtu kha ka ni a. Helai hi a veiawm ang reng khawp mai a. A lehlamah chuan IAS cadre post a lo nih ve baw si avang hian kan dah tur a te hi tui tehchiam lemlo, inhremna ang dawn dawna ngai te pawh pawh hi a awm thin ta hian ka hria a, hei hi a paw hlein ka hria. A chhan chu cooperative movement leh cooperative concept anga kan ram, ram developed countries reng reng hi he cooperative concept-a kal tur a nih mek laiin, he department pawimawh bera sum awm leh awm loh lam a ni lo. Cooperative concept-in hnam leh ram a kalpui dan ang kengtu an nihna zawn atanga a department kan han dah dan hi a fuhlo hle hian ka hria a. Chutih rual chuan, a chang chuan a cadre post te pawh hi han thiah a, a department kal chho-a te hian luah chho mai sela a tha mai lawm maw ni le ka ti thin a. Amaherawhchu, kha kha a ni ngawt bik lo va, central sorkar khuan a dah pawimawh em em mai a cooperation department hi. Chuvanga RCS dinhmun pawh kha khatianga kan duh ang zawng zawng han dah ngawt theih kha a ni lem lo a.

A dawt lelah chuan budget hniam tih chungchang kha min han hrilh nual hlawm a. Amaherawhchu, helaia kan demand-a kan budget a tlem leh tamah hian ka buai lem lo a, a Minister nihna angin. A chhan chu kan House Leader-hi intodelh ngaipawimawh ngawih ngawih a nih avangin a thingkhawnpui pawh hi a vai hian kan lamah hianrawn keuh dawn se, a ui lo ang tih tura mawiin, he development, ei leh bara intodelhnaah hi chuan a vei ber a ni tawp mai a. Kei hi ka fello ang reng khawp mai a, tum khat chu ama min koh mah zawk hian kan han kal a, ka department-te nen; chumi tum pawh chuan a insah hawng zau hle a ni. Chuvangin, hemi chungchang ah hian, lemlamah chuan a number tet leh len lam kha chu han en mai kha chuan a dik reng a. Mahse a changtu Minister ka nihna angin chuti takin ka ngai serious lem lo a ni. Tin, chutih rual chuan Agriculture-ah hian CSS kan neih central project RKVY te, NFSM te, PMKSY te hi nakinah lo la kal tur a awm a. Chu chu Supplementary Demand-a la reflect tur, la dahluh chhawm tur te pawh kha a la awm a. Khang ang te kha han lang phei sela chu phut dawtna tur chu a ni ve thei tho a ni. Chuvang chuan, helaiah hian chuti takin a budget hi a hniam lamah hian kan lunghnur lem lo ve, a lunghnur awm lem lo ve tih ka han sawilang ve hrim hrim duh a ni.

Tin, a dawt lehah chuan tuikawng (channel) chhia tih chungchang hi a buaithlak khawp mai a. Irrigation Department hian funding kan hmuh theihna awmchhun chu NABARD leh PMKSY-ah hian a ni mai a. Tunhma khan AIBP kan nei a, mahse, PMKSY nen hian an khungkhawm a, a bak funding source dang hi kan nei mang lo va. Tunhnaiah khan NEC lam atang khuan hmuh theih kan nei dawn nge dawn lo tihvel engemaw chu a awm a. Tin, chubakah chuan DM&R lam atangte pawh khan a awm nge ni, a repair-na ang chi tur hi chu beisei tur chu kan nei turah kan ngai a.

A lehlamah chuan buaithlak deuh chu tui kawng kan neih ho reng reng 'channel' kan tih hi tih fuh loh kan nei a. Link road la awm hma si khan, a hmunhma kha, head load-a thlen ngai angah tui kawng kan han siam ta thin a. Tahchuan, head load-a tih vek reng peih chi a lo ni lem lo va, a bul hnaia lui kama balu tlema a me deuh lo awm chu an rut hlawih hlawih a, an hmang mai zel a, khatiang kha chuan hna a tha tak tak thei lo a ni. Chuvangin, tuna ka ngaihtuahnaa awm chu precast anga tih theih dan hi awm se a tha ang em, 1 mt leka thui ni ta sela, kha kha zawm khawm maiin tihte ngaihtuahnaah a awm a. Japanese pa lengah ka sawm a, khatiang zawng khan tlema zangkhai deuh siin tih dan a awm em, a channel pawh hi tih te ngaihtuahnaah a awm a. Engpawhnise, he lai hi sum siam nan ngawr ngawr, Opposition Group Leader Pu Duha sawi ang deuh khan, a sum hmuhna ngau ngau ringawt zawnga kan thlir hi a fuh lovin ka hre tawh a. Tunah pheih chuan strict deuhva kalpui tul ka ti a. A chhan chu, kan intodelh loh chuan kan hnam hi a ngaihtuahawm a ni tih kha tawitein ka han sawi ang a. Chuvangin, kan hna pawh a tha tur a ni.

Chutiang chuan tui kawng chhia repair ngai kan neih hi a tam mai a, a workmanship a that loh vangin. Chu chu tun atang hian identify a, a theih ang anga a repair-na tur atan a remchang a nih chuan sum thingkhawn lamte pawh kha kan melh ve mai dawn nge ni tihte ka ngaihtuahnaah chuan a awm a, mipui mamawh leh kan tharchhuah tur kha ngaihpawimawh a nih bawk si avangin tih kha ka han sawi nise.

Tin, kan han lai a, link road hi kan ngah viau mai a, link road chi hrang hrang kan nei nual mai a. Amaherawhchu tunhmaa PMGSY a lo kal a, kan han lai pawp mai a, pavement awm zui si lovin kawng a tihchhiat ang deuh tho khan, tuna kan

link road pawh hi rigid pavement a awm bawk si lo va, side drain a awm bawk si lo va, khatianga thil kal kha a fuh lo em emin ka hria a. Tunhnu-ah hi chuan link road kan siam a nih pawhin, tlema tlo deuh tur ang ruahmanna awmin, kan laih thui loh pawhin thui lo mai sela. Khati zawng deuha ngaihtuahna kan nei a nih loh chuan pamhmai deuha 'link road' kan siam hi a tam mai a, chu chu a fuh lo hle a ni tih kha link road chungchanga ka chhanna ni se.

Tin, department hrang hrangah thawktu indaihloh a na em em vek a. Hei hi chu department tin hri a ni vek mai a ni. Chutih rual chuan Agriculture lamah MAS mi 10 bawr vel hi tunah MPSC lamah lak turin a kal mek a, exam te pawh an han nei a. Keini ah pawh hian buaithlak deuh chu 10 kan lak tura intham mek lai khan a dang 10 an lo pension hman leh si a. Ngai awh leh

tur khan a dang 10 pawh la leh ta ila, kan mamawhna phuhru tur chuan a dang 20 tihbelh a nih loh chuan tih ang vel kha tuna kan dinhmun chu a ni ve tho mai a.

Engpawh ni sela, member zahawm tak Pu K.T. Rokhaw khan a bial chhung indaihlohna lai kha a rawn sawi nasa viau mai a. Heng pawh hi kan Organization Chart keuvin, chumi atanga kan mamawh dan pawh en hona department lam nen pawh kan nei tawh tho nachungin, uluk leh zuala kan inen chhoh chu a tul a. Amaherawhchu, kan sawi mek laiin district thar piang turte a lo awm bawk nen. Kan department pawh hi district thar nena inkamki chho turin ruahmanna lo nei teh u kan inti a. A nihna takah chuan Irrigation Department pawh division 8 neihna turah division 4 kan la chhawng thei ngawr ngawr chauh a. Chumi bak, kan theih loh piah lama district thar nena han kaikawp tur chuan a buaithlak lai pawh kha a awm a. Amaherawhchu, district thar lo piang tur hi kan lawm ve bawk si a. Chuvangin, district thar tan pawh khan kan kaihkep a, khatiang khan thawktu indaihlo a ni chungin, ruahmanna kan neih dante ka rawn sawi a ni.

Tin, cooperative movement hmanga kan thlai thar inhlanchhawn, hralhna ang atan channelize-na ang atan ti zawnga rawtna rawn awm kha, MAHFED hi lengah ka sawm tawh a. Entirnan, Aizawl hmar lam atanga thlai lo kal zawng zawng te, chhim lam atanga lo kal te, khawthlang leh khawchhak lam atanga lo kal zawng zawng kha MAHFED (Mizoram Agriculture & Horticulture Federation) ten lo lei sak a, middlemen ten lo bargain vak vak zawng ni lo va, anmahni farmers ten an phal ang tawh lo lei saka, khatiang zawnga tih theih dan a awm a nih chuan kawng

dap ang u tiin tunah hian ruahmanna kan nei a. Chumi kal zel turah pawh chuan kan House Leader zahawm tak, kan CM zahawm tak hi la biak rawn a, engtin nge ni helaia mumal deuh zawk a, hemi kawng bak hrui khata kan inzarpharh leh hetiang kawng lo deuh zawng hian tih dan a awm em tih te hi ngaihtuahnaah chuan a awm lian em em mai a. Chungte pawh chu helai a local bik angah chuan ngaihtuahna a awm a. Tin, chumi rual chuan Agriculture hnuaiia ATMA te pawh hi state dangte nena inthlungkhawm vek an ni a. Chungho nen chuan ATMA te pawh hi society ang deuh hleka awm a, society te nena in link a, khatiang khan kan state-in kan neih district dangte nena in pek kual tawn dan a awm thei ang zawng te pawhin ngaihtuah ta se a tha mang e. Chumi a nih loh chuan Silchar lama kan phurh thlak reng reng, an mit an lenin check an duh zel mai lai te kha a awm a, khatiang zawnga kalpui dan te pawh kha kawng awm thei tur te pawh rilruah chuan a awm lian hle a ni.

Tin, Serchhip Irrigation Division-a hlankai tih chungchang kha Pu Duha khan a rawn sawiin ka hria a. Nichina kan sawi tak ang khan Division-a hlankaia mawi a nihna chin pawh a awm a. Helaiah hian document pawh ka nei ran mai a. DP & AR-ah te, Finance-ah te pawh moved a ni a. Amaherawhchu, Finance Department-in min remtih pui rihlo a, kum 2013 daih tawh ami kha a ni a. Khami hnu khan kan han ti kal leh a, division a hlankai awm tak pawh a ni. A chhan chu District Headquarter rau rauah pawh a lian pawl anih bakah, Pu Duha'n a rawn sawi, a bial chhung Chamdur leh Mat phai khi kan kaltlang tam a, kan pelh vuai aiin a zau a ni, a chhung area khi a lian khawp mai. Damtea kan awm a nih chuan tuntumah buh thar tam kan tum ropui mai si a. Remchang a awm theih a nih chuan khilai pawh la kal thei turah inngai ta ila a thain ka ring a.

Chulo lelah chuan Bilkhawthlir bialtu zahawm tak ka hmingpui, Pu Rinsanga hian vawi duai lo a bial Bilkhawthlir-ah khuan SDO dah a duh thu a sawi reng a, indaihlohna avangin kan dah mai thei lo va. Amaherawhchu tunhnai khan Assembly Stared Question-ah a rawn dah chhuak a. Tun thla chhunga dah tura ruahmanna kan neih angin kan process a, mahse process lutuk pawh ngai lovin stop gap arrangement ruahmanna neih ni mai se kan ti a. Tunah hian Kolasib atangin Bilkhawthlir-ah tiang khan ruahmanna kan nei a ni tih kha ama mimal pawh ka hrihna ni nghal se a thain ka ring. Tin, chulo lelah chuan Oil Palm hi han sawi ve hrim hrim tulin ka hria a. Lehlamah chuan Oil Palm hi a buaithlak ang reng khawp mai a, tun tumah pawh khan transport subsidy atan khan Godrej Company khan kan

CM leh kei ngei pawh min rawn hmu a. A subsidy atan farmers lamah hian a component kha cheng khat, anmahni Godrej Company-ah khan cheng khat, khatiang zawng khan pek tura ruahmanna chu kan nei tawh a. Amaherawhchu, kan ti tam thei bik lo va. Anmahni pawhin, “A ni tak e, an ti chung pawha kan lungawi tho e,” an tih avangin kan pe ta angah ka ngai a. Nuai 53 kan pe a ni. Chutiang chuan tunhnaiah khan sanction a chhuak tawhin ka ring a, chu chu ka han tarlang duh a. Engpawh ni se, Pu Speaker, hun ka hmang rei viau tawh em aw? Tawite han tih pawh hian a rei hma a, member-te ka react-na chu ka duhtawk mai ang a.

Ka sawi ang khan kum 18 hnuah ka department chan thinah kan lutkhawm leh a ni a. Mawhphurhna ka chan leh hnu hian rin aiin department te a lo danglam tawh hle mai a. Irrigation te nen pawh an lo awm ho tawh lo va, bifurcate an lo ni a. Tin, chu bakah chuan Crop Husbandry pawh kha Directorate hranin Research & Extension-in a lo kal chho ve leh tawh bawk a. Amaherawhchu, Crop Husbandry-te hi theihtawp chhuahin tan an la a, Land Development te, Land Management, kawng hrang hranga crop hlawhtlinna a lo chan theihna turin mechanisation ang zawng pawhin hma an lakna land development ang chi te, khatiang hawi zawnga ke an pen mek lai khan, a leh lamah erawh chuan R&E lam erawh chuan KVK te, ADMA-te nen hnunhnang takin thawhhona tha tak nen, post harvest management thleng pawha Crop Husbandry tena an thar chhuah, post harvest management ang hawi zawng pawh khan ke an lo pen thui hle tawh mai a lo ni a.

Chutiang chuan thawhhona tha tak nen, tun tumah pawh hian kan kal a, nichina kan ngaihtlak ang khan Fall Army Worm-in kan ram a rawn run a. Foreign insect ka ti mai a, April ni 8 bawr vel khan Lunglei lamah a lo puang chhuak a. Khami rual khan hmun dangah pawh hian a rawn awm a ni tih kan hriat ka duh a, a chhan chu a kar a zim a, ni hnih khat lek chhung khan helaiah a rawn lang ve mai tho a, sawlai nen khan a inang reng tho chuan ka hria. Chutiang chuan kan Directorate pahnih Crop Husbandry leh Research & Extension lamte pawh theihtawp chhuahin an theihna zawng zawng nen tan an la a. Thawhhona tha tak nen khatiang khan hma kan la a.

Tin, chumi rual chuan Pu Speaker, keimahni mai ni lovin kaichhanah Central YMA te sawmin, Fall Army Worm-in kan ram, kan kut hnathawktute a rawn beihnaah hian, ‘hawh u, i ti ho teh ang u khai, keini kut ringawt zawngin a seng lo

chin a awm e,' kan ti a. Tah chuan Central YMA ten theihtawp chhuahin Sub-Headquarter level-ah, Group level-ah, Branch hrang hrangah, puihna hrang hrang nen theihtawpin hnam angin kan thawk ho a. A lawmawm tak zet zet a, he House atang hian YMA-te hnenah pawh hian lawmthu ka sawina platform-ah min ngaihsak se ka duh a. An chungah hian sorkar angin, mimal angin, department angin kan lawm tak zet zet a. Hun lo kal zel turah pawh hnam issue-ah theihtawp chhuaha kan thawhho zel pawh kan beisei a ni tih ka han sawi a ni.

Chumi rual chuan Pu Speaker, thil pakhat he chhiat tawhna chhana kan thil tawn, kawng lehlamah chuan 'blessing in disguise' tih ang zawngte pawhin ka ngaihtuahnaah chuan a awm a. Hma kan han la a, Scientist-te kan han chah chhuak a, thiamna hrang hrang leh skill hrang hrang, scientific approach-a thirna zawn hrang hrang atangin kan han ti chho a. Tah chuan hlo tur hlauhawm hmang lo zawnga, biological control ang zawnga hmanna turte pawh kan han dap chhuak ta a, a lawmawm ka ti khawp mai a. Tunah hian Tricogramma an ti a, Tricogramma Pretiosum te, Zaponicum te, Chilonese kan han tihte kha an ni a. Chung ho chu hma hrang nei an ni a, entirnan, Tricogramma Pretiosum hian Fall Army Worm bik kha a bei bik dawn a, Tricogramma Zaponicum hian buh kung ei chhetu hi a beih bik tur a ni ta a, rannung vek an ni a, rannung tereuh te te an ni tih kha ka'n sawi ang a.

Tricogramma Chilonese, erawh chu Tomato te, Bean te, hnephnawl tlema hnah nem deuh lam pawh a ni ang e, chutiang crops hrang hrang venna tur ang kha Biological control kan nei a Mother culture pawh anmahni Scientist hoin minrawn pe a. Tin, tunah hian ka ngenna angin khulaiiah Scientist-te hnena zu zir turin kan Officer 4/5 chu an chhuk niawm tak a ni a. Chutiang chuan hemi bakah hian Pheromone Trap kan ti a, chu chu tunah pawh hian ka rawn dah chhuak a. Ka'n keng chhuak ve hrim hrim ang a, hei hi a pa manna a ni a, helaiah hian a damdawi dah tur a awm a, hei hi a nu rim a ni thung ta a ni. A nu rim kha helaiah hian an zuk dah ta a, kha kha 4km atangin a pa khan a rawn hre thei a, a rawn pan a tah hian, hemi sarang hi hetia kal thla vek hi a ni a, tahchuan man khawm tur a ni ta a. Hemi hi ka rawn sawi duh chhan chu tuna kan Fall Army Worm hian kum thum hi min la cham chilh tura ngaih a ni tlat a ni. Hmun hrang hrangah hei hi kan sem nual tawh a, a theih theihnaah hei hi kan kam pawh a tul a. A pa hi a tam thei ang ber kan thah loh chuan tuna Fall Army Worm hian kan kut hnathawtute hi min la bei zel dawn tih ka sawi duh a. Amaherawhchu a ralkhel zawngin ka sawi hauh lo va, kan inven a

tulna lai zawn kha ka sawi chhan chu a ni. Tin, thil danglam ve deuh mai chu scientist kha ka zawt a, hei hi a lure an ti a, rim a nei a, a pa rim rawn zawngtu khan kha a pawl tur kha a virgin leh virgin loh a rim atangin a rawn hre thei a ni. Chu chu kan scientist ho hnenah khan, 'A virgin rim siam rawh u,' te ka ti a, khang te te kha a interesting avangin ka han sawi duh ve hrim hrim a. Pu Speaker, i lawm ka ring deuh a ka han sawilang a nih chu.

Tichuan, a dawt lehah chuan Oposition Group Leader Pu Duhoma hian thahnemngai takin zawhna a rawn siam thin a. Tun tumah hian a rawn chhuak lo ah a tang tlat mai a, chuvangin, sawifiah kha a tul tlatin ka hria a, kan zavai atan pawh information pawimawh a nih avangin. Crop insurance chungchang hi vawiduwailo kan kalpui tawh a. Ministry hmasaah Agriculture ka chan tum pawh khan O.P.Singh nen vawi tam kan ngaihtuah a, corpus fund khulaia awm thei te pawh kha dap chhuah dan a awm thei em tih te kan ngaihtuah a. Amaherawhchu tun sorkar thar ti mai ang, BJP sorkar thar hian PMFBY an ti a, he insurance hi a claim theihna tur Insurance Company hi 18 empanel a ni a, sorkar laipuiin. Chung an empanel te hnenah chuan kut hnathawktu ten an claim na tur chu a ni ta a. Amaherawhchu, khami karah khan Mizoram sorkarin State Level Coordination Committee a nei ve leh a, chu chuan hnathawktu te cost of cultivation, an thil chin kha, crop insure tur bik SLCC te thuneihna tur kha a ni ta a. Tichuan, an thlan fel vek tawh hnu khan committee hran a awm leh a, State Level Technical Group an awm leh a. Heng ho hi banker ho an ni a. Heng ho hian an thlan, selected crops ho kha a rate lo fix tu turin anni hi an ni ve leh thung a. Tichuan, hemi claim theih hun hi chi hnihin keima hriatthiam zawngin then a ni a. Kharif season – kum bul atanga July ni 31, August atanga December ni 31 thleng kha kharif leh rabi tihna a nih chu. Amaherawhchu, a crops hi chu a inang ve ve thei a, mahse, a farmer ho premium pek dan tur hi chu a intlem hleih thung ta a ni. Kharif season-ah hian 2 percent farmers in premium-ah an dah ve a ngai dawn a. Tin, rabi-ah hian 1.5 percent an tum ve a ngai dawn bawk a. Amaherawhchu, nichina ka rawn sawi, cost of cultivation kha scale of finance ta a. Khami scale of finance behchhan khan entirman, state level of technical group committee khan acre 1 zelah crop pakhat tana farmers ho an insensona kha scale of finance angin mithiam banker ho khan, bank hnathawk ho leh state level technical group committee ho khan an ngaihtuah ta a. Tun tumah pawh hian tender te kan han chhuah a, thla hlui ni 28 pawh khan a hawnna te kan han nei a. Amaherawhchu,

SLCC-in an han zirchian khan kalpui ngamah an ngai lo a. Tin, a claim dan tur pawh hi a buaithlak ang reng khawp a, ka hrethiam hlei thei mang lo va. Ka sawi kim loh ka'n sawi belh leh ang a – farmers ho 2 percent kha an premium thawh ve tur a nih rual khan a bak zawng 80 percent a lo ni ta a, 80 percent kha central sorkar leh Mizoram sorkarin 50/50 in an insem ta a ni. Khatiang zawng khan helai hi kalpui a ni a. Leh lamah a lawmawmna lai chu hei hi a ni – farmers ho premium dah ve tur hi a tam lem lo tlat a ni, an afford thei mai in ka ring a. Mahse, a chhangtu tur, tun tumah pawh khan Bajaj Alliance Insurance Company Limited leh Universal Sompo General Insurance Company te khan an rawn chhang a. An chhanna kha a inanglo zeng zung leh a tender bid ang te pawh kha tifuh loh leh tihsual an nei nual mai a, churang chuan pawm theih a ni ta lo va.

Technical error awm hlek hlek avang leh an chhanna a san em avang khan tih ngam ni ah kan ngai lo va, SLCC khan, chutiang chuan tun tumah thlan a ni ta lo a ni. Kha kha a chiang em aw, ka sawifiah em ka hrelo le. Engpawh ni se, helaiah hian mithiamte a hranpaa lo kala, a claim dan zawng zawng nen la zir turin farmer te nen khulaiah kan inchah chho dawn a, chung hunah chuan tih tak zeta kan zir pawh hi a tul dawnin a lang.

PU LALDUHOMA : Pu Speaker, Insurance chungchang kha chu a buaithlak khawp mai a, ka hrethiam khawp mai a, Fall Army Worm chungchangah khan kan University-in Innovation Exhibition an neih tum khan, Haulawng tlangval khan enge a farm hming ka hre ta lova, fertilizer lam kha a rawn show ve a, kha pawh kha Fall Army Worm-ah khan an experiment ve deuh khan ka hria a. Kha kha a laktlak vak loh em ni? Tin, a fertilizer lam te pawh kha a lo laktlak chuan kan rama hetiang entrepreneurship lama rawn kal ho hi, vai company ai chuan han promote dan te hi a awm lo maw?

PU C. LALRINSANGA, MINISTER : A dik khawp mai, kei pawhin a chanchin ka lo hria a; tin, ka bial hlui te an ni a, a duh pawh ka duhsak khawp mai a. Chuvangin kan official ho pawh, 'Lo va kal teh u, a thiam dan hi eng chen nge ni lo va zir teh u,' ka ti a. Tin, biological control kan tih bakah, organic pesticide kan ti ve mai dawn nge ni? Khatiang thiamna neia, fall army worm thahna atan pawh ama solution kha a tha e an ti ve tlat mai a, Pu Duha sawi ang khan. Chu chu, 'A tak a nih

leh nih loh te pawh lo va chian teh u,' kan inti a. Kan hotute an va kal a, an va chian tak dan erawh chu ka hre chiah lo va, engpawh ni se kan lo enzui zel turah ngai ila.

Thil dangah ka'n pakai ang a, tun tumah hian kan department-in kan ngaih pawimawh em em leh kan thupui ber chu buha intodelh hi a ni tawp mai a, thil dang pawh a tel tho e. A chhan leh avang chu kan hria a, Supply Department-in vaibelchhe 23 thla tina senso a ngai a. Chumi rual chuan 10 crore vel kha subsidy-a kal a lo ni ve leh zel bawh a. Tin, hei mai hi a ni lo va, carrying bill hi a tam em em mai a ni, Supply Department-in ka lo lak lai khan a buh man ai hian carrying bill-ah hian a kal tam elo maw tih tur a ni. Chuvangin heng hi theihtawp chhuaha kan sum, kan consolidated fund kan neih ang hi saving kan neih a ngai a ni, chumi a nih loha tun anga kan kal zel a nih chuan tih hi kan thupui a ni a. Tunah pawh hian ka ti thin a, kan choka luahlumtu hi kan thar loh a ni tur a ni lo tih a ni tawp mai a ni. Kan choka hi kan thar hian luahlum ve tawh rawh se, mikhual hi chhuak ve tawh rawh se. Chumi slogan chuan kan ram mipuite hi inzirtir ang u tih hi he House-ah pawh hian ka sawi duh a ni. Chuvangin kan tharchhuah hian a la ban phak thui lo na a, kan han tang ang a, kan choka a luahlum theih hun chu a awm chho phauh phauh mai in ka ring a. Tunah pawh hian focus atang hian dal-a kan intodelh theihna turin quintal eng emaw zat district 4/5-ah hian kan ching mek a ni. Arahar dal kan ching a, chubakah chuan hectare 60 chuangah perilla kan ti mai a, omega 3 fatty acid kengtu chhawhchhi hriak kha tunah hian Lunglei leh Aizawl lamah kan han chin tir a. Kan ching pung zel ang a, heng hriakah ringawt pawh hian kan intodelh a ngai kan ti a ni.

2001 khan Economics & Statistics Department kha thahnem ngaih thilah kan tel ei leh thil dang dang kha survey turin ka request a. Khalai hun kum 15/16 chuang kal tawha kan data neihah khan thla khata kan eiral hi cheng 80 lakh atanga 100 lakh inkar bawr vel a ni tlat mai a ni. Chuvangin tun dinhmunah chuan crore 1.5 atanga 2 crore deuh thaw hi chu Aizawl city area pawhin kan ei zo mai ang em tih te ka ngaihtuahnaah chuan a awm a. Chumi a nih chuan kha tel kan siam ni lo, kan tharchhuah ni lo, phai atanga kan lakluh man atana kan sum luangchhuak thin dang tur hian kan thalai rual te hian entrepreneurship laipuiin kah tum ta se, eizawna tham a tling hian ka hria a ni. Tin, a ram pum pui huap thlir pawhin a lo berah kan tel ei ah hian 3 crore chuang hi chu a kal hrim hrim turah ka ngai. A lehlamah chuan tuna kan tel ei hi contaminated, tel ei tlak loh hi a tam em em mai a ni. Carcinogenic

an ti a, a tler kan han tih hi Rancidity anga rei deuh a awm chuan carcinogenic a in develop thei a, chu chu cancer siamtu a ni tlat. Chuvang chuan kan tel ei pawh hi kan fimkhur a ngai a nih si chuan kan thalai te kan thanharh a ngai a ni tih lai kha ka sawi duh baw k a.

Tichuan, nimirah khan Minister zahawm tak Pu Rintea khan a sawi tawh a. Khulai Zophai-ah khan power tiller kha kan han pe a, amaherawhchu, power tiller mai lo deuh te pawh kan pek a tul dawn em ni aw ka ti a. A chhan chu khulai khu kan border te a lo ni a, kan ramri dep te a lo ni a, harsatna an tawhna hmun te a lo ni thin a. Hmanni Bairabi-a kan zuk kal khan, ‘ram hmangaih kawr te a suit in lo lei ta ula, Kolkata atangin AK47 plastic-a siamrawn hawn dan te ngaihtuah ta ila, tikhan in tractor ah te khai ta ula an hlau phian lo maw,’ te kan inti a, kan infiam bawrh bawrh a. Kan Home Minister hnenah pawh kan sawi a, tuna kan police ho hnenah pawh, chutiang chuan anmahni thlamuan a, thlabar lutuk lo va lei let thei turah ngai ta ila thain ka hria a.

Tin, ka sawi leh duh chu, kan House Leader, kan Chief Minister zahawm tak thahnemngaihna in leitha, nichinah khan member thenkhat te khan ‘leithaah hian fertilizer lo deuh te pawh hmang ila a tha lo maw, organic lama ke kan pen tam hi a tha lo maw’ an tih kha a dik reng mai a. Kan House Leader zahawm tak hian kan committee naah ‘bio-fertilizer hi ruahman dan i ngaihtuah ang’ a ti a. Research and Extension lam Directorate hian (nizana kan in ko a) thui deuh ke an lo pen tawh a. Amaherawhchu, khami ang laboratory anga han ti tur khan helama bio-fertilizer lo ti tawh te nen khan inthlunzawmna neia thil tih ngai a nih avangin chuti maia tih zung zung theih kha a ni lo va. Chung te kan ti chho thei a nih chuan, entiran anmahnin min hrilhfiah danah chuan ‘khami bio-fertilizer tui kha buh phun turah khan vawikhat han chiah ta ila, chumi hnuah han phun ta ila a thatpui mai,’ an ti a. Amaherawhchu, kan awih lo deuh a, ‘a dang tihbelh leh te a ngai lo maw’ kan ti a. Khati khan a tha thei mai’ an tih avang khan tha chho mai turah kan ngai a. Khang kha tunah hian kan C.M. thahnemngaihna in kan tharchhuah punna turah pawh hian kalpui dan min zawnpuina a ni tih te kha ka sawi duh a.

Agriculture lam pawh hi sawi dawn chuan a tam mai a. Tuna kan chhiat tawhah hian ka report leh duh lawk chu, nichin khan YMA te kan han sawi rual khan, khalai hun kan hun tawntirh khan kan Pastor pakhatin min rawn phone a, 'tawngtai rualna neih rawt a tha lo maw?' a rawn ti a, 'E, lo rawt tak teh u, keini lam chu tihian kan lo ti ve mek tho va, in theih theihnaah tawngtai rualna nei turin rawtna lo nei rawh u,' tiin kohhran hrang hrang pawh hian min rawn phone hlawm a, tawngtaina an neih thu te min hrilh hlawm a. Khang kawngah pawh khan kohhran te, Pathian mi kan nihna leh kohhran mi kan nihna anga kan tawngtaina leh kan zavaia thawhhona Pathianin mal a sawm a ni tih lai kha sawi hmaih chi niin ka hre lova, ka rawn sawi lang leh hnahnawh a nih chu.

Chuloah chuan Pu Speaker, sawi tur a tam khawp mai a, Irrigation lamah te pawh hian kan hmalakna, focus pawh a awm nual mai a. Amaherawhchu, nimin kha a rei lutuk kan ti nge ka hre lo va, tlema tawi deuha tih hram kha ka duh deuh a. Engpawh ni se, Co-operation ah hian kan hotuten Co-operation in rawn sawi nual mai a. A department lam pawhin 'han sawi teh u' an tih ve chin pawh a awm fo a nia. Engpawh ni se, society movement leh society concept hi kan zirchian a tul khawp mai a. Ka ti thin a, register loh society-a society hlawhtling ber chu Kohhran ka ti thin. Kohhran hi a in register lo naa Kohhran hian biak in lian pui pui an neih theih nachhan chu an thil neih ui lovin an thawhkhawm a, kan thawhkhawm a, chu chuan Biak in lianpui kan sa thei ta a ni. Chu chu Co-operative concept-in a tum a nihna lai hmu thiam lo va tuna kan kalpui dan hi chu a fuh lo a ni ka ti thin a. Leithumah khian chhungkaw 22 sangha dil nei an awm a, chumi te chuan Aizawl atangin ₹ 6000/- in motor hire an duh a, sangha chi lakna turin. Pawisa an nei si lo va, mimal anga hire thei an ni lova. Tichuan ₹300 theuh an thawhkhawm a ₹6,600/- a lo tling khawm a, ₹600/- kha an pawl sumah an dah a, ₹6000/- in motor an hire a, an duh khawp sangha chi an la lei leh thei a. Chumi awmzia chu ₹6000/- kha ₹300/- in an lei tihna a ni. Chumi an lei theihna thuruk concept chu a ni Cooperative concept chu. Chu tak chu a department lam hian kan inzirtir tawk thiam lo em ni kan ti leh lawng thin a, thahnemngaih thilah.

Tichuan, MCAB hi kan sorkar hunlai khan Banking Regularisation Act, 1949 section 11-a booked a ni a. Bank thi mai thei dinhmuna ding a ni a, mahse, vawiina kan House Leader zahawm tak te leh Minister kan nihna anga theihtawp chhuaha kan tih na, recovery drive te kan ti a, sorkar hnathawk rul duh si lo kha Pu Vanhela hovin kan rulh tir a, kan puin share a rawn dah belh a. Khatiang atang khan a rawn thang chho va, vawiinah chuan an profit turn-over chu 9 crore a lo ni ta daih mai a ni.

Amaherawhchu, a tira tui leihtute kha kan rawn thu leh ta chu a ni a, a hlwlhtlinga te hlwlhtlinna kha a lawmawm em em a ni. Ka sawi duh Co-operative Apex Bank kha society ta an nih rualin, Primary CoopSociety ten an tha chakna tur a nih hre lovin an puk sak a, rulh leh an tum si lo va. Chuvangin Apex Bank kha non performing asset neiin, bank chhia a lo nih chhan pawh kha a ni. Chuvangin society level atang pawh hian kan zir chhoh a ngaiin ka hria a ni. Tin, tun hnaiah PACS kan tih hi kan hmelhriat a, a lawmawm ka ti hle mai a. Member zahawmtak Pu Lalduhoma pawh hian Assembly Question-ah a rawn zawt a, mahse PACS credit tih laia kha Cooperative angin a rawn ziak a, a tirah chuan kan buai deuh va. PACS hi hmun hrang hrangah kan nei a, Luangmual ami khu a lawmawm dangdai em em mai a, ka han sawi lang kher duh a. Kum tir lam khan ₹10,000/- chauhvin kan hawng a, tunah hian ₹50,00,000/- a vir chho tawh a ni. A luh tam ai maha ka lawmna chu naupang kum 14 vel ten sweet leina tura nu leh pa ten an pek kha, sweet lei ai chuan PACS Bank-ah dah pun a tha ang an ti a, an kal vang vang a, an zu dah ta tha thin a ni. An pawisa cheng hnih nawi pawh an dah a, naupang te te an nih laia inrenchemna inzirtirna awm chho thei tur ang kha a lawmawm hlein ka hria a ni. Tichuan, 'function siam ula, ka rawn kal ang a, naupang ho chu ka rawn fuih dawn,' ka ti a. Hmanni khan ka zuk kal tawh a, naupang khan an account-ah engemaw zah an nei tawh a ni.

Tin, MUCO hi Reserve Bank of India khan liquidate tura an rawn tih tawh kha a ni a, mahse MUCO Bank chu tunah chuan Bank nung tha pangngai tak, hmun dang pawha luangchhuak thei dinhmuna ding a lo ni leh ta a ni.

Tin, MULCO, MAFED, PIGFED te, PIGFED bikah hian tlem sawi ka duh a. Kan sorkar hmasak khan thil tih tum kan tih hman tak lova chu, tun tum hian tih hram theih se chu kan duh khawp a. Aizawl hmun hrang hrangah hian deep freezer lian chi emaw dah a, chungah chuan Cooperative Society hmun hrang hrang, khaw chhung leh pawna vawk vulh te vawk kan lei sak ang a. Tichuan kan talh ang a, kawngtlang dungah (Town area-ah) an talh sa kha dahna awm sela. Duh ang ang sa lei theihna kha awm se tih ruahmanna kan siam a. Kan hun hmasa khan DONER atang khan nuai 50 vel chu min pe thei turah kan ngai a, mahse a tlawlh leh ta a.

Engpawh ni se Pu Speaker, wawiinah member zahawm tak tak ten thahnemngaitaka in lo sawi te kan lo chhinchhiah a, kan ban phak theih chin tur chu ka hre miah lo va. Amaherawhchu, dingdihlip pawhin kan han ban tang tang ang a, kan harsatna, mamawh kan neihte tihlawhtling turin theihtawp kan chhuah dawn a ni tih he House kaltlang hian ka sawi duh a. Tichuan, Pu Speaker, ka Demand no. 31-na, Agriculture - ₹ 1,73,68,03,000.00. Tin, Demand no. 37-na, Cooperation - ₹17,09,18,000.00 leh Demand no. 47-na, Irrigation & Water Resources – ₹ 39,68,22,000.00 hi he House zahawm tak hian min pass pui turin ka rawn dil e. Ka lawm e.

SPEAKER : Aw le, tunah chuan Minister zahawm tak Pu C. Lalrinsanga a Demand no. 31, 37 leh 47, a vaiin ₹ 2,30,45,43,000.00 te House-ah pass a rawn dil a. Remti apiangin ‘Remti’ ti ula. (MEMBERS : Remti) Remti lo kan awm em? Kan awm chuan ‘Remti lo’ ti rawh ule. Kan awm lo a.

Tunah chuan kum 2019 – 2020 chhunga hman turin Minister Pu C. Lalrinsanga Demand no. 31, 37 leh 47, a vaia hman tur ₹ 2,30,45,43,000.00 te chu House-in lungual takin a pass ta a ni.

PU C. LALRINSANGA, MINISTER : Pu Speaker, ka lawm e.

SPEAKER : Tunah chuan Minister zahawm tak Dr. K. Beichhua kan sawihona te rawn wind-up sela, tin, sawifiah ngai a tihte han sawifiah bawk sela, kan sawm e.

Dr. K. BEICHHUA, MINISTER : Pu Speaker, ka lawm e. Wawiinah ka Demand no. 7, 29, 34 leh 41-te member zahawm tak takten he House-ah

thahnemngai takin an sawi ho a. An sawihona eng atang khan sawiselna leh eng emaw thil duhawm lo a awmin ka hre lo va. Infuihna te, thurawn tha tak takte min pein ka hria a. A hmasain member zahawm takte chungah lawmthu ka sawi a ni. Essay type-in ka sawi lovang a, hun tawite hman ka tum ang Pu Speaker.

Demand no. 7 Excise & Narcotics hi lo sawi ta ila. Pu Speaker, kan hriat angin kan ram hi tun dinhmunah hian kan awm a. zu leh ruihhlo vangin chhungkaw tam tak kan rum a ni. Khawtlang kan buai, kohhran te kan mang a ang a ni. Chutiang chuan kan ram chu dinhmun tha lo takah vawiinah hian zu leh drugs te chuan min dah mek a ni. Chutiang chuan he ruihhlo lakah kan fihlim theih nan tiin keini Excise Department kher lo pawh tlawmngai pawl, kan ram leh hnam tana pasaltha, kan Y.M.A member te he hmalaknaah hian theihtawp chhuahin ruihhlo do kawngah hian ke an pen mek a ni. Chutiang chuan MHIP lam te pawhin theihtawp chhuahin hma an la a. Keini chhim lama kan NGO YLA kan tih te, LWA kan tih te, MTP kan tih leh MCHP kan tihte pawhin he ruihhlo donaah hian theihtawpin hma an la a ni. Vawiinah hian kan member te pawh hi he ruihhlo do chungchangah hian an inlungual hlein ka hria a. Kan hriat angin he ministry thar hian campaign atang khan member zahawm tak takte pawhin in lo sawi tawh a. “Kan sorkar chuan zu kan titawp ang” tih kha kan thupui a ni. Chutiang chuan Pathian leh mipuite zarah sorkarna kan chang a. December ni 15 ah Cabinet swearing in hun kan nei a. Ni 16, Inrinni niin ka hria, ka hriatsual loh chuan, ni 16 kha Chawlhni ni zawkin ka hria, Pu Speaker. Ni 17 kha chawlh a ni a, ni 18-ah khan sorkar chuan department leh Co-operation te zu zawrhna chu a titawp nghal a.

Mizoram Liquor Prohibition Bill, 2019 chu Mizoram Legislative Assembly chuan dt 20.3.2019 khan a lo pass ta a. Chutiang chuan he Bill hi lo pass in Act a lo ni ta a. Chu Act chu thil eng eng emaw avangin notify hleitheiloin kan awm a. Pu Speaker, ka hmalamah member zahawm tak takte khan an lo sawi tawh a. Enforcement-a kan hniam zia leh Excise enforcement tihchak a tul zia sawitu te vek kan ni, a dik viau a ni. Excise & Narcotics Department te hian zu chauh a do si lo va. Ruihhlo tha lo tak tak do hnate pawh hi Excise & Narcotics Department te tih tur a ni bawk si a. Kan Chief Minister zahawm tak Pu Zoramthangan nasa takin a ngaihtuahna a seng a, hemi dona turah hian kan sorkar atangin hnathawh hun chhung a la rei lo va. Enforcement tihchak pawh kan duh viau a ni. Chutihruah chuan, vawilekhata thil tih thut theih a ni lo va. Tun dinhmunah chuan kan pachhia

a. Tuna Enforcement lama staff kan neih hi 447 vel chauh kan ni, chung chuan tunah hian district 7 kan enkawl mek a ni. Lawngtlai district tih loh chu district dang zawng zawng tunah hian kan enkawl vek a ni. Chutiang dinhmunah chuan kan awm a. Zu leh drugs chuan kan ramah nasa takin vawiina hetiang kan han khuahkhirh takah pheih chuan an thluak chi hrang hrang hmangin lakluh ngei tumin mi tam tak chuan hma an la mek a ni. Kan Chief Ministryer zahawm tak, kan Finance Minister ni bawk hianin rilru nasa takin a seng a. Engtin nge hma kan lak ang tih pawh hi nasa takin a ngaihtuah a. Tunah hian vacant post 33 hnawhkhat turin phalna min pe a, advertisement pawh kan chhuah mek a ni. Chutiang chuan hma kan la chho a. Chutih lai chuan harsatna tam tak te pawh awm ang. Mahse, Pu Speaker, thil tha leh thil duhawm hmu tur chuan harsatna hi kan sutkian ve a ngai a ni tih hi member zahawm tak tak te hian kan hriat theuh kha. Kan hmalak chhoh zelah Dt 7.1.2019-ah khan Rangvamual-ah Excise & Narcotics Department out post kan zuk hawng a. Tunah hian Bus Terminal AMC building khu out post atana hman mek a ni. Pu Speaker, Zokhawthar, Champhai district leh Bairabi, Kolasib district-ah te pawh out post thar hawng tura hma lak mek a ni. Tin, District thar lo la awm tur Hnahthial, Saitual, Khawzawl leh Lawngtlai district-ah te pawh hian office thar hawn tura hma lak mek a ni bawk.

Tuna Mizoram Liquor Prohibition Act kan hmanah hian State Prohibition Council din ni se kan ti a. Chu State Council hnuaiah chuan District Prohibition Committee pawh din ni se kan ti bawk a ni. Nichinah khan member zahawm tak Pu Lalchhuanthanga khan hemi chungchang hi a rawn sawi a. State Prohibition Council hian a hranpain office kan nei ang a, hma kan la ang tihna hi Rules kan la siam lo va. Mahse, kan tum danah chuan financial implication engmah a awm lova, vawiina govt. functionaries awm ang ang leh tlawmngai pawlthe nena he hna hi thawh hona tura he Council hi tuna kan rilrua awmah chuan neih tum a ni. Rules te kan han siam ang a, Act chu 28th May-ah khan chhuah a ni tawh a, Rules hi tunah kan draft mek a ni tih kha member ten min hriatpui atan he House-ah hian ka rawn sawi duh bawk a. Tawi tein sorkarna kan chan hnu 15th December, 2018 atanga 31st May, 2019 thlenga kan hmalakna tlangpui han sawi ta ila, a thui zawngin ka sawi lo ang a. A tawi zawng hlirin ka sawi ang Pu Speaker. Zu, local liquor kan tih te, zu bilh lai, fermented rice kan tih, dawidim/yeast, IMFL leh beer chi hrang hrangte, utensils leh vehicles, drugs kan man zawng zawng hi 25th December, 2018 atanga 31st May,

2019 thleng hian pawisaa chantirin ₹ 4.58 crore man Excise & Narcotics Department-in kan man a ni. Enforcement lam kan tlem a, Minister ka nihna angin vawiinah hian Excise Enforcement chungah hian lawmthu sawi tur tam tak ka neiin ka hria. An hah, an thawk nasa, khawiahmah kan indaih lo. Mahse, he ram hi ka ram a ni tih rilru puin kan Excise Force-te hian hna an thawk a. Tun kan pal chinah chuan Pathian hruainain harsatna lutuk kan la tawk lo a, kan lawm hle a ni. Zu leh drugs kaihnawihah hian mihring 1144 man an ni. Case hi mi 1317-te hnena register a ni. Chu chu tun sorkar thara Excise-a kan hmalakna tawite ka rawn sawi ni ta se.

Demand no. 29 Social Welfare Department hi tawitea sawi leh ka tum ang a Pu Speaker, Social Welfare hi kan hriat angin department hmalakna zau tak mai, mihring nu puma thla 6 kan nih atanga kan hamthatna ngaihtuah ngar ngar a, tar pension kan hmuh thlenga kan welfare ngaihtuahu department a ni tih hi Pathian leh kan hotute duhsaknaa Minister ka nih atang hian ka hre ve chauh a ni. Chutiang ang department chu a nih avangin vawiinah hian hmalak tur hi tam tak a awm a. Hun awm pheise chuan sermon ang deuh hleka he department chanchin hi sawi ve ka chak khawp mai Pu Speaker. Mahse, a tawi zawngin ka sawi ang a. Department hrang hrang entirnan Health Department te, Education te, Art & Culture te leh department dang dangte nen hian a inthlunzawm vek a ni ti ila kan sawi sual lo ang. He department hi Central atanga Ministry 5 - Ministry of Tribal Affairs te, Minority Affairs te, Women and Child Development Ministry te, Social Justice and Empowerment leh Rural Development atanga hmasawna, state tana a rawn luan luhna tur leilawn nghet tak a ni tih hi vawiinah hian Pu Speaker, ka sawi duh a ni. Department lam atang pawh hian theihtawpin kan hotu hmasate pawhin hma an lo la zel a. Vawiina a changtu Minister ka han nih hian kan phak ang tawkin hma kan la chho a. Tunhnaia kan hmalakna tlem azawng han tarlang ta ila. A hma atanga sawi dawn chuan sawi tur a tam dawn lutuk a. Pu Speaker, Tribal Affairs atang hian EKLAVYA Model Residential School hi kan hotuten term hmasa atang khan an lo kalpui tawh a. Tun sorkar pawhin theihpatawp chhuahin a bawhzui ve zel a. Tribal Affairs Ministry hian tribal-te tana education pek vek hi a flagship programme a ni. Tribal-ten education-a hma an sawn theih nan EKLAVYA Model Residential School hi Ministry of Tribal Affairs chuan tribal-te hnenah a pe thin a ni. Kan stateh hian chu hmalakna chu term hmasa atang khan hma lak a ni tawh a. MNF

Ministry hmasaah khan Pukpui-ah hma lak tan a ni a, a dawtah Serchhip-ah a ni leh a, tunah hian function lai mek 2 kan nei a.

Term hmasaah khan Tuipangah pakhat kan nei a, Lawngtlaiah pakhat kan nei bawk a, Chawngteah pakhat kan nei bawk a ni. Tin, 2018-19, 2019- 20 ah hian 5 min lo pek belh ve leh ta a, heng Ngopa, Champhai District, Lawngtlai leh Chawngte te chu nichina karawn sawi tawh Ngopa pawh kha a hma ami a ni ta a. Tuna kan hmalakna minrawn pek thar chu 5 a ni ta a, Niawh Tlang, Siaha District a ni a, Tlungvel a ni bawk a, chutah Tlangnuam a ni a, Bilkhawthlirah a ni bawk a, Zawlnuam a ni bawk a, chung te chu ₹ 24 crores theuh niin, Ministry of Tribal Affairs-in minrawn pe a ni. Hemi chungchanga tawi te ka sawi duh chu, Ministry of Tribal Affairs flagship programme in hei hi tribal te tana education-a hma kan sawn theih nan Residential School atan min pek an ni. Naupang 450 – 500 vel thleng a thlawna enkawl an ni dawn a ni. Naupang 1 tan hian nuai khat leh sing kua theuh kumtin pek a ni dawn. Chutianga thil tha hei hi CBSE hnuaiia kal tur a ni a, chuang chuan he kan hmalak chhohnaah hian kan zavaiin i tangrual teh ang u, tih hi ka rilrua ka tum ber a ni. Ka rilrua ka vision-ah chuan block tinin EKLAVYA Residential School hi nei thei ta ila. Vawiina state in education-a ti em ema kan buainate pawh hi a chawk zangkhai lo ang maw tih hi ka rilrua ka vei leh ka vision a ni. Chutiang chuan vawiina kan hmalakna te te tha taka hma la turin in enpui theuh ang u tih member zahawm tak tak te kan insawmna a ni. Tribal Research Institute hei hi ₹ 20 crore tunah hian Kelsih ah hma lak mek a ni a, 70 % chu hna hi zawh tawh a ni. Pawl Kut Festival hi nikum lam atang khan hma kan la a, nikumah vawi khat kan hmang a, kuminah pawh hian kan hmang leh dawn a ni. Chutiang chuan Central Excellence for Sports pawh hi ₹ 5 minrawn pe a, Siaha-ah khian hei hi tun atanga reiloteah chuan hma kan lak theih ka ring, kan inbeisei.

Special Central Assistance to Tribal Sub-Scheme (SCA to TSS) 100% CSS pawh vawiinah hian 2018 – 2019, 2019 – '20 ah hian project hrang hrang 19 lai min approve sak a ni. Pu Speaker kan lawm hle. Welfare of persons with disabilities kan tih ang chi hi 1995 Act ah kha chuan person with disabilities tih a ni a. Tunah hi chuan 2016 Act ah kha chuan Right of Person with Disabilities tih a ni, heng atan hian Establishment of rehabilitation home for mental patients kan ti ta a. Supreme Court ruling-ah chuan heng psychiatric patient kan enkawl te mental hospital-a an chhuah hnu pawh hian Home ah an awm tur a ni tih a ni. Chung atan chuan

vawiinah hian hma kan la mek a ni. Mizoram state sorkar chuan pianphunga rualbanlote tuam hlawm nan leh anmahni an lo inenkawl ve nan heng vawk vulh, ar vulh, puanthuina leh khawl leh sumdawnna tenau bul tan na turin tanpuina kumtin a pe thin a ni. Tin, rualbanlo lekha thiam, hna neilo te hnenah pawh thla tin tanpuina pe in disabled pension mi 200 hnenah pek mek a ni bawk. Tin, rualbanlote tan department hrang hranga hna kan neih dan pawh hi kan chian a thain ka hria a. Person with disability kan tih ah chuan 3% a ni a, Right of person with disability kan tih hnuah hi chuan 4% hi rualbanlo ten chanvo an nei a ni.

Tin, poverty alleviation scheme hrang hrangah hian 5 % heng ho hian chanvo an nei ve leh bawk a, chutiang chu an dinhmun a ni. Setting up of Braille Press kan ti a, rualbanlo mitdelte tan zirlaibu leh lekhabu te siamna tur Braille Press dinna tur atan hma lak mek a ni a. Tunah hian Government of India chuan ₹ 88 lakhs leh ₹ 11,000/- min lo approve sak tawh a ni. Press-a thawktu tur te erawh state sorkar tum tur a ni thung ang a, chung atan chuan tunah hian hma lak mek a ni. Unique Disability Identification (UDID) kan ti a, nichin lama in lo sawi chhanna te pawh a ni tel ang a. Tunhma chuan pianphunga rualbanlote hi state atangin an ID kan issue mai thin a. Tunah chuan chutiang a ni tawh lo va, identification ti tur hian online nena apply vek a ngai tawh a. Hei hi tunah hmalakna kalpui mek a ni a, mi 1340 te ID siam sak an ni tawh a ni.

Pu Speaker, Child Welfare lam tawi te in han sawi leh ila. Upgradation of Anganwadi Centers kan ti a, nichinah member zahawm tak te pawh khan in rawn sawi tawh a. APIP atang hian state atangin kan zuk thawn ta a, central-in min approve sak ang ang, kumin atan khan 600 min rawn approved sak a. Chu chu Anganwadi Centers upgrade nan hian nuai 2 theuh min lo pe a ni. He min lo release ah hian an lo released tawp a, Co-ordination in lo thawk rawh se, CDPO-in lo thawk rawh se tih hi engmah a awm hran lem lo va. Mahse, engtin nge a tha thei ang berin kan chhuah theih ang tih hi kan ngaihtuah dan leh kan kalpui dan a ni. Chutiang chuan state atangin CDPO te hnenah pek a ni a, 1st instalment 1.3 lakh release sak theuh a ni tawh a. Anni chuan Co-ordination te nen an rel a, engtia tih nge tha ber ang, tiin ro an rel a. Anmahni rorel ang chuan upgrade a ni emaw, renovate a ni emaw, chutianga hma lak thin chu a ni.

Tin, Pradhanmantri Matru Vandana Yojana (PMMVY), maternity benefit programme-ah pawh he scheme hnuaiah pawh hian raipuar mi 12145? ten hamthatna an dawng tawh a ni. Naupai pawisa faia chhawmdawlna ₹5000 kan pek ang chi kha a ni. Kum 2018 – 19 chhungin Northeast zone state te zingah ti tha ber kan ni a, award pawh kan dawng bawh a ni. India ram pum puiah pawh hian Mizoram chu 7 – na dinhmunah kan ding a, kan lawm hle a ni. Kan official te leh kan worker te hnathawhnaah lawmthu kan sawi ni se. POSHAN Abhiyaan, National Nutrition Yojana kan ti a. He Mission-in a tum ber chu kum 2022 hma ngeia India ram pum pui nu, naupai leh naupang ten nutrition mumal loh avanga harsatna an tawh thin te tih bo a ni. He Mission hi March, 2018 atanga kalpui niin Mizoram sorkar pawhin chak taka hma la in a kalpui nghal a. India ram pum puiah pawh POSHAN Abhiyaan atana hma la tha ber pawl kan ni a. Northeast states leh Himalayan states te zingah a ti tha ber niin lawman (award) pawh kan dawng nghe nghe a ni.

Integrated Child Protection Scheme (ICPS) hnuaiah hian naupang kum 18 hnuai lam baihvai leh enkawlna mumal dawng lo te venhimna atan hma lak a ni a. Tin, naupang dan bawhchhia leh nun kawng dik kawhhmuhna kawngah hma lak bawh a ni. Heng naupangte enkawl nan hian district tinah Observation Home kalpui mek a ni a. Special Home, Lunglei leh Aizawl-ah leh Children Home hmun hrang hrangah kalpui bawh a ni. Naupang rualbanlote tan pawh Home pahnih din a ni tawh bawh. Juvenile Justice Act, 2015-in state tin te mahni rules siam tura a tih angin “The Mizoram Juvenile Justice (Care & Protection of Child) Rules”, pawh peihfel a, notified a ni tawh bawh.

Pu Speaker, chu loah chuan thil lawmawm ang reng tak, he House-a sawi chakawm deuha ka hriat chu, Social Welfare hi nichina ka sawi tawh ang khan, hetah Excise Department kan nihna angin kan do ang a. Hetah a tihdam hna kha Social Welfare lam atanga thawh leh a ngai dawn si a. Chung avang chuan Social Rehabilitation Board pawh he sorkar in a din tawh a. Chu Board hmang te leh waviina khawtlanga tlawmngai pawl, kan thawhpuite nena hma la chho tur kan ni dawn a. Chung avang chuan kan ramah hian kan hriat angin ruihlo avanga Home hrang hranga kan dah, Centre hrang hranga kan dah tam tak an awm a ni. Heng ho kan enkawl dan hi dik tak chuan tihngaihna dang a awm si lo a. Kawng dang a awm tak si loah chuan waviina kan enkawlnaah hian kan ‘amen’ hrih mai loh chuan

tihngaihna a awm bawk si lo a. Chung avang chuan Mizoram Social Defense & Rehabilitation chuan ngun taka a ngaihtuah hnuin Mizoram Drug Treatment cum Rehabilitation Center Accreditation Rules chu a lo duang ta a. Vawiinah chuan Council of Ministers-in min pawm sak tawh a ni. He Rules hi kan hman theih chuan India rama he Rules hmang hmasa ber state kan ni dawn a ni. Kan beisei dan phei chuan state dang atangte pawhin an lo zir kan inbeisei. Chutiang anga Rules tha chu tunah hian kan nei tawh a, hma kan la tan tawh a. Heng kan Home hrang hrang te hi kan tlawh ang a, kan en ang a, chungah chuan accreditation pek theih chi nge chi loh tih kan en ang a. Chung kan pek theihte chu Functioning Center kan ti ang a, chung Functioning Center-ho chu thla 6 hnuah Accreditation Board chuan a en leh ang a, Center dik tak angin kan puang dawn a ni. Chu chu tunah hian kalpui mek a ni.

Hei hi a tul em em nachhan chu vawiinah kan naute, kan fate an addict avangin center-ah kan dah tawp a, kan va dah khan eng natna inkai chhawn theihte nge awm tih pawh hi ngaihtuah tur tam tak a awm a ni. Example-ah Home pakhat, mi 100 vel lo awmnaah khan tu emaw kan naute va dah tawp ila, natna inkai chhawn theih tam tak-TB te, Hepatitis te, HIV, AIDS-te thleng pawhin thil hlauhawm lutuk a ni. Chung avang chuan heng Rules nena kan inenkawl chuan beiseina sang tak kan nei a ni.

Chu loah chuan kumin January-ah khan NGO pawl hrang hrang atangin mi 34 Chennai-ah heng zir turin department chuan TTK Hospital-ah khuan a tir a. Chungte chu vawiinah hian kan chhawr tangkai hle a ni. Chumi lo ah naupang kum 10-18 inkar, drugs tihching, drugs-a inhnawihawh leh drugs hi eng angin nge a nih tih an hriat leh hriat loh ang chi te, heng survey hi ni 18-ah khan mi 60 ko in training kan pe a, chu chuan Mizoram pum pui vawiinah hian survey an nei tan dawn a. Chu survey report atang chuan Mizoram Social Defense and Rehabilitation-in eng angin nge hma kan lak ang tih hi decision kan siam ve dawn chauh a ni. Chu chu Social Welfare-a a tlangpuia kan hmalakna a ni, Pu Speaker.

Demand 34-na Animal Husbandry & Veterinary kha tawitein sawi leh tum ta ila, Pu Speaker. Kan hriat angin Mizoram hi a bik takin khawpui pawn lam, thingtlang lam deuh hlekte tan chuan kan sum lakna ber chu ran vulh hi a ni. Chutiang dinhmuna awm chu kan ni a, chu vang chuan Vety Department pawimawhzia leh a pawimawhna lai chu member zahawm tak takte khan nichinah in

lo sawi teuh tawh a. Vawiiina kan dinhmunah erawh chuan khang in rawn sawite leh in ngennate pawh kha kan ngaipawimawh viau a, tih sak vek che u leh tihhlawhtlin sak vek che u pawh kan chak a ni. Chutih lai chuan, vawiiina kan dinhmunah chuan indaihloh a nasa viau mai a. Junior Grade of MAH & Veterinary Science-ah hian post 68 a nih laiin post filled hi 51 chauh kan nei a, post 17 lai a ruak a ni.

Chung avang chuan hmun tam takah vawiiinah hian VO te pawh nei hlei thei lo in kan awm a. Tunah hian sorkar-in VO 5 a advertise mek a, hengte hi kan lak theih chuan kan harsatnate pawh kan sut kian ve deuh kan ring, kan inbeisei a ni. Vacant post tam tak a awm a, hmingte nen hetah hian ka nei vek a, an khaw hmingte kha chu ka chhiar chhuak lo mai ang a. Kan ning deuh tawhin ka hria a, kan kawngte pawh a kham ang a. Chuvang chuan a tawi thei ang bera sawi ka tum ang a.

Senior Grade of MAH & Veterinary Science-ah hian posts hi 38 a awm a, 36 hnawh khah a ni tawh a, 2 fill up tur a la awm bawk a, Doctor 2 deputation-in MULCO leh PIGFED-ah kan tir bawk a. Tin, VFA kan tih hi kan indaihlo em em mai a ni. Posts hi 144 kan neih laiin 102 chauh filled up theih a ni a, vacant posts hi 42 lai kan nei a ni. Tin, Veterinary Supervisor-ah hian total posts hi 260 a awm laiin vacant posts hi 84 kan nei a ni. Chutiang kan nih avang chuan vawiiinah hian kan rilrua tha kan tih te, kan duh ang zawngte pawh kan la ti hlei thei lo a. Mahse, vawiiinah member zahawm tak tak ten demand-te pawh min la pawmpui dawn chauh a. Demand min han pawmpui te te phawt ula, hna thar kan la chho ang a, kan zavaiin kan tangtlang a. Hengte pawh hi sut kian theih kan inbeisei a ni.

AH& Vety Department hian nasa takin kan ran tam tak disease outbreak avanga kan lo thiha harsatna tam tak kan tawhah nasa takin hma a la a, vawiiinah chuan Poultry development-ah nasa taka hma lak a ni a. Kan hmalakna zawng zawng chu sawi dawn ta ila a tam ang a, a bik takin poultry-ah chuan Tanhril-ah indoor hatchery te kan nei a. Khu khu private entrepreneurship te nen joint venture-a kan tih a ni a. Term hmasa kan Minister zahawm tak ten an lo tan tawh a ni a. Keini chuan thil tha a nih chuan kan chhunzawm mai a ni. Chutiang chuan khung te pawh khu kan chhunzawm a. Lengte-ah te pawh khuan chutiang chu kan nei bawk a. Hmun dang dangah Lungpuizawl-ah te pawh kan nei a.

Tin, Ar note tih keu hi nasa takin hma kan la a, state dang atanga kan lak thin kha tunah chuan 30% hi chu keimahni hian kan keu tir thei tawh a ni tih vawiiinah

hian ka sawi duh a. Tin, Piggery-ah hian Nghalchawm leh Lengte khu vawiinah kan hriat angin kan ramah kum 2013 te, kum 2014, 2015, 2018 ah PRRS nasa takin a leng a, Zoram mipui ten nasa takin kan tuar a ni. Khang avang khan PRRS hi Pathian zarah vawiinah chuan report kan la dawng miah lo va. Heng Nghalchawm te leh Lengte te hi khaw mawngping, vawk multiplication centre atan tha tura kan ngaih a nih avangin private firm eng emaw zat te chuan multiplication ti turin hma an la nasa a, large scale-a hma lak mek a ni. Hengte pawh hi sorkar pawhin a theih chin chinah assistance pe in vawiinah hian hma kan la mek a ni.

Pu Speaker, vawiinah member zawng zawngte ka sawmna che u chu, tunah hian khawchhak lam kan thenawm ramah khian African swine fever hi nasa takin a leng a ni. China te, Vietnam te, Mongolia te, Hongkong-ah te May thla thleng khan nasa takin a leng a ni. Vietnam-ah pheh chuan Civil Aviation-in tihngaihna an hre hleitheh lova, chutiang chuan an army te an hmang a ni. Chu chu keini member te leh bial neia kalkhawmte hian nasa taka hma kan lak a va han tul dawn em! Vety. Department ang chuan nichina ka rawn sawi tawh ang khan kan indaihlo nasa si a, international border leh inter-state border angah te pawh khan surveillance ti tur leh khang a check post-ah pawh khan kan indaihlo a ni.

Chung avang chuan hei hi kan lo inven lawk loh chuan vawkin a kai chuan za ah za mortality a ni ringawt mai a ni, thih ngei ngei na kha a ni ringawt, a incubation period hi ni 4 atanga ni 15 vel a ni a. A dam reng emaw tih hian a thi thut mai, chutiang chu a ni. Chu chu kan thenawm Myanmar-ah khian lo awm ta teh reng pawh ni se, a record system khi a awm kan ring lo va. An rama a awm chuan kan rama vawk kan lakluh chuan a kai ngei ngei dawn a ni tih kha vawiinah hian kan bialah theuh te pawh hian sawi zau ila.

Tin, khawchhak lam atanga meat product rawn kal hrim hrim atang pawh hian a kai theih tlat mai a ni. Chuvang chuan heng meat product kan tih ang chi, sausage a ni emaw, meat ball kan tih te pawh hi theih chu ni se khap thei ta ila, a pawimawh hlein kan hria. Chung avang chuan member zahawm tak tak te, district administrator te, vawiinah ram pawn lam atanga ran lakluh hi theihtawpin i do teh ang u tih he House atang hian ka sawm che u a ni. Chumi atan chuan Pu Speaker, i phalnain department-in member te ngenna tur tihian kan rawn siam vek a. Min phalsak chuan a copy hi member tinte pek kan duh bawk a ni. Chu chu vawiina kan

hmalakna kal mek a ni. Chutiang chuan Vety-ah hian kan zavaiin hawh u, kan kut tha i tichak teh ang u tih kha kan insawmna ni leh ta se.

Tin, Demand no.41 Sericulture Department hi (Pu Speaker, sana kan en nasa tawh a, ka inthlahrung viau a ni, tawite sawi ka tum ang) member 20 zingah khan 4 chauhin kan sawi a, ka rilru te te in kan va han hrelo em aw, ka lo ti deuh a. Vawiinah hian Pu Speaker, Mizoram hi Sericulture potential area a ni tih hi central Silk Board khuan keini helai state-a chengte ai hian an hmu chiang zawk a ni tih ka sawi duh a ni. Sericulture Department, Mizoram hian silk tharchhuah pun zel nan leh thingtlang kuthnathawktu ten sericulture hmanga eizawna ngelnghet an neih theih nan hetiang hian hma a la mek a ni.

Pakhatnaah chuan North Eastern Region Textile Promotion Scheme kan ti a. (NERTPS) Ministry of Textiles, Govt. of India hnuaiah silk tam zawk thar chhuah nan Integrated Sericulture Development Project (ISDP) kan nei. Intensive (Bio-) Sericulture Development Project (IBSDP) kan nei a. Integrated Muga Silk Development Project kan nei baw a.

Heng project atangte hian theihtawp chhuahin tunah hian district tin, Siaha District tih lohah chuan Sericulture Department hian hma a la mek a ni. Chu lovah tun kum February-ah khan Mamit Aspirational District atan khuan area development project siamin ₹11 crores chuangin hma kan la a. Tunah khuan chu hmalakna chu a kal mek a ni. Chutiang chuan North East Region Textile Promotion Scheme (NERTPS) atang chuan tunhnai lawkah khan Central Silk Board kan zuk dawr a. Mi an duhsak khawp a, Mizoram pum pui tan Mega-Project lo siam ula, chu Mega-Project chu kan lo pawm sak ang che u, hma in lo la dawn nia an ti a. Chu chu wawiinah kan department lamin hma an la mek a.

Tin, a bik takin Siaha District atan hian Development of Area Silk-in Siaha District tiin beneficiaries mi 400 tan ₹12 crores chuang man wawiinah hian project thehluk mek a ni a. Tun atanga reiloteah minrawn approve sak kan beisei viau a ni.

Chutiang chuan Silk Samagra Scheme, Integrated Sericulture Development in India for Livelihood tih, Ministry of Textile hnuaiah Eri Silk, 4.50 metric ton thar chhuahna turin scheme 400, acre 400, beneficiaries 400 khuh tur hna chu tunah hian sum anrawn release nghah mek a ni baw a ni. Sericulture Department, Mizoram

chuan silk chi 3, Mulberry, Eri leh Muga te nasa zawka thar chhuak tur leh Mizo brand silk siam chhuah hi vawiinah hian a tum mek leh hmalakna mek a ni.

Pu Speaker, kan ram hi kan vannei a, Horticulture leh Sericulture atan potential state a ni tih kan hria a. Khawvelah hian silk produce hnem ber chu China an ni a, a consume nasa ber chu India kan ni. India hi production lamah pahnihna kan ni. India-in vawiina a tum chu China atanga import tih tlem zela tih tawp hi a ni. Chung atan chuan silk production ti tam turin khawi lamah nge mit a len kan tih chuan, Central Silk Board khuan North-East hi a rawn en ran a ni.

Chungah chuan Mizoram hi a tha tih an hrechiang hle a ni. Chuvang chuan hmanna Central Silk Board kan zuk dawr ah khan Asia-a Silk leh Cocoon zawrhna market lian ber ah tuk khat chu an auction lai in kan va kal a. Mysore-ah, a hmunpuiah te min kalpui vek a. Chutiang chuan kan rama hma kan lak ve hi Central Silk Board khuan min duhsak em em a. Vawiinah hian kawng zau tak a inhawng a ni tih hria ila. Vawiina kan member zahawm tak tak te pawh hian mahni bial theuhah leh mahni district theuhah theihtawp chhuaha he silk production-a kan tum tihlawhtling tur hian ke min pen pui teh u tih hi Sericulture Department chuan a sawmna che u a ni.

Pu Speaker, khang kha ka Demand rawn sawi te kha a ni a, member zahawm tak tak ten thahnemngai takin ka demand pali-te min sawi pui a. Sawi tawh ang khan tuna ka rawn sawi te te atang khan kan inchhang deuh maiin ka hria a, a hranpain ka react tawh lem lo ang a.

Tichuan, Pu Speaker,

Demand no.7, Excise & Narcotics	- ₹43,78,29,000.00
Demand no.29, Social Welfare	- ₹1,50,60,50,000.00
Demand no.34, AH & Veterinary	- ₹69,33,31,000.00
Demand no.41, Sericulture	- ₹21,09,67,000.00
Total	- ₹2,84,81,77,000.00 hi he House zahawm tak hian min pass sak turin ka rawn dil e.

SPEAKER : Aw le, tunah chuan Minister zahawm tak Dr. K. Beichhua'n a demand te: -

Demand no.7, Excise & Narcotics - ₹43,78,29,000.00

Demand no.29, Social Welfare - ₹1,50,60,50,000.00

Demand no.34, AH & Veterinary - ₹69,33,31,000.00

Demand no.41, Sericulture - ₹21,09,67,000.00

Total - ₹2,84,81,77,000.00 chu he House-ah pass a rawn dil a, remti in 'Remti' ti ula. Remti lo in awm chuan 'Remti lo' ti rawh u le.
(MEMBERS : Remti)

Aw le, tunah chuan remti lo an awmlloh avangin Minister zahawm tak Dr. K. Beichhua Demand: -

Demand no.7, Excise & Narcotics - ₹43,78,29,000.00

Demand no.29, Social Welfare - ₹1,50,60,50,000.00

Demand no.34, AH & Veterinary - ₹69,33,31,000.00

Demand no.41, Sericulture - ₹21,09,67,000.00

Total - ₹2,84,81,77,000.00 chu House-in lungrual takin a pass e.

(Pu Lalduhoma : Thenkhat demand i by-heart sak si lo va, i fair lo kan ti a nia.)

Dr. K. BEICHHUA, MINISTER : Pu Speaker, ka lawm e.

SPEAKER : Aw le, vawiin kan business kan zo leh ta a, naktuk khi April 21, 'Lalmanga Nu lawmrawih Ni' kan tih thin kha a ni a, naktuk dar 10:30 AM ah kan thukhawm leh dawn nia.

Sitting is adjourned. (7:21 pm)